

MATEOHUA ESOHUI QUEA PAME NEE TEHUE CANAJE JESOSA QUITOJA MATEO

Jesosa Quitoja etiiquiana
(Noca 3.23-38)

1 ¹Jiquio esohui etehue'yo Jesosa Quitoja etiiquiana. Yahuajo jama poa ba'a: Dabi Jesosaja etiiquiana poa, Amajama pea'ai. ²E'e, jamaya poa: Amajamaja bacua ejja Isaaca bajjani poa. Isaacaja bacua ejja Jacobo bajjani poa. Jacoboaja bacua Joda bajjani poa; echahua mese cuana enequia poa pea'ai. ³Jodaja bacua cuana Panesi bajjani, pea Sana bajjani poa, Tamaja mejo poa. Panesija bacua Esomo bajjani poa. Esomoja bacua Anami bajjani poa. ⁴Anamija bacua Aminanami bajjani poa. Aminanamija bacua Nasoni bajjani poa. Nasonija bacua Sanamo bajjani poa. ⁵Sanamoja bacua Bosi bajjani poa, Shajamija mejo poa. Bosija bacua Obeda bajjani poa, Shotija mejo poa. Obedaja bacua Isai' bajjani poa. ⁶Isaija bacua emeshi mese Dabi poa. Dabija bacua Sanomoni bajjani poa. Sanomonija enaese e'ahuemano poa, Oniaja quijjojea, Dabija huana'yo poa. ⁷Sanomonija bacua Shobiami bajjani poa. Shobiamija bacua Abiase bajjani poa. Abiaseja bacua Asa bajjani poa. ⁸Asaja bacua Josapati bajjani poa. Josapatija bacua Jonami bajjani poa. Jonamija bacua Osia bajjani poa. ⁹Osiaja bacua Jotami bajjani poa. Jotamija bacua Acasi bajjani poa. Acasija bacua Esequia bajjani poa. ¹⁰Esequiaja bacua Manase bajjani poa. Manaseja bacua Amoni bajjani poa. Amonija bacua Josia bajjani poa. ¹¹Josiaja bacua Jeconia bajjani poa; echahua mese cuana enequia poa pea'ai. Jeconia nequinajejo, Babinonia dejja cuaa Isaeni cuana iña majje dojo ca poa oja meshi yasijje sosema' chaco meeya.

¹²Majoya Babinonia meshi yasijje dojo majje Jeconiaja bacua Sanati cuaya poa. Sanatija bacua Sonomame bajjani poa. ¹³Sonomameja bacua Amioni bajjani poa. Amionija bacua Eniaqui bajjani poa. Eniaquija bacua Asoni bajjani poa. ¹⁴Asonija

bacua Sanoco bajjani poa. Sanocoja bacua Aquimi bajjani poa. Aquimija bacua Eniodi bajjani poa. ¹⁵Eniodija bacua Eneasa bajjani poa. Eneasaja bacua Matani bajjani poa. Matanija bacua Jacobo bajjani poa. ¹⁶Jacoboja bacua Jose bajjani poa. Oya Maniaja yahue poa. Maniaja bacua Jesosa bajjani aca poa, Quito bajjani pea'ai poa, Eyacuiñajjija huoojea'yo ojjaña cuana jaahuanajji.

¹⁷Jamajjeya Amajamaja bacua ejja tii majje jea ca poa pea. Majoya tii majje ohuaya pea jea ca poa. Jamaya aca poquiapoquia poa. Quijje nei etiiquiana Dabi cuaya poa. Etiiquiana Amajamaja jeaja osecua cuana 14 poa Dabi cuaya jjimahuajo. Majoya oya jayojja Dabija bacua ejja tii majje jea ca poa pea. Tii majje ohuaya pea jea ca poa. Quijje nei Dabija osecuaja jeaja osecua cuana 14 po majje, dejja mase cuaa etiiquiana cuana Babinonia meshi yasijje dojo ca poa. Majoya Babinonia meshi yasijje poqui majje oya jayojja aca poquiapoquia poa. Majoya quijje nei Jesosa Quito cuaya poa Joseja tii mee. Ma etiiquinaja jeaja osecua cuana 14 poa Jesosa Quito cuaya jjimahuajo. E'e, jamaya poa.

Ebacua Jesosa Quito cuaya poa

(Noca 2.1-7)

¹⁸Jesosa Quitoja ecuaya'yo jama poa ba'a: Joseja Mania emese na poa. Mania bii ania poa; dejja cuana ba jjima poa. Jamatii o'ejji poa. Eyacuiñajjija Edojjoshahua Pameya ebacua ba'e mee ca poa, Maniaja ebacua. ¹⁹Jose quea pame nee poa. Jamajjeya Mania o'ejji poajo jjahuanaqui sa po ajja poa. Jjashahuabaquia poa jama ba'a: —E'e pojja'a Mania pea cojjojji poanaje. Jamajjeya oya jjamejoquinaje. Eyaya oya cajaa aje. Quehuajje cajaa aje Mania, pea cuanaja ba jjima. Jamajjeya pea cuana Maniajo maimai ajja poaje.

²⁰Jamaya jjashahuabaquianijo Joseya cahuiba ca poa. Oe Eyacuiñajjija esohuidojojji miminaje onijje. Jama poanaje ba'a: —Jose, ja'a Mania cajaa ajji! ¡Oya huanacue! Oja bacua Eyacuiñajjija Edojjoshahua Pameja ba'e mee. ²¹Ojaya ebacua cuayaje. Jamajjeya jiquio ebacua tii majje ojaya epeejji cuanaja mimishi cuijea'yojji poaje. Jamajjeya ojaya ebajjani poaje Jesosa.

²²E'e, Eyacuiñajjija esohui huohuijjija esohui yahuajo nei nei jayojjaya jjeya nei jamaya poani. Jamaya yahuajo poa ba'a:

²³“Epona sho'i bii ani jamatii o'ejji poanaje. Cuayajo oja bacua bajjani acaje Emanuel. Ese Ejjaja esohuijo ca jama ba'a: Eyacuiñajji ecuana nijje nequi”. Jamaya Joseya cahuiba ca poa.

²⁴Majoya shequi'yo majje Eyacuiñajjija esohuidojojji esohuijo Mania huana canaje, Joseya. ²⁵Jamatii ebacua cuaya jjimajo, Joseja Mania napa jjima poa. Ebacua cuayajo Jesosa bajjani acanaje.

Dejja cuana majametajo jjashahuaba neineiquiani poeyanaje Jesosa baa

2 ¹Jesosa cuayanaje Jodea meshijo, Benena cuiñajjijo. Cuayanajejo dejja Enode bajjani emeshi mese poa. Jamajjeya Jesosa Quito cuayanajejo, pea dejja cuana majametajo jjashahuaba neineiquiani, eshequi poeje

mijijje meshijo ba'e quea huesha nee poeyanaje Jenosanena cuiñajji yasijje. ²Majoya oya cuanaa Enode huohui'ajja canaje jama ba'a: —Emeshi mese, ¿achejo jaa ebacua esho'i nei, ma Jodio cuanaja Emeshi Mese poaje'yo? Pea meshijo eshequi poeje mijijjejo nequi ojaya majameta ai quea jiji nee nee ecuaa banaje. Majoya ecuaa poeyanaje o bihúiaa —poanaje.

³Jama huohui'ajjame acajje emeshi mese Enode quea ajjajja nee nee poanaje. Ojjaña dejja cuana Jenosanenajo ba'e pea'ai quea ajjajja poanaje. ⁴Jamajjeya Enodeya ojjaña Eyacuiñajji nijje emimijji etii cuana, ojjaña Moisesija esohui etehue'yo huohuijji cuana pea'ai iyaa canaje o que. Jama huohui'ajjame acanaje ba'a: —¿Achejo shai cuayaje ebacua Quito? Oya Eyacuiñajjija huoojea'yo ese jaahuanajji poaje'yo —acanaje Enodeya.

⁵Oya cuanaa huohui canaje jama ba'a: —Quito Benenajo cuayaje, Jodea meshijo. Yahuaajo nei nei huohui canaje Eyacuiñajjija esohui huohuijjiya jama ba'a:

⁶“Cuiñajji sisi Benena bajjani Jodea meshijo yani. Pea cuiñajji cuana quea quemo Jodea meshijo yani pea'ai. Benena cuiñajji quea biso. Jamatii jomajo cuayaje Isaeni dejja cuanaja Emeshi Mese quea pame nee. Ohuaya Eyacuiñajjija epeeji cuana jaahuana caje'yo”. Jamaya aca poa esohui huohuijjiya yahuaajo nei nei —oya cuana poanaje.

⁷Emeshi mese Enodeya dejja cuana eshequi poeje mijijje ba'e iyaa ca o'oyanaje o que. Quehuajje huohui'ajja canaje ebacuaajo. Ma dejja cuaa huohui canaje ache mecajje majameta ai quea jiji nee nee ba coo canaje, ebacua cuayajo pojja'a. ⁸Ebacuaajo huohui mee majje Enodeya oya cuana huoojea canaje Benena huasijje ebacua baa. Jama huohui canaje Enodeya: —¡Poquicue miya! ¡Ebacua sa'ajja neineiquicue! ¡Ba'yo majje poecue! ¡Eya huohuihuacue achejo ebacua jaa! Jamajjeya eya poquije pea'ai ebacua bihúiaa —Enode siajje poanaje.

⁹Emeshi mese Enodeya huoojea cajje ma dejja cuana poquinaje ejiojjijje. Ejiojjijo poquianijo majameta ai quea jiji nee eyajo ba ca o'oyanaje ehui dojojji, yahuaajo jama. Majameta ai nequi cojja nei poqui'yonaje ebacua huasijje. Majameta jijinequinaje tii ebacua jaa cojja nei. ¹⁰Majameta jijiqui ba majje quea bihui nee nee poanaje oya cuana. ¹¹Equi yasijje dobiquinaje. Ebacua Jesosa ba canaje enaese nijje, Mania nijje. Ba majje ebacua bihúia canaje ecui'oshajjajo nequiya. Bashosoco pichojea majje aquiana quea nahue quia canaje ebacuaaja. Mei huo'o quia canaje, shiyeshiye quea nahue quia canaje, esei quea shiye nee quia canaje pea'ai. ¹²Majoya ma dejja cuana jjacahuibaquianijo, Eyacuiñajji onijje miminaje jama ba'a: —¡A'a poqui o'oyajji emeshe mese Enode yasijje!

Jamajjeya oya cuana poqui o'oyanaje oja meshi yasijje pea ejiojjijje. Enode bana'yo jjima aca poa.

Ebacua Jesosa quehua dojo canaje Ejito meshi yasijje

¹³Majameta eba neinei'yojji dejja cuana poqui'yo majje Eyacuiñajjija esohuidojojji poeyanaje Jose que, Jose ecahuiaajo. Miminaje Jose nijje jama ba'a: —¡Shequicue oe! ¡Nequisohuacue oe! ¡Ebacua, enaese pea'ai dojocuaicue jjeyahua nei Ejito meshi yasijje! ¡Jomajo nequicue! Quijje eyaya miya huohuije miquea meshi yasijje epoe o'oyajji. Jjeya emeshi mese quea maseya Enode bajjaniya ebacua sa'ajja neinei cani equecuajea'yojji.

¹⁴Jose nequisohua majje ebacua, enaese pea'ai dojocuaaji canaje ejiojjijje Ejito meshi yasijje, mecashono. ¹⁵Ejito meshijo nequi'yonaje emeshi mese Enode eshe nequijo. Enode mano'yajo Isaenija meshi yasijje poe o'oyanaje, Jose. Jamajjeya Eyacuiñajjija esohui huohuijjija esohui yahuajo nei nei jayojja jama poa. Eyacuiñajjija esohui tehue ca poa yahuajo nei nei jama ba'a: “Ecuea ebacua Ejito meshijo ba'e eyaya iyaa'yonaje”.

¹⁶Emeshi mese Enodeya ba canaje dejja majameta eba neinei'yojji cuanaa oya dasia ca poa. Jamajjeya oya quea quene nee nee poa. Oja sohuinano cuana huojoja ca'ya poa: —¡Ojjaña ebacua joya tonatona ai'ai quecuajeaquicue! ¡Benenajo ba'aja ebacua dejja sho'i cuana, Benena pejjejo ba'aja pea'ai oe quecuajeaquicue!

Jamajjeya mano'yonaje ojjaña ebacua dejja sho'i daqui she becanejjijji pea'ai epo tonatona ai'ai, esho'i nei pea'ai.

E'e, majameta eba neinei'yojji dejja cuanaja ehuohui'yojo, majameta ai quea jiji nee poanaje, ojjaña ebacua quecua sa poa Enode. ¹⁷Eyacuiñajjija esohui huohuijji Jenemiaja esohui yahuajo nei nei jayojja jama aca poa Enodeya. Ebacua cuana quecua ca'ya poa jamaya. Jenemiaa aca poa jama ba'a:

¹⁸“Shama cuiñajjijo eyiyo ao'ao cuiñajjijo quea shajjaquijjo. Ojjaña janobajjima nei nei pa tiitii'yani. Jodio enaese cuana pa'añani oja bacua cuana mano'yajo. Quea yeno nee nee. Papajea'yo ajja”.

Jamaya etehue'yo yahuajo nei nei poa.

Ebacua Jesosa Ejito meshijo ani poe o'oyanaje

¹⁹Emeshi mese Enode mano'yajo Eyacuiñajjija esohuidojojji poeyanaje Jose que, Jose cahuiaajo, Ejito meshijo ba'ajo. ²⁰Huohui canaje jama ba'a: —¡Nequisohuacue, oe! ¡Ebacua, ojaya enaese pea'ai dojo'yocue Jodio meshi yasijje! Emeshi mese Enode mano'yonaje, ma ebacua Jesosa quecua'yojji nisho poanaje.

²¹Jamajjeya Joseya nequisohua majje ebacua Jesosa, enaese pea'ai dojo ca o'oyanaje oja meshi yasijje, Jodioja meshi yasijje. ²²Enodeja bacua ejja Aquenao bajjani Jodea meshi mese eyacua poanaje. Jose jama shajja'ajja majje quea mete poanaje ma meshijo eba'ejji. Eyacuiñajjiya huohui canaje Jose jjacahuibaquianijo: —¡Janinea meshi yasijje poquicue, Jose!

Jamajjeya Jose poquinaje Janinea meshi yasijje ba'e'yohua. ²³Nasanena cuiñajjijo Jose ba'enaje. Jamajjeya Eyacuiñajjija esohui huohuijjija esohui

yahuajo nei nei jayojja jama poa ba'a: “Quijje pishana oya Nasanenajo ba'e dejja bajjani acaje”.

Huaniya esohui huohui canaje quima huasijje
(*Macoso 1.1-8; Noca 3.1-9,15-17; Huani 1.19-28*)

3 ¹Jesosa Nasanenajo ba'yanijo, Huani, ona besameejji poani poeyanaje Jodea meshi yasijje. Dejja cuana meshi jabojo anica huasijje sohuihuohui huicha'a huicha'a canaje Huaniya. Jama acanaje ba'a: ²—;Miquea mimishi cuanajo quea yeno pocue; miquea mimishi cuana pajea'yocue! Jjeya nei Eyacuiñajji poeje ojjañaja Emeshi Mese nei nei —acanaje.

³Isaiaa Eyacuiñajjija esohui huohuijjiya jama huohui ca poa yahuajo nei nei Huanijo ba'a:

“Oe dejja meshi jabojo nequi taaanequije. Jama poaje ba'a: —Jiquio ecua Emeshi Cuiñajji nei nejia ejiojji shabo jea cani jama, quea pojje nee nee acani jayojja jamaya ¡miquea ejjashahuabaquijji tai quea bojea nee nee a'yocue! Emeshi Mese nei nei poeje”.

Jamaya Isaiaa yahuajo nei nei tehue ca poa.

⁴Huaniya huo ña, cameno ña oja sipi huosho canaje. Ejjayica'aquijji ejee iya canaje. Shacui ijja canaje, huini pea'ai ishi canaje Huaniya. ⁵Quea huiso dejja cuana Jodea meshijo ba'e, pea cuana Jenosanenajo ba'e pea'ai, pea cuana cuei Jodana sahuajo ba'e pea'ai Huani que poeyanaje o shajja'ajjaa. ⁶Oya cuana quea mimishi poanijo quea yeno poani. Jamajjeya oja mimishi cuana huohui ca'yonaje. Mimishi cuana pajea sa poanijo, Huaniya oya cuana Eyacuiñajji nijje epo'yojji besa mee canaje Jodana cueijo.

⁷Jodioja esohui huohuijji Paniseo bajjani cuana, Sanoseo dejja cuana pea'ai poeyanaje Huani que; Eyacuiñajji nijje ejjapeequi'yojji nisho besa'yo sa poani pea'ai. Huaniya oya cuana ba majje tecuea canaje. Jama acanaje ba'a: —Miya peyo jama, jjadasiaquiani. ¿Aya acuae mi huohui canaje? Jama ba'a: “¡Eyacuiñajjijo besa meecue! Jamajjeya ojaya miquianaya enapa'yojji pojjeama”. ⁸Chojja. ¡Quea pame tii oe ba'e'yocue! ¡Mimishi cuana oe pajea'yocue; a'a quea jjashahuabaqui tai po o'oyajji! Jamajjeya miya Eyacuiñajjija enapajji pojjeama. ⁹A'a jjashahuabaquijji jama ba'a: “Amajama ecuanaja etiquiana. Oya quea pame nee poanaje. Ecuana Amajamaja bacua poanijojo, Eyacuiñajjija enapajji pojjeama”. Chojja de. Miquiana Amajamaja bacua quea mimishi poanijo, Eyacuiñajjija cajaa mi acaje'yo. E'e de, ohuaya pea Amajamaja bacua jayojja epojji pana caje'yo pojja'a mei, meshi pojja'a —Huaniya acanaje.

¹⁰—Jama ba'a: Acui tai sajja jajacajja caje'yo cuaqui cabojjiya. Ejjajja chamajo acui cajaa acaje'yo. Jajajea'yo majje dahuajea caje'yo. Dejja mimishi acui tai jayojja jama acaje'yo Eyacuiñajjija; cuaqui yasijje jea caje'yo. ¹¹Eyaya miquianaya Eyacuiñajjijo besa meeje'yo enajo, ca mique mimishi cuana epajea'yojo. Quijje

pishana poeje Quito. Ohuaya mi que Eyacuiñajjija Edojjoshahua Pame dobiqumee caje'yo. Jamajjeya miya quea pame poaje'yo. Mimishi cuana pajea sa po'yo ajjajo ca ca jeajea caje'yo cuaqui yasijje. Jamaya pea'ai ba'a: Quito oe nei quea ca'a nee nee nequi. Eya ca ñña quea ca'a pishana nequi. Jamajjeya eya ca ñña onijje nequi sa po ajja miquiana que cojja. Quea bicho. ¹²Dejjaa oja tepeya shaa dojo mee majje anoso iya ca'yani equijo; eshaa dahuajea cani. Jiquio ecua anoso shaa dojo mee cani jama eseya acaje'yo Eyacuiñajjiya. Joya quea pame nee ba'yani jaahuana caje'yo tii. Mimishi cuana ca ca quiojea canequije'yo tii tii.

Huaniya Jesosa Eyacuiñajjijo besa mee canaje
(*Macoso 1.9-11; Noca 3.21-22*)

¹³Majoya Jesosa Janinea meshi yobijo ani macua huasijje po'oquequinaje Jodana cuei yasijje Huani que. Jesosaa Huani ba majje jama acanaje ba'a: —Huani, ¡eya besa meecue Eyacuiñajjijo, miyaya!

¹⁴—Chojja, Emeshi Mese —Huani poanaje—. ¡Miyaya eya besa meecue Eyacuiñajjijo, miya quea pame nee neejo! ¿Yajjaje miya e que poe'yonaje? Eya ca ca ñña quea pame pishana, de.

¹⁵—¡Eyaya huohuaña jama miyaya a'yocue! ¡Jamajjeya Eyacuiñajjija ehuhui'yo ejo acue! —Jesosa poanaje.

Jamajjeya Huaniya Jesosa besa mee canaje Eyacuiñajjijo. ¹⁶Huaniya Jesosa besa mee majje jjequicuaya ca'yajje, ba canaje eyatahuatahua ca'apejo canaje. Eyacuiñajjija Edojjoshahua Pame huia' jama o sapa biajje cuabesa ba'enaje. Ecapashinei ba'eoquenaje. ¹⁷Eyacuiñajjiya oja Bacua Ejja jama acanaje ba'a: —Miya ecue Bacua Ejja quea jea nee nee. Eya mijo quea bhui nee nee poani.

Jesosa quea mimishi po mee sa acanaje Edosiquiaa
(*Macoso 1.12-13; Noca 4.1-13*)

4 ¹Jjeyahua nei Edojjoshahua Pameya Jesosa quima huasijje meshi jabo huasijje huoojea canaje. Majoya Edosiquiaa Jesosa quea mimishi po mee sa acanaje. ²Jesosa jomajo nequinaje peaja ejiojji cahui huisome, 40 cahuime. Mahuiso epojja, mecajje pea'ai nequinaje quimajo bobima' nei nei. Majoya quea shoe poanaje. ³Majoya aje Edosiquiana poeyanaje Jesosa que; miminequinaje jama ba'a: —Miya Eyacuiñajjija Bacua Ejja jjabaqui majje ¡miyaya jiquio mei cuana pahui jayojja acue, miquea e'ijji! ¡

⁴—Chojja de. ¡Bacue Eyacuiñajjija esohui etehue'yo! Jama poani ba'a: “Dejja cuana bobijo ca'a po majje pojjeama ba'e tiitiije'yo. Ojjaña Eyacuiñajjija esohui jayojja jama añajo ca se ca quea pame nee ba'e tiitiije'yo”.

Jamaya aca poa —jamaya Jesosa poanaje.

⁵Majoya Edosiquiaa Jesosa dojo canaje Jenosanena huasijje. Jomajo Eyacuiñajjija equi quea ao nee nee yasijje nequisohuaqui mee canaje; equi jamacoo biajje nequi mee canaje. Jama acanaje ba'a: ⁶—Miya

Eyacuiñajjija Bacua Ejja jjabaqui majje ¡tohuaacue meshi yasijje!
Jamajjeya Eyacuiñajjija esohui jama etehue'yo jaa ba'a:

“Eyacuiñajjija esohuidojojji cuana huoojea caje mi yasijje, mi
jaahuanaa. Oquequiajo ojaya emeya miya iñajjequisohua caje'yo,
ohuaya. Jamajjeya miya ejjajiojji quecuasajaqui jjima poaje meijo”.

⁷Jesosa onijje miminaje jama ba'a: —Chojja. Yahuajo jama
Eyacuiñajjija esohui etehue'yo pea'ai ba'a:

“A'a jama ajji ba'a: —¿A'a e'e jojo nei Eyacuiñajjija oja sohui acaje'yo pojja'a?
¿A'a eya Eyacuiñajjija jaahuana nei caje'yo? ¡Caba'ajjasahua! —a'a pojji”.

Jamaya yahuajo nei Moisesiya tehue ca poa —Jesosaa acanaje.

⁸Majoya Edosiquiaa Jesosa dojosohuaqui canaje eyiyo ao huasijje. O
shajja'ajjajji nisho jamaya Edosiquiaa Jesosa huohui canaje: —¡Bacue
ojjaña meshi cuana, emeshi mese cuana pea'ai, cuiñajji cuana, aquiana
quea nahue cuana pea'ai! Ojjaña quea pame nee nee. ⁹Ojjaña jiquio
aquiana cuana, dejja cuana pea'ai miquea poaje'yo; miya Emeshi
Mese nei nei eyaya po meeje'yo jjeya nei ca miyaya eya bihuia'yajo
ecui'oshajjajo nequi majje —jama siajje ameya acanaje Edosiquiaa Jesosa.

¹⁰Jamajjeya Jesosaa jama huoojeajeame acanaje ba'a: —¡Chojja
Edosiquiana! Eyaya miya bihuia ajja, de. ¡Poquicue miya! Jamaya
Eyacuiñajjija esohui etehue'yo yahuajo pea'ai ba'a:

“¡Eyacuiñajji oe nei bihuiaacue! Oya oe nei ojjañaja Emeshi Mese nei
nequi. ¡Ojaya esohui jama oe acue!”

¹¹Jamajjeya Jesosaa huoojea cajje Edosiquiana, Satanasa poqui'yonaje.
Majoya Eyacuiñajjija esohuidojojji cuana quea huiso poeyanaje Jesosa
jaahuanaa, bobiaa pea'ai.

Jesosaa esohui huohui canaje Janinea meshijo

(*Macoso 1.14-15; Noca 4.14-15*)

¹²Quijje pea cuaa Huani, ma ona besameejji poa jeanobiajea canaje.
Shajja'ajja majje Jesosa posohuaqui o'oyanaje oja meshi yasijje,
Janinea meshi yasijje. ¹³Oya nequiñaqui jjima Nasanenajo. Pea cuiñajji
yasijje, Capenaoma huasijje poquinaje ba'eya. Janinea bae sahuajo,
Samononi meshi, Netani meshi pea'ai pejeje ba'enaje. ¹⁴Yahuajo nei nei
Eyacuiñajjija esohui huohuijjiya Isaiaa huohui ca poa jama ba'a:

¹⁵⁻¹⁶ “Ojjaña cuana quea mimishijo, esohui ba jjimajo quea apo ba'yani.

Eyacuiñajji ba majje oya cuana quea ja'a nee ba'e mee caje'yo.

Eyacuiñajji ojaya ba jjimajo quea yeno nee ba'yani. Jjeya ca ca quea
jaji nee ba'e mee caje'yo. E'e, Samononi meshijo, Netani meshi pea'aijo,
Janinea bae sahuajo ba'eca cuana, Cueji Pashi ma Jodana cuei bajjani
sahuajo, ojje ba'eca cuana, Janinea meshijo, pea bajjani Ese Ejja
sohujjo ba'a: Eyacuiñajji ba po jjimaja meshijo ba'eca cuana pea'ai quea
mimishi poanaje. Jjeya ca ca quea ja'a nee ba'e mee caje'yo”.

Jamaya Isaiaa huohui ca poa yahuaño nei nei Jesusaja epoejjijo.

¹⁷Majoya Jesusaa esohui huohui canaje jama ba'a: —Jjeyahua nei Eyacuiñajji miquea Emeshi Mese nei poeje. Jamajjeya ¡miquea mimishijo quea yeno pocue! ¡Mimishi cuana pajea'yocue miqiaaaya! —acanaje.

Jesosaa nahuoo cuiashajajji iyaa canaje onijje epo'yojji

(Macoso 1.16-20; Noca 5.1-11)

¹⁸Majoya Jesosa poquinaje Janinea bae sahua huasijje. Jomajo ohuaya Anesi, Anesija o'i Peno bajjani, ma Simohui pea'ai bajjani ba canaje. Oya cuana nahuoo cuiashajajji nei nei bajjo. Nahuoo cuiashaja cani. ¹⁹Jesosaa oya cuana iyaa canaje: —¡Enijje po'yocue! Eyaya miya dejja cuana jjequi meesahua'yojji aje'yo e que.

²⁰Jjeyahua nei nei oya cuana ojaya eshajajji cuana jeana'yo majje onijje poqui'yonaje.

²¹Majoya Jesusaa poqui pishana majje pea cuana ba canaje. Semeneoja bacua ejja Jacobo ba canaje ojaya echahua mese nijje, Huani nijje. Bishe aijo eshajajji je'e'yo po'ani ba canaje. Jjeyahua nei Jesusaa oya cuana iyaa canaje. ²²Jamajjeya Jesusaa iyaa cajje oja chii Semeneo bishejo ani tii jiña ca'ya poa cuaa Jesosa nijje epoqui'yojji.

Jesosaa pea esohui huohui canaje emanojaa cuana huaquia mee ca'yonaje

(Noca 6.17-19)

²³Jesosa poquinaje ojjaña cuiñajji cuana huasijje Janinea meshijo. Jodio dejja cuanaja equi ojee ejjachichaquijji yasijje dobiquinaje esohui huohuiya. Jama poanaje ba'a: —Eya ojjañaja Emeshi Mese poaje'yo.

Ohuaya quea huiso emanojaa cuana jjaajaqui mee ca'yonaje, huaquia mee ca'yonaje pea'ai. ²⁴Quea huiso Sinia meshijo ba'eca cuaa Jesusaa huaquia mee ca'yoqui shajja'ajja canaje pea'ai. Jamajjeya o que jjequi canaje quea huiso emanojaa cuana. E'e, ojjaña cuana quea nee poani, pea cuana niñepoqui cuana, jjequi'ihuicajaa cuana pea'ai, jiojjijajja cuana pea'ai o que jjequi canaje. Ojjaña cuana huaquia mee ca'yonaje, jjaaja meequi ca'yonaje, Jesusaa. ²⁵Jamajjeya Jesosa poquianijo, quea huiso nee nee cuana ojee poquinaje onijje. E'e, dejja cuana quea huiso nee, ponaponaña pea'ai Janinea meshijo ba'e cuana, Jenosanenajo ba'e cuana, Jodea meshijo ba'e cuana, pea Ome miji pea'ai Cuiñajjijo ba'e cuana, Cuei Cueji Pashijo Jodana cuei ojje mijijje ba'e cuana pea'ai; quea huiso nee nee Jesosa nijje poquinaje.

Jesosa eyiyojo aniya esohui huohui canaje

(Noca 6.20-23)

5 ¹Dejja quea huiso cuana ba majje Jesosa eyiyo huasijje jaasohua pishanaquinaje. ²Jomajo anioque majje ojjaña cuana sohuihuohui canaje jama ba'a: ³—¡Bacue! Beca cuana jjashahuabaquiani jama ba'a: “E'e, de, eya quea mimishi nee. ¡Eyacuiñajjiya ecuea mimishi cacuijea ca'yahua!”

Jamaya jashahuabaquianijo Eyacuiñajjiya oya ba'e tiiti mee caje'yo onijje eyajo. ¡Oya cuana quea bihui nee capo'yahua! ⁴Oja epeeji cuana mimishijo quea yeno poanijo, Eyacuiñajjiya quea bihui nee po mee caje'yo mimishi cuijea ca'yajje. ⁵Ojaya epeeji cuana quea bei poani Eyacuiñajjiya quea jea nee; onijje ba'e tiiti mee caje'yo. ¡Quea bihui nee capo'yahua oya cuana!

⁶—Ojaya epeeji cuana Eyacuiñajjiya esohui jayojja jama a sa neinei poanijo, Eyacuiñajjiya oya cuana quea jaji nee nee ba'e meesahua caje'yo. ¡Quea bihui nee capo'yahua oya cuana!

⁷—Ojaya epeeji cuana pea cuanajo jashahuabaquiani pea jaahuanajji. Jamaya poanijo pea cuaa, Eyacuiñajjiya pea'ai oya cuana jaahuana caje'yo. Tecue'ama poaje'yo ona nijje. ¡E'e jojo nei quea bihui nee capo'yahua ojaya epeeji cuana! ⁸Ojaya epeeji cuana mimishi cuana a'jjajo Eyacuiñajji nijje ba'e tiitiije'yo. ¡Quea bihui nee capo'yahua oya cuana! ⁹Ojaya epeeji cuaa pea cuana quea bei po meesahua canijo, ojjaña eba oya cuana Eyacuiñajjiya bacua cuana e'e jojo nei; quea pame nee. ¹⁰Ojaya epeeji cuana quea ja'a nee ba'yanijo, onaaya oya cuana cuia caje'yo. ¡Jamatii oya cuana quea bihui nee capo'yahua! E'e, quijje eyajo oya cuana ojjaña huoojea'yojji enijje poaje'yo —Jesosa huohui canaje.

¹¹Majoya Jesosa Quitohua ojaya epeeji cuana huohui canaje jama ba'a: —Miquianaya ecuea epeeji poanijo, pea cuana minijje mimijajje; miya napa caje pea'ai, sijje poaje mijo pea'ai. Jamatii Eyacuiñajjiya miquianaya quea bihui nee po mee caje'yo. Eyajo onijje ba'e tiiti mee caje'yo. ¹²E'e, Eyacuiñajjiya esohui huohuiji yahuaajo nei nei ba'ya poa cuana jamaya aca poa mimishi cuaa; napa ca poa pea'ai. Jamajjeya jona jayojja jama pocue, quea bei! Eyacuiñajjiya miquianaya ojee ba'e mee caje'yo tiiti eyajo quea bihui nee nee —Jesosa huohui canaje.

Ae jayojja Eyacuiñajjiya epeeji (*Macoso 9.50; Noca 14.34-35*)

¹³—Ecuea esohui jayojja jama añajo, pea cuana mi jayojja jama ba'eje quea pame nee pea'ai. Jamajjeya miya sane jama, mei sese jama. Mei seseya shicui cajje bobi ihui'yo ajja poani. Jamatii mei sese sese'ama poa joggemo ¿a'a quea sese po meeje o'oya? Chojja. Sese'amajo quea huesha jeajea'aña seya. Jiquio ecua sane sese'ama jeajea'aña seya jama miya ecuea esohui jama po ajjajo, cajaa achana' eyaya.

¹⁴—Enijje jjapeequianijo miquianaya cuaquijji jama. Cuiñajji emaco ao'aojo nequi ba caje cuaa quea huesha nee mecajje pea'ai. Jiquio ecua emacojo nequia jama ecuea epeejiya pea cuana Eyacuiñajji ba meesahua caje'yo enijje jjapeequianiya jjejojo. ¹⁵Cuaquijji sisi capaca ajja. Chojja. Cuaquijji sisi nequia cajji acui biajje, ojjaña equijo ani cuana jeaja'ajji. ¹⁶¡Jiquio ecua cuaquijjiya ojjaña equijo ani jeaja'a cani jayojja jama quea pame nee ba'ecue! Jamajjeya miquianaya quea pame ba majje pea cuanaa Eyacuiñajji, esejaya Chii eyajo bihuia caje'yo —Jesosa poanaje.

Moisesija esohui etehue'yo quea pame nee

¹⁷Jesosa pea esohui huohui canaje jama ba'a: —Eyaya Moisesija esohui yahuajo etehue'yo cajaa a'ajja. Eyacuiñajjija esohui huohuijji cuanaja esohui yahuajo nei eyaya cajaa a'ajja pea'ai. Cho. Eya poeyanaje onajaya esohui jama a'yohua. E'e, oya cuaa yahuajo nei nei ejo huohui ca poa. Jjeya eyaya onajaya esohui jayojja jama aje'yo. ¹⁸E'e jojo nei ojjaña Moisesija esohui cuana cajaa pojjeama poaje'yo. Ojaya esohui biso nei pea'ai cajaa pojjeama poaje'yo. Quea pame nee ani titiije'yo. Jamajjeya ojjaña ojaya esohui yahuajo nei nei etehue'yo jama aje'yo. Ojjaña apoa ajeyo'yo majje ecuea echacojji jiquio meshijo apoa poaje'yo. ¹⁹Jamajjeya joya Moisesija esohui etehue'yo jama ba'e sa po ajjajo, oja sohui jama pojjeama huohui cajo, enijje ba'e meeme ajja quijje eya ojjañaja Emeshi Mese nei poajo. Joya Moisesija etehue'yo jama acani, oja sohui jama huohui cani pea'ai ca ca enijje ba'e'yo quijje eya ojjañaja Emeshi Mese oe nei poajo. ²⁰¡Bacue! Moisesija etehue'yo huohuijji poani, Jodioja esohui huohuijji Paniseo bajjani cuana pea'aiya quea pame nee huohui ajja; quea pame ba'e ajja pea'ai. Jamajjeya miquiana ona jama ba'yajo, ona jama huohuijji pea'ai miquianaya ba'e ajja enijje quijje eya ojjañaja Emeshi Mese nei poajo —Jesosa poanaje.

Moisesija etehue'yo yahuajo nei quea pame pishana Jesosaja ehuohui'yo quea pame nee nee (Noca 12.57-59)

²¹—Miquea eba Moisesija etehue'yo yahuajo jama ba'a: “¡A'a pea quecuajji!” Jamajjeya pea quecuajji epo dojo caje'yo cuaa emeshi meseja dejja huoojeajji yasijje. ²²¡Jjeya ecuea esohui eyacua shajja'ajjacue oe! Ojjaña joya pea nijje quea quene nee nee poani aje oe emeshi mese yasijje poquijje. Quea tecue poaje emeshi mese onijje. Joya pea nijje mimijajiao, “miya cajaa” acajo, cadojo cahua emeshi meseja esohui huohuijji cuana huasijje jjabahuejjaqui meeya. Joya pea nijje panajaji neineiyajo, cajaa nei nei acajo pea'ai cuaqui yasijje huoojea ca chana' pea'ai —Jesosa poanaje.

²³—E'e pojja'a miya Eyacuiñajjija equi yasijje poquiani aquiana quia'yohua Eyacuiñajji bihuiajji. Ma aquiana quia'yo jjimahuajo ¡jjashahuabaquicue miquea epeejjijo! ¿A'a miquea epeejji quea yeno poani minijje miya quea tai añajo? ²⁴¡Jamajjeya miquea epeejji yasijje poquicue! ¡Onijje mimiquicue! ¡Quea bei minijje po mee o'oyacue! ¡Majoya miquea aquiana quiaquicue Eyacuiñajji bihuiajji! —Jesosa poanaje.

²⁵—¡Pea cuana quea quene minijje poajo o que poquicujacue! ¡Quea bei po mee o'oyacue jjeya nei! Ohuaya miya dojo ca chana' emeshi mese yasijje, napa meeya. Emeshi meseya miya huoojea ca chana' sohuinano huasijje. Sohuinanohua miya equi ejjajejanobiaquijji yasijje jeanobia ca chana'. ²⁶Jomajo nequi tiitii mee caje. Ma minijje quea quene nee poanaje sosequiajeyo'yo majje miya ejejanobianequi jeacuaya caje'yo, de

—Jesosa poanaje—. ¡Jiquio jayojjaya oe pocue! ¡Jamajjeya Eyacuiñajji nijje jjapeequicuaajicue mano'yo jjimahua, cuaqui yasijje jeajea jjimahua!

¡A'a jjashahuabaquijji pea eponajo!

27—Cuanaya miquea eba Moisesija etehue'yo jama ba'a: “¡A'a pea cojjojji pojji!” 28. Jjeya ecuea esohui eyacua shajja'ajjacue jama ba'a: Dejja pea eponajo jjashahuabaquianijo oya pea cojjojji epojji jayojja jama poani, ojaya ejjashahuabaqui'yojjijo; quea mimishi poani. 29. Jamajjeya ja'a quea mimishi pojji! Miya quea mimishi poani epona, aquiana pojja'a baqui majje ¡maya bapajea'yocue! Jea ba majje mimishi po majamajañajo cuaqui yasijje dobiquije'yo tii. Jamajjeya ja'a jea bajji! 30. Pea'ai miya quea mimishi poani aquiana emeya napañajo ja'a aquiana napajji! Quea mimishi po chana'; cuaqui yasijje dobiqui'yo chana'. Jamajjeya ja'a onaja aquiana napajji! Sii chanaya —Jesosa poanaje.

Esuhui ehuanase huei canijo

(Mateo 19.9; Macoso 10.11-12; Noca 16.18)

31—Moisesija etehue'yo jama poa pea'ai ba'a: “Dejjaa ojaya ehuanase cajaa acajo, huei canijo ¡esohui catehue cahua ehueijji!” 32. ¡Ecuea esohui eyacua shajja'ajjacue! ¡A'a miquea ehuanase pea dejjaja sii jjima hueijji! Epona quea pame ba'e huei'yo majje pea dejja nijje jjahueaquiajo, yahue ebionei eshe nequijo, quea mimishi po mee cani ebionei yahueya. Oya eshe enequijojo oja yahue eyacua quea mimishi poani pea'ai —Jesosa poanaje.

33—Moisesija etehue'yo jama poa pea'ai ba'a:

“Miyaya huohuiaña jama ba'a: —Eyacuiñajjiya eya shajja'ajja canijo, e'e jojo nei eyaya ecuea esohui jama aje'yo. ¡Jamaya mimi majje miquea esohui jama acue; a'a pajea'yojjji!” 34. ¡Jjeya ecuea esohui eyacua shajja'ajjacue! Jama ba'a: ¡A'a oe siajje pojji! ¡Pea nijje mimi majje miquea esohui jayojja jama acue! Jamajjeya pea nijje mimianijo a'a huohuijji jama ba'a: “Eyacuiñajji eshe eyajo yanijo, ecuea esohui jama eyaya aje'yo. Ecuea esohui e'e nei pojjeama jojjemo eya quea nee po mee ca'yome”. Cho. Eyajo Eyacuiñajji ejjahuojeaquijji tii tii. 35. Jamaya a'a mimijji pea'ai ba'a: “Meshi yanijo, oe po jjimajo ecuea esohui jama eyaya aje'yo. Ecuea esohui e'e nei pojjeama jojjemo meshi jjani yasijje eya mojea ca'yome”. Cho. Meshi cuana miquea pojjeama; Eyacuiñajji Emeshi Mese oe nei poani. Jamaya a'a mimijji pea'ai ba'a: “Jenosanena yanijo, oe po jjimajo ecuea esohui jama eyaya aje'yo. Ecuea esohui e'e nei pojjeama jojjemo Jenosanena cuiñajji esecue yasijje mo huoojeacuaya ca'yome”. Cho, Jenosanena miquea pojjeama; Eyacuiñajji Jenosanena Meshi Mese poani. 36. Jamajjeya a'a huohuijji miyaya: “Ecuea esohui e'e nei pojjeama jojjemo camano mee ca'yome”. Chojja. 37. Jamajjeya huohuicue jama ba'a: “E'e, eyaya jama aje'yo”. “Chojja eyaya jama a'ajja” acue —Jesosa poanaje.

Esohui dejja quea quenejo

(Noca 6.29-30)

38—Miquea eba Moisesija etehue'yo jama pea'ai ba'a: “¡Peaa cojja cuiasejjajea cajje jjasosequiaquicue; cojja cuiasejjajea pea'aicue! ¡Peaa se' cuiasajajea cajo se' cuiasajajea pea'aicue!” 39Ecuea esohui eyacua ca ca jama ba'a: Onaaya miya napa cajje ¡a'a jjashahuabaquijji onijje ejjasoseaquijji! ¡Mique shemo ebianeí mijijje cuia cajje shemo shani mijijje cuia mee o'oyacue! 40Peaa miquea daqui sa poanijo miya dojo cani dejja etii bajjani yasijje huohuiya; miquea daqui dojo cajo, jamatii ¡miquea daqui moo quiacue pea'ai! 41Dejja maseya miya ña cajje ojaya aquiana quea huesha pishana dojo mee cajo, ¡quea huesha nee dojocue, jamatii! 42Pea Ese Ejja miquea aquiana sa neinei poanijo ¡a'a quea dejja tai pojji! ¡A'a quea nishehui pojji! ¡Oya quiacue! Pea cuana miquea aquiana dojo sa poanijo ¡oe pojji cahuime dojo meecue! Minijje mimiajo: “¡Che ña jiquio dojo meecue; quijje aje jje jeahuaje'yo!” acajje; “¡E'e, dojocue!” saja'ame acue. Jamajjeya ¡ojjaña cuana nijje quea bei ba'ecue! ¡A'a o jayojjaya quea mimishi, quea tai pojji! —Jesosa poanaje.

Joya minijje quea quene nee poani quea jea acue

(Noca 6.27-28, 32-36)

43—Miquea eba etehue'yo yahuajo nei jama ba'a: “¡Miquea epeeji quea jea nee acue! Miquea epeeji pojjeama, cho. ¡Onijje quea quene pocue epeeji pojjeama jjejojo!” 44Ecuea esohui eyacua ca ca jama ba'a —Jesosa poanaje—: ¡Miquea epeeji pojjeama quea jea nee acue pea'ai! Miya Eyacuiñajjija epeeji poanijo, miya napa cajje ¡Eyacuiñajji nijje mimicue maa mi napajji poanijo! Jamajjeya e'e pojja'a oya cuana Eyacuiñajji nijje jjapeequije'yo pea'ai. 45Jamaya poanijo miquianaya Eyacuiñajji eseja Chii eyajo anija bacua cuana poani. E'e, Eyacuiñajjiya eshequi quea ja'a nee jiji mee cani dejja quea pamejo, dejja quea mimishijo pea'ai. Ohuaya ena huoojea cani dejja quea pame neeja que shepajji, dejja quea mimishija que shepajji pea'ai —Jesosa poanaje.

46—Joya mi quea jea nee ajji poani miquea quea jea nee pea'ai; minijje quea mase ca ca miquea boti'ama. Eyacuiñajjija epeeji pojjeama cuana aje oe jamaya poani pea'ai, de. Jamajjeya miya jamaya poanijo ¿a'a Eyacuiñajjiya miya bihuia caje? Cho. 47Miquianaya aje jja oe miquea epeeji cuana nijje quea bei nee mimiani, pea cuana nijje mimi ajja. ¿A'a jamaya poani ojjaña dejja cuana? E'e. Eyacuiñajjija epeeji pojjeama cuana aje oe jamaya poani pea'ai, de. 48Jamajjeya esejaya Chii eyajo quea pame nee ani. Ojjaña cuana Eyacuiñajjija quea jea nee nee. ¡Eyacuiñajji jayojjaya jama pocue quea bei nee nee! —Jesosa poanaje.

¡Quea ja'a nee jjapeequicue Eyacuiñajji nijje!

6 ¹ Jesosa poanaje pea'ai: —¿Apiojji miya Eyacuiñajjijo chachacoani pea cuaa ba canijo? E'e pojja'a jjashahuabaquiani miya bihuia caje cuaa ba majje. Onaja ebajji chachacoanijo, quijje eyajo miquea echaco ojo Eyacuiñajjija miya bihuia ajja, esosequajji pojjeama —Jesosa poanaje.

²—Aquiana aema huasijje quia'yo majje a'a mimijji jama ba'a: “¡Bacue, eya quea pame nee poani!” Chojo. Jamaya poani Eyacuiñajjija epeeji nisho cuana Eyacuiñajjija equijo, ejiojji cuanajo pea'ai. Onaaya Eyacuiñajjijo chaco cani pea cuanaja ebajji. Jamajjeya quijje eyajo Eyacuiñajjija oya ebihuijji pojjeama; ojaya echaco esosequajji pojjeama pea'ai. ³ ¡Miyaya aema huasijje aquiana cuana quehuajje quiacue! Jamajjeya ¡miquea epeeji neineija ba jjima quiacue! ⁴ Miquea Chiya eyajo aniya ca ca oe ba caje; ohuaya miya quijje sosequia caje'yo —Jesosa poanaje.

Eyacuiñajji nijje jama mimime pocue ba'a
(*Noca 11:2-4*)

⁵ Jesosaa o shajja'ajjajji cuana huohui canaje pea jama ba'a: —Eyacuiñajji nijje mimianijo ¡a'a joya ecua Eyacuiñajji nijje jjapee nishoquiani jayojja jama mimijji! Oya cuana aje oe Jodioja ojee ejjachichaquijji equijo nequiani, ojjaña ebajji miminequiani. Esecuejo ojjaña anica cojja nei pea'ai miminequiani. Eyaya miya e'e jojo nei huohuaña oya cuana miminishonequiani —Jesosa poanaje—. Jamajjeya Eyacuiñajjija epeeji nei poso ojjaña oya ba cani. Jamajjeya onaaya bihuia canaje sosejje Eyacuiñajji nijje miminisho'ananajejo quijje eyajo oya cuana enijje enequi'yojji pojjeama, Eyacuiñajjija epeeji nisho jjejojo. ⁶ ¡Miquianaya ca ca miquea equi quecuayijjijo mee nei mimi'anicue Eyacuiñajji nijje, pea cuaa eba ca poani jjejojo! ¡Eseja Chii nijje jomajo mimicue! Ohuaya miya ba cani, shajja'ajja cani; mi pejeje nequiani oya. Eseyaya emimi bame bame jayojja jama acaje'yo, eseja Chiya —Jesosa poanaje.

⁷—Pea cuana Eyacuiñajji ba jjimajo eyacuiñajji nisho nijje mimiani. Oya esohui majamaja acani. Mimi majamajani eyacuiñajji nishohua eshajja'ajja caje poso. ⁸ ¡A'a o jayojja jama pojji! Eyacuiñajji nijje mimi sa po jjimahuajo, ojaya esejaya ejjashahuabaquijji eba, de, eseja Chiya eyajo anija —Jesosa poanaje.

⁹—Jamajjeya Eyacuiñajji nijje mimianijo mimicue jama ba'a:

Eyacuiñajji, miya ecuanaja Chii quea bame nee.

Miya eyajo quea ca'a nee ani.

¡Ojjaña cuaa miya cabihuia cahua, oe nei quea ja'a nee!

¹⁰ Miya ojjaña cuanaja Emeshi Mese poani tii tii.

Eyajo miquea ejjashahuabaqui'yojji jayojja jama poani ojjaña.

¡Jamaya oe pocue ojjaña meshijo pea'ai!

¹¹ ¡Jjeya eya ba'e meesahuacue!

¹² Eya quene'ama pea cuana nijje, joya enijje quea mimishi poani nijje.

Jamajjeya ꞑecuea mimishi cuanajo a'a quea quene pojji pea'ai!

¹³ ꞑA'a eya quea mimishi po meejji!

ꞑNahue neineicue mo, Eyacuiñajji!

ꞑEdosiquianaja epeejjijo eya jaahuanacue!

E'e Eyacuiñajji, miya ojjañaja Emeshi Mese poani tii tii.

Miya oe nei quea ca'a nee enequi tii tii, quea pame nee.

ꞑOjjañaa miya cabihuia cahua tii tii!

E'e, jamaya apoa ecuea emimi.

ꞑJamaya Eyacuiñajji nijje mimicue! —Jesosa poanaje.

¹⁴—E'e, ꞑjiquio ecua eya jama ꞑjashahuabaquime oe pocue! Pea cuana nijje mimicue jama ba'a: “Miya enijje mimijajinaje quea tai. Jamatii eya miquea mimishijo quene'ama” jamaya pocue. Jamaya pea nijje mimianijo Eyacuiñajji miquea mimishijo quene'ama poaje'yo pea'ai. ¹⁵Pea nijje quea quene tii tii poanijo ca ca Eyacuiñajji eseja Chii miquea mimishijo quea quene tii tii poaje'yo pea'ai; miquea mimishi ecuijea'yojji pojjeama —Jesosa poanaje.

Eyacuiñajji nijje eseya bobima' mimi cajji ijia'ijia jjima ani majje

¹⁶—Eyacuiñajjija epeejji nisho ijia'ijia jjima mimianijo quea yeno jayojja poani, ecojja topo jjima ojjaña cuanaja ebajji. Jamajjeya ojo jama poani ba'a: “E'e, oya Eyacuiñajjija epeejji nei nei; ijia'ijia jjima mimiani Eyacuiñajji nijje, de” poani —Jesosa poanaje—. Chojja, edasia'yojji poani. Eyacuiñajjija epeejji nei poso pea cuaa acani. Jamajjeya ojjañaja ebajji oya mimiani. Quijje oya cuana enijje enequi'yojji pojjeama eyajo Eyacuiñajjija epeejji nisho jjejojo —Jesosa poanaje—. ¹⁷Miquianaya ca ca ecuea epeejji nei. Ijia'ijia jjima Eyacuiñajji nijje mimianijo ꞑa'a quea yeno jayojja pojji! ꞑA'a ꞑjadasiaquiiji jayojja jama pojji! Chojja —Jesosa poanaje—. Ijia'ijia jjima Eyacuiñajji nijje mimi huicha'a huicha'anijo ꞑjamatii eme!, ecojja pea'ai shacuacue; ehujjañaa shiyeshiyejo shacue! ¹⁸ꞑJamajjeya onaja ba jjima Eyacuiñajji nijje mimicue ijia'ijia jjima ani! Jamajjeya eseja Chiiya ohuaye nei miya ba caje, mi pejeje nequiya. Miquea emimi bame bame jayojja jama acaje, ohuaya —Jesosa poanaje.

Jesosaa eseya quijje eyajo quea huiso sosequia caje'yo, ojo

chachacoani sosejje

(Noca 12.32-34)

¹⁹—Jiquio meshijo ba'yanijo ꞑaquiana echicha'yo quea huisojo a'a quea nahue bajji! —Jesosa poanaje—. Siipojjiya miquea aquiana sii ca chana! Mojo ca chana! See'yo chana' pea'ai. ²⁰Cho. ꞑJeya Eyacuiñajjijo chachaco neineicue! E'e jojo nei ohuaya quijje miya sosequia caje'yo quea huiso nee nee eyajo. Esii'yojji pojjeama; miquianajaya poaje'yo tii, miquea eba'e'yojji eyajo. ²¹E'e, jamaya ꞑjashahuabaquijajo miquianaya quea ja'a ba'eje'yo, ecuea

ehuohui'yo jayojja jashahuabaquije eyajo eba'e'yojjijo; aquiana quea huiso yanijo ca ca miquianaya jashahuabaquije meshijo eba'ejjijo —Jesosa poanaje.

¡Quea ja'a nee ba'ecue!

(Noca 11.34-36)

22-23—Miquea ecojja quea pame nee neejo miya quea ja'a nee baje'yo echacojji; quea ja'a nee ba'eje'yo pea'ai. Cojja jamajama ca ca quea ja'a eba'ejji pojjeama. Quea apo nee nee, de, cojjama' —Jesosa poanaje—. Jiquio ecua quea cojja pame nee jayojja jama miya quea jashahuabaqui pame nee neejo quea ja'a nee ba'eje'yo Eyacuiñajjiya ejjashahuabaqui'yojji jayojja. Quea jashahuabaqui tai poanijo onaja aquiana cuana quea jea ba majje ca ca quea dejja tai ba'eje'yo, quea nishehui. Jamajjeya Eyacuiñajjiya miya tecuea caje'yo jama ba'a: “Miya ca mi ca oe quea tai nee nee ba'yani, ejo jashahuabaqui ajja” acaje'yo Eyacuiñajjiya —Jesosa poanaje.

¡A'a quea nahue, quea nishehui ba'ejji!

(Noca 16.13)

24—Cuanaya ¿a'a acuae chaco chaco cajji beca dejjaa mee'ajja cajje? Chojja. Oe echacomeejji shajja'ajja caje, quea boti acaje pea'ai. Pea echacomeejji shajja'ajja jjima acaje, boti'ama acaje pea'ai. Jamaya miquianaya aquiana cuana jashahuaba tiitiquianijo Eyacuiñajjiya echacojji pojjeama —Jesosa poanaje.

Eyacuiñajjiya oja epeejji cuana jaahuana cani

(Noca 12.22-31)

25 Jamajjeya Jesosaa huohui canaje pea jama ba'a:

—E'e jojo nei eyaya miya huohuiaña: ¡A'a quea yeno jashahuaba tiitiquijji miquea eba'ejjijo! “E'e pojja'a eya bobimajo manaje'yo, bobi yasijje poaje'yo; e'ishijji pojja'a chama' poaje'yo, quea naba taja; ecuea daqui huiñaje pojja'a, daquima' nei nei eya poaje'yo”. ¡A'a jamaya jashahuabaquijji! Eyacuiñajjiya miya eshe pana canaje, yamijji. Jamajjeya ohuaya miya bobi quia meesahua caje, daqui quia meesahua caje pea'ai. 26 E'e de, ¡bacue cuichojji cuana! Quea jaji ba'yani. Oya cuana que chaco ajja, bobi chicha ajja, equi yasijje iya ajja quijje e'ijjiya'yojji. Eseja Chiiya oya cuana jaahuana cani. Cuichojji ojaya nahue'ama; miya ca ca oe ojaya quea nahue nee nee. 27 ¡Jashahuabaquicue! ¿A'a miya quea ao nee epoaje poso jashahuaba neineiianijo miya tii aoje'yo? Chojja. Jamatii. Jamajjeya oya jayojja aquiana chama' epoaje poso ¡a'a quea mete pojji! —Jesosa poanaje.

28—¿Apiojji miya jashahuabaquiani quea yeno daquijo? ¡Bacue eshasha ebiojo tiiani! Shasha cuana chaco ajja, oja daqui cuana soco ajja. 29 Jamatii quea bame nee nee nequiani. Jodioja emeshi mese yahuajo nei nequiya Sanomo bajjaniya daqui quea nahue nee nee huosho ca poa; jamatii oja daqui quea bame pishana. Shasha ca ca quea bame nee nee. 30 E'e —Jesosa poanaje—,

Eyacuiñajjiya shasha cuana tii mee cani quea bame nee. Jjeya shasha cuana enequi; mecahuajje yaa'yani, joca'yani; dahuajea cani cuaa pojja'a, chama'yo tii poani. Jiquio ecua Eyacuiñajjiya shasha quea bame nee pohua mee cani jamaya ohuaya e'e jojo nei miya ba'e meesahua caje'yo. Miya ojaya quea boti nee nee. Miquianaya jjashahuaba taiquiani jama ba'a: "E'e pojja'a Eyacuiñajjiya eseya jaahuana jjima" jamaya miquianaya poani —Jesosa poanaje.

³¹—A'a jjashahuaba taiquiji jama ba'a: "¿A'ya cuee che ijjiaje, de? ¿A'ya cuee ishije, de, chama' ena? ¿A'ya cuee che huoshoje?" ³²Eyacuiñajjiya epeeji pojjeama cuana ojjaña aquianajo jjashahuabaquiani tii tii. Eyacuiñajjiyo jjashahuabaqui ajja. E'e jojo nei esejaya Chii eyajo ani miquea aquiana eba'e meejjiyo jjashahuabaquiani. Ohuaya miya jaahuana caje'yo —Jesosa poanaje—. ³³Jamajjeya jjashahuabaquicue tii tii jama ba'a: "Quijje Eyacuiñajji ojañaja Emeshi Mese po majje onijjeya eyaya pea cuana huoojaje'yo eyajo. ¡Ojaya esohui quea ja'a jayojja jama ca'a'yahua!" acue —Jesosa poanaje—. Jamaya jjashahuabaquianajo ohuaya miquiana huasijje aquiana eba'e meejji quia meesahua caje'yo pea'ai —Jesosa poanaje.

³⁴—Jamajjeya a'a quea yeno jjashahuabaquiji jama ba'a: "¿Aya shai ecuana jaahuana caje mecahuajje?" Miya Eyacuiñajjiya jaahuana caje'yo. Quijje quea camaja eba'ejji poaje pojja'a. Jamatiya ohuaya miya ba'e meesahua caje'yo —Jesosa poanaje.

¡A'a pea cuana niñebajji!

(Noca 6.37-38, 41-42)

7 ¹—¡A'a pea niñebajji! —Jesosa poanaje pea'ai—. Jamaya Eyacuiñajjiya boti'ama. ²Miya pea cuana niñebajji poanajo Eyacuiñajjiya miya tecuea caje'yo pea'ai. Miquiana pea nije jjabeiqui'yajo Eyacuiñajjiya miquianajaya mimishi cuijea caje'yo. Ma ecua miyaya onaya aña, jamaya miya acaje'yo Eyacuiñajjiya.

³—¿Apiojji acuae jja oe miquea epeeji tecueaña so'o ca mimijajjiya? ¿A'a miquianaaya mimishi paje'yonaje pea tecuea jjimahuajo ojaya mimishijo? Chojja, miya ca mi ca oe mimijajipaje'yo jjima pea'ai. Jamaya miya poani ba'a: Miyaya baña huenihueni shabo biso nei nei miquea epeejiya ecojjajo nequi. ¿A'a cuae jja oe miyaya miquea ecojja dojjojo nequi huenihueni shabo quea quemo baña so'o? ¡Miquea ecojjajo nequi huenihueni shabo quea quemo jja oe huijjeajea meecue! ⁴⁻⁵A'a jiquio jama mimijji ba'a: "Epeeji, huenihueni shabo biso neiya mi cojja dobi canaje. Ache ba'ajja cahuijjea'ajja'yo sahua, de shabo biso nei". Chojja. Shabo quea quemo nee miquea ecojjajo nequi, miya quea cojja shojo poanajo ca jje ca ebajji pojjeama. Miya ca mi ca oe ma shabo miquea ecojjajo nequi ¡ebionei huijjeajea mee'yo socue! ¡Majoya shabo biso nei nei miquea epeejiya ecojjajo nequi huijjeajea'yoque! —Jesosa poanaje.

⁶—Miquea aquiana quea nahue nee nee ¿a'a quiaña inahuehua huasijje, cuichi yasijje pea'ai? Aquiana nahue quishipasha caje'yo, de. Oya cuana

quea mase; ijija ca chana' mi. Jamaya poani dejja jashajja'ajjaqui ajja nei nei; quea mase ñahuehua jama, cuichi jama. Jamajjeya ÿona huasijje Eyacuiñajjija esohui quea pame nee a'a huohui tiitijji! —Jesosaa acanaje.

¡Eyacuiñajji nijje mimi neineicue! Ohuaya miya shajja'ajja caje
(Noca 11.9-13; 6.31)

⁷Jesosa jama poanaje pea'ai ba'a: —Jama acue ba'a: ¡Mimi neineicue Eyacuiñajji nijje! Onijje mimianijo ohuaya miya jaahuana caje'yo. Cuanaya aquiana chama' ba majje sa'ajja neineaña ¡jama mimi neineimeya pocue Eyacuiñajji nijje! Ohuaya miya shajja'ajja caje'yo. Cuanaya esecuejo nequiya miyaya taaña miquea epeeji nijje emimijji. Esecuejo nequi taa tiitii nequiani jayojjaya ¡Eyacuiñajji nijje mimi majamajacue! Ohuaya miquea esohui jayojja jama acaje'yo. ⁸E'e jojo nei onijje mimianijo Eyacuiñajjija jaahuana caje'yo; o sa neinei poanijo ohuaya miya saja'a caje'yo. Esecuejo taa nequi jayojja jama pocue; ohuaya miya saja'a caje'yo —Jesosa poanaje.

⁹—Ebacua ejja oja chii nijje jama mimime poajo ba'a: “Ecue chii, ¡che mo oe pahui quiacue e'ijji'ajji!” acajo, ¿a'a oja chiiya mei quia caje? Chojja. ¹⁰“Ecue chii, ¡che mo oe jai quiacue e'ijji'ajji!” acajo, ¿a'a oja chiiya peyo quia caje'yo? Chojja. ¹¹Jamajjeya miquianaaya, jamatii quea mimishi jashahuabaquianiya miquianajaya bacua cuana jaahuanaña. Jamajjeya esejaya Chii eyajo aniya miya jaahuana caje'yo e'e jojo nei onijje mimianijo. Oya ca ca oe quea pame nee nee enequi tii tii —Jesosa poanaje.

¹²—Miya mimiani pea nijje jama ba'a: “¡Enijje quea pame nee po tiitii'yocue!” Jamajjeya ¡pea cuana nijje quea pame nee po tiitii'yocue! E'e, jamaya yahuajo Moisesija esohui etehue'yo poa. Jamaya Eyacuiñajjija esohui huohuijji yahuajo nei ba'ya poa pea'ai —Jesosa poanaje.

Beca ejiojji
(Noca 13.24)

¹³⁻¹⁴Jesosaa huohui canaje pea jama ba'a: —¡Esecue biso neijje dobiecuel ¡Ejiojji biso neijje poquicue, ma eyahuasijje epoquijji ejiojjijje! Jomajo ba'e tiitijje'yo eseya. Eyacuiñajjija esohui ejiojji pame jayojja. Eya ejiojji esecue jayojja pea'ai poani —Jesosa poanaje—. Oe pojji cuana Eyacuiñajjija ejiojjijje poquiani, de. Pea esecue ejiojji ai'aijje epoquijji. Ma ejiojji ai'aijje poqui majje cuaqui yasijje poquije'yo. Jamajje quea huiso poquiani ejiojji ai'aijje, de —Jesosa poanaje.

Esohui huohuijji nisho, siajjepojji
(Noca 6.43-44)

¹⁵Jesosa jama poanaje pea'ai ba'a: —¡Esohui huohuijji nishoja esohui a'a shajja'ajjajji! Dasia ca chana' mi. Mi que poeje japee nishoquiya. Oya cuana quea bei jayojja poe'ani. Cho, quea bei pojjeama. Aquiana quea mase jama poani oya

cuana. ¹⁶¡Quea mimishi poanijo bahuejjacue oya cuana esohui huohuijji nisho! ¿A'a acuae acuisa jjonajo acuijjajja quea pame ba'yani? Cho. ¿A'a shaponajo acuijjajja quea pame chicha cani? Cho. ¹⁷Jamaya esejaya eba ba'a: Acui quea pamejo acuijjajja quea bame. Acui quea taijo ejjajja quea tai poaje. ¹⁸Acui quea pamejo acuijjajja quea tai pojjeama ba'yani. Acui quea taijo ejjajja quea bame pojjeama ba'yani. ¹⁹Acui taijo ejjajja quea tai poani. Jamajjeya jajajeaña seya, dahuajea'yaña seya. ²⁰Acui eseya baje ejjajja ba majje. Acui quea tai ba majje esejaya eba acui quea tai. Jama jayojja esohui huohuijji quea mimishi ba majje eseyaya oya esohui huohuijji nisho bahuejjaje —Jesosa poanaje.

Jesosa shajja'ajjajji e'e jojo nei
(Noca 13.25-27)

²¹—Quea huiso dejja cuana huohui cani jama ba'a: “Jesosa Quito, miya ecuanaja Emeshi Mese e'e jojo nei”. Chojja, beca cuana sijje poani. Ecue Chii eyajo anija ejjashahuabaqui'yojji jayojja jama po ajja. Jamajjeya oya cuana ecue Chii eyajo ani yasijje poqui'yo ajja. Pea cuana e'e jojo nei ecue Chiija ejjashahuabaqui'yojji jama poani. Oya cuana poquije'yo ecue Chii eyajo ani yasijje, ojaya Emeshi Mese nei yasijje. ²²Quijje e poe o'oyajo quea huiso cuana sijje poaje enijje jama ba'a: “Ecuea Emeshi Mese, Eyacuiñajjiya eya huoojea canaje miquea esohui huohuiya. Ohuaya eya eshahua huoojeacuayajea meesahua ca'yonaje. Ohuaya eya ameesahua canaje ma dejjaa ajjima acani”. Quijje jiquio jayojja jama acaje'yo sijjepojjiya. ²³Majoya eyaya oya cuana tecuea neineije'yo jama ba'a: “Chojja. Miquianaya enijje jjapeequi'yo jjima. ¡Miña ca oe poquicue quea huesha nee! Quea mimishi, quea mimijjequijea ca miña” aje'yo —Jesosa poanaje.

Equi iyajji jama Jesosaja epeeji cuana quea jjashahuabaqui ja'a nee
(Macoso 1.22; Noca 6.47-49)

²⁴—Joya beca cuaa ecuea esohui shajja'ajja majje jamaya acaje'yo. Ojaya ejjashahuabaqui'yojji quea pame nee. Jamajjeya jiquio ecua equi quea ca'a emacojo iyaña jayojja jama jjashahuabaquime oya poani. ²⁵Ena quea quemo poajo, jjayahuequiyajo beni quea quemohua equi jeaquena cani. Jamatii equi quea ca'a emacojo ani; jaabicha jjima acani. ²⁶Pea cuaa ecuea esohui shajja'ajja ajja. Ecuea esohui jayojja jama a'ajja pea'ai. Oya cuana quea jjashahuabaqui quehua jayojja jama poani, equi quea quemo iya cani meshijajji jama. ²⁷Ena quea quemo poajo ohua caje. Beni quea quemohua po majje equi janobajjima nei jeabichajea caje'yo —Jesosa poanaje.

²⁸Jesosaa eyiyo quibojo esohui huohui ca poa. Apoa po majje dejja quea huiso cuana shajja'ajja majje jama poanaje ba'a: —E'e de, Jesosaa esohui quea ja'a nee nee huohui cani. ²⁹Ohuaya huohui cani emeshi mese jayojja jamaa, Moisesija esohui etehue'yo huohuijji jayojja jama pojjeama, de —poanaje ojjaña cuana.

**Dejja batata epo'yo, ma dejjaa shicui jjima acani jjajea meequi
ca'yonaje Jesusaa**

(Macoso 1.40-45; Noca 5.12-16)

8 ¹Majoya Jesosa eyiyo biajje ani esohui huohuipajea majje jaoque'yonaje. Quea huiso dejja cuana poquinaje onijje. ²Oe dejja quea mano nee, batata epo'yo poeyanaje Jesosa que. Ecui'oshajjajo nequinaje o bihuijji. Jama poanaje ba'a: —Jesosa, ecuea eba miya ona jjajeaqui mee'yojji nei nei poani. Jamajjeya miyaya eya jjajeaqui mee'yo sa amajje imo che jjajeaqui mee'yocue!

³Jesosaa ma dejja napa'ajja canaje emeya. Jama miminaje onijje ba'a: —E'e, eyaya miya jjajeaqui mee'yo sa aña. ¡Jjajeaqui'yocue miya! Jjajeaquinana'yonaje jjeya nei. ⁴Jamajjeya Jesusaa oya huohui canaje: —¡Shajja'ajjacue mo! Eyaya miya jjajeaqui mee'yonaje. Jamatii ¡a'a jjeya pea cuana huohuijji! ¡Poquicuaicue Jenosanena huasijje, Eyacuiñajjija equi yasijje, Eyacuiñajji nijje mimiani yasijje! Oya huohuicue miyaya: “Eya huaquia'yonaje, jjajeaqui'yonaje mo” acue. ¡Moisesija esohui jayojja jama oe pocue pea'ai! Miya ehuaquia'yohua jjejojya ¡Eyacuiñajji nijje mimiani yasijje beca huia' quiaquicue Eyacuiñajji bihuijji! Jamajjeya ojjaña ba caje miya e'e jojo nei ejjajeaqui'yo —oya acanaje Jesusaa.

Jesosaa sohuinano huoojeajji poanija echacojji huaquia mee ca'yonaje
(Noca 7.1-10)

⁵Quijje Jesosa Capenaoma huasijje poqui'yonaje. Jomajo oe dejja sohuinano quea huiso nee, 100 huoojeajji poani Jesosa que poeyanaje. Oya pea, Jodio dejja pojjeama. ⁶Ohuaya Jesosa huohui neinei canaje jama ba'a: —Jesosa, ecuea epeeji, ¡shajja'ajjacue mo che! Ecuea echacojji poani quea mano nee nee ecuea equijo jaa. Jeo'yo ajja poanaje. Quea yami nee nee jaa —poanaje.

⁷Jesosaa oya saja'a canaje jama ba'a: —E'e, eya poquije miquea equi yasijje miquea echacojji poani huaquia mee'yohua.

⁸—Chojja, Jesosa —sohuinano huoojeajji poanaje—. Miya Jodio dejja quea pame nee nee poanijo ¿apiojji ecuea equi yasijje dobiquije? Eya Jodio pojjeama; quea pame pojjeama. Miya jjahuaquiameequi'yojji nei nei. Jamajjeya ecuea echacojji quea huesha jaa. ¡Miyaya jiquiojo tii nequiya huohuicue! ¡Huaquia mee'yocue! ⁹E'e, jamaya poani ba'a: Pea emeshi mese cuaa eya huoojea cani. Ojaya esohui jama eyaya aña. Pea'ai eyaya sohuinano cuana huoojeaña. Eya huoojeajje poquije. Eya iyaajje pea sohuinano poeje. Eya huohuijje ecuea echacojji chacochoje ejo. Jamajjeya miya huohuijje ecuea echacojji jjaajaquije'yo, de.

¹⁰Shajja'ajja majje Jesosa quea bihui nee nee poanaje. Ojjaña cuana huohui canaje: —¡Shajja'ajjacue! Jiquio dejja Jodio pojjeama. Jamatii Eyacuiñajji nijje jjapeequiani e'e jojo nei. Miya ca mi ca oe, oe pojji jjashahuabaquiani Eyacuiñajjijo. ¹¹E'e de, quea huiso dejja cuana Jodio

pojjeama ojjaña meshijo ba'e enijje jjapeequije'yo. Eyajo eya Emeshi Mese oe nei poaje, oya cuana ojee ijia'ijjiaje Jodio etiquiana cuana nijje, Amajama nijje, Isaaca nijje, Jacobo pea'ai nijje. ¹²Beca Jodio cuana ca ca jjashajja'ajjaqui ajja jjejojo enijje eba'ejji pojjeama. Eyacuiñajjiya oya cuana jeacuayajea caje'yo quea misi nee yasijje. Jomajo pa neineije'yo. Quea yenohua jjejojo ese' ijjiayaijea caje'yo —Jesosa poanaje.

¹³Jamajjeya sohuinano huooejji acanaje: —¡Poquicue miya miquea equi yasijje! Miquea eba eya ejjaajaquimee'yojji nei nei. Jamajjeya eyaya miquea echacojji jjaajaqui meeje'yo.

Jesosa mimianijo tii sohuinanoja echacojji jjaajacuajiqui'yonaje.

Quea huiso cuana huaquia mee ca'yonaje Jesosaa

(Macoso 1.29-34; Noca 4.38-41)

¹⁴Majoya Jesosa poquinaje Penoja equi yasijje. Penoja ano ba canaje quea quiyo nee nee jaa. ¹⁵Emanojaa me' napa cajje jjaajaqui'yonaje. Boe canana'yonaje. Jamajjeya anisohua'yo majje Jesosa, pea cuana pea'ai bobia canaje, Penoja anohua.

¹⁶Majoya aje oe sinecua dejja cuaa quea huiso niñepoqui cuana Jesosa que ye canaje. Jesosaa eshahua cuana huoojeacuayajea ca'yonaje: —¡Cuayaqui'yocue, oe! —poanaje.

Jesosa mimi jeahuajo, o niñepoqui po meejji poani cuayaquinananaje. Ojjaña emanojaa cuana jjaajaqui mee ca'yonaje, huaquia mee ca'yonaje pea'ai, Jesosaa. ¹⁷Jamaya poanijo Jesosa Isaiaja esohui yahuajo nei jayojja jama aca'yonaje. Isaia Eyacuiñajji esohui huohuijji yahuajo nei nei Jesosa Quitojo jama poa ba'a:

“Ohuaya ecuana quea mano poanijo, quea nee pea'ai poanijo, quea jaji nee po mee ca'yonaje; huaquia mee ca'yonaje”.

Isaiaa jamaya aca poa yahuajo nei nei Jesosa Quitojo.

Beca cuana Jesosa nijje poqui sa poani

(Noca 9.57-62)

¹⁸Pea pojajajo quea huiso dejja cuana Jesosa que jjachichaquinaje. Poqui sa poanijo Jesosaa ojaya epeejji cuana huohui canaje: —Cua'a ¡bae ojje miji yasijje besapoquicue!

¹⁹Poqui jjimahuajo oe dejja Jesosa que poeyanaje, Moisesija etehue'yo huohuijji poani. Ohuaya Jesosa huohui neinei canaje: —Miya esohui huohuijji quea pame nee. Eya miquea epeejji nei poaje'yo. Minijje tii eya po'ayequi sa poani —poanaje.

²⁰Jesosaa oya saja'a canaje jama ba'a: —E'le pojja'a, de. Eya ojjaña cuanaja Edoe Mese poani. Jamatii ecuea equi chama' ejomishocajji, de. Samao ca ca oja jjanijo cahuijaa. Cuichoiji cuana pea'ai oja ejajo cahuiani. Jiquiojo ecuea equi chama'.

²¹Majoya Jesosaja pea epeejji poeyanaje o que. Ohuaya Jesosa huohui canaje: —Ecuea esohui huohuijji, eya ecue chii cuiña poaje so'o. Oya etii nei nei. Quijje oya mano'yajo ohuajaje'yo. Majoya aje mo oe minijje poquije'yo chacochohua.

22—Chojja —Jesosaa oya saja'a canaje—. Pea cuaa, Eyacuiñajjija epeeji pojjeama cuaa mique chii cacuiña cahua; ohuaya camojea cahua mano'yajo. ¡Jjeyahua nei enijje po'yocue!

Beni pajji

(Macoso 4.35-41; Noca 8.22-25)

23Majoya Jesosa bishe ai yasijje nequisohuaqui majje ojje besapoquinaje. O shajja'ajjaji cuana nijje besapoquinaje. 24O besapoquianijo beni quea quemo nee nee poeyanaje. Enashajohua bishe nanejea canaje. Jeasohuajea canaje. Bishe ai yiyedojojo Jesosa cahuijaanaje. 25O shajja'ajjaji cuaa Jesosa ishe acanaje. Jama poanaje ba'a: —Emeshi Mese Jesosa, ¡shequicue oe! ¡Coya aje se hui'i'ya! —taanaje.

26Shequi'yo majje Jesosaa oya cuana saja'a canaje: —¿Apiojji acuae nequi ana quea mete nee nee poani? ¿A'a mi ejo e'e nei pojjeama poani?

Jamaya mimi majje Jesosa nequisohuanaje. Beni tecuea canaje: —¡Beni, jamaya, nequiquequicue oe!

Majoya bae ena nijje jama poanaje ba'a: —¡A'a enashajo pojji! ¡Enashajo popajea'yocue!

O jama mimime poajo, enashajo popajea'yonaje. Beni popajea'yonaje. 27Jamajjeya bishe aijo anica Jesosajo quea bihui nee nee poanaje. Ojee mimimiminaje jama ba'a: —¡Ache dejja shai jiquio quea sohui poja nee nee! Beniya, enashajo cuaa pea'ai oja sohui shajja'ajja cani, de.

Eshahua ojo nequiajo, dejja quea mase nee Jesosaa niñe poquipajea mee ca'yonaje

(Macoso 5.1-20; Noca 8.26-39)

28Jesosa bae ojje miji yasijje ba'eñaquinaje, Jjanana meshi yasijje. Majoya beca dejja Jesosa que poeyanaje. Oya cuana ba'enaje mei jjanijo, ma emano'yo cuana sajaajo. Eshahuaa oja eyami yasijje dobiquinajejo, quea mase nee nee, niñepoqui poanaje. O ani chipi nei jjayejequi ca ajja pea cuana.

29Niñepoqui cuana Jesosa ba majje taanaje jama ba'a: —Miya Eyacuiñajjija Bacua Ejja. ¿Apiojji miya ecuana que poeyanaje? ¿A'a jjeyahua nei ecuana cuaqui yasijje jeajeaje'yo? Eyacuiñajjija eshahua cuana cuaqui yasijje huoojea caje'yo quijje, jjeya nei pojjeama, de —taaame poanaje niñepoqui.

30Quea chipi nee cuichi cuana quea huiso ijija'ijjia nequi. 31Eshahua cuaa Jesosa jama huohuime acanaje ba'a: —Miyaya ecuana dejjajo nequi cuayaqui mee'yo majje ¡cuichi cuana huasijje ecuana huoojea'yocue!

32—E'e, ¡poquicue cuichi cuana huasijje! ¡Dobiquicue! —Jesosa poanaje. Jamajjeya dejja cuana jeanana'yo majje eshahua cuana cuichi cuana huasijje dobiquinaje, ojjaña. Dobiqui majje cuichi cuana cuajicuaji jaoquequinananaje. Bae quea sahua doe nee nee yasijje cuichi cuana hui'i'yonaje, ojjaña.

³³Ba majje cuichi jaahuanajji cuana jjajjasoquinaje. Cuajicuajipoquinaje cuiñajji yasijje. Ojjaña cuana ma cuiñajjijo ba'e huohui capoquinaje. Eshahua cuanajo, cuichi cuanajo, dejja cuana niñepoqui jjima' po mee canaje pea'ai huohui canaje. ³⁴Jamajjeya ojjaña cuana ma cuiñajjijo ba'e quea mete poeyanaje Jesosa que. Jesosa quea sohui poja nee nee jojoya ojjaña onijje quea mete miminaje jama ba'a: —¡Poquicue miya pea meshi yasijje!
Ojjaña ojo quea mete poanijo Jesosa ojje besapoqui o'oyanaje.

Jesosaa pea emanojaa jjaajaqui mee ca'yonaje, quibojjisha
(*Macoso 2.1-12; Noca 5.17-26*)

9 ¹Jamajjeya Jesosa bishejje besapoqui o'oyanaje ojje miji yasijje, Capenaoma huasijje. ²Jomajo pea dejja cuaa quibojjisha quea mano nee jaa ye canaje Jesosa que, equipajaajjijo. Ma ba majje Jesosa jjashahuabaquinaje jama ba'a: —E'e, jiquio dejja cuana jjashahuabaquiani eya ejaajaqui mee'yojji nei nei.

Jamajjeya Jesosaa emanojaa huohui canaje: —E'e ecuea epeejji, ¡quea bihui nee pocue! Eyaya miquea mimishi cuana cuijea'yonaje.

³Jesosaja esohui shajja'ajja majje Moisesija etehue'yo huohuijji poani cuana quenequenaje. Jjashahuaba taiquinaje jama ba'a: —¡De! Jiquio oya Eyacuiñajji pojjeama. ¿Apiojji Eyacuiñajji jayojja jama nei nei mimiani, de? Jamaya quea mimishi.

⁴Jamajjeya Jesosa ojaya ejjashahuaba taiquijji ba majje jama poanaje: —¿Yajjaje acuae quiana quea quene enijje poani so'o? ⁵¿Ache shai quibojjishajo quea camaja eyaya anaje? ¿A'a ojaya mimishi cuijea'yojji quea camaja? ¿A'a jja oya nequisohua meeje'yo eyaya? Ba'ajja —Jesosa poanaje—. ⁶Jamajjeya eyaya ojjañaja Edoe Meseya miquianaya ba meeaña eya ca ca iña Emeshi Cuiñacoojji quea ca'a nee nee nequi. Jamajjeya eyaya mimishi cuijeaje'yo nequianaja.

Majoya Jesosaa quibojjisha acanaje: —¡Nequisohuacue! ¡Miquea equipajaajji bebo majje miquea equi yasijje poquicue!

⁷Jjeya nei quibojjisha nequisohua majje jeo'yonaje. Jeojeopoquinaje ojaya equi yasijje. ⁸Ba majje ojjaña cuana quea bihui nee nee poanaje: —¡E'e nei, joya quibojjisha jeo'yonaje jjeya nei! ¡E'e e, Eyacuiñajji nijjeya Jesosaa emanojaa cuana huaquia mee ca'yani! ¡Mimishi cuijea mee ca'yani pea'ai! —poanaje ojjaña.

Jesosaa dejja Mateo bajjani iyaa canaje
(*Macoso 2.13-17; Noca 5.27-32*)

⁹Majoya Jesosa poquinaje pea cuiñajji cuana huasijje. Poquijjeya Mateo ba canaje equi ejjeshejji jaahuanajjijo ani. Mateo ona sose jjeshejji poani, eba'ejji sosejje. Ojjañaja emeshi meseja esohuijjo jjeshe mee cani, dejja cuana eba'ejji sosejje. Ba majje Jesosaa Mateo iyaa canaje: —Mateo, ¡enijje po'yocue!

Jamajjeya Mateo nequisohua majje Jesosa nijje poqui'yonaje.

¹⁰Majoya Mateohua ojaya epeeji cuana iyaa canaje ojaya equi yasijje e'ijjia'ijjiajji Jesosa nijje. Jamajjeya Jesosa o shajja'ajjajji cuana nijje Mateoja equi yasijje poquinaje ijia'ijjiaa. Quea huiso dejja cuana Mateo jama ona sose jjeshejji poani, dejja mimishi cuana pea'ai poquinaje. Ojee ijia'ijjia'aninaje Jesosa nijje, Jesosa shajja'ajjajji cuana nijje pea'ai. ¹¹Ba majje Jodio esohui huohuijji Paniseo cuana Jesosa shajja'ajjajji cuana nijje mimijajinaje jama ba'a: —¿Apiojji miquea esohui huohuijji ijia'ijjiani dejja mimishi nijje, ejjeshejji chichajji cuana nijje pea'ai? ¿Apiojji, de?

¹²Jesosaa oya cuana shajja'ajja canaje. Huohui canaje: —¿A'a dejja cuana quea mano pojjeama eshicuijji quiajji sa poani? Quea mano poanijo ca ca eshicuijji quia cajji. Jamaya miqianaya joya mimishi'ama poso jjabaquiani ecuea esohui shajja'ajja sa po ajja. Mimishi cuaa ca ca shajja'ajja cani. Jamajjeya eya dejja quea mimishi nijje jjapeequiani quea ja'a nee epo meeji. ¹³¡Bacue oe! Sijjepojji jama poani ba'a: “Eya ca ca iña quea pame nee, mimishi'ama nei nei”. Jamajjeya joya quea pame poso jjabaquiani ecuea e'iyaa'yojji pojjeama enijje ejjapeequijji. Chojja. Eya poeyanaje dejja joya quea mimishi nee nee iyaaa, mimishi pajea mee'yojji. Jamajjeya esohui etehue'yojo jjabahuejjaquicue jama ba'a: Yahuajo nei nei Eyacuiñajjiya Osea tehue mee ca poa jama ba'a:

“Huo cuana cuia cani. Cuia majje na sho cani e bihuijji. Jamaya ecuea quea boti pishana. ¡Pea cuana oe ba'e meecue tii quea bei! Jamaya ecuea quea boti nee nee”.

Jamaya tehue mee ca poa yahuajo —jamaya Jesosaa Paniseo cuana acanaje.

Bobi ijia jjima yajjijo huohui'ajja canaje cuaa
(*Macoso 2.18-22; Noca 5.33-39*)

¹⁴Majoya Huani, ma ona besameejji poa ejeanobiajea jaa. Ojaya eshajja'ajjajji cuana poeyanaje Jesosa que. Jama huohui'ajjame acanaje ba'a: —Ecuana, Paniseo cuana pea'ai Jodio etiiquianaja esohui jama poanijo bobi ijia'ijjia jjima ani Eyacuiñajjijo jjashahuaba neineiquianijo, onijje mimi neineiianijo. Jesosa, ¿apiojji acuae mi mi shajja'ajjajji cuana jama po ajja? —oya cuana poanaje beshahua nei quea tecue.

¹⁵Jesosaa oya cuana saja'a canaje: —Chojja, eya ecuea epeeji cuana nijje yanijo ca'ijjia cahua. Ejjahuanajji yahuaja epeeji cuana onijje yanijo ca'ijjia'ijjiaquiahua. ¿A'a yahuaja epeeji cuana onijje yanijo quea yeno? Chojja. Quea bihui nee. Yahue poqui'yajo ca ca oe ojaya epeeji cuana ijia'ijjia sa po ajja poaje, quea yeno jjejojo jjashahuaba neineiquiani. Eya jiquio ecua yahue poquiani jayojjaya jama poaje: Quijje eya poqui'yo majje ecuea epeeji cuana Eyacuiñajjijo jjashahuaba neineiquianijo ijia'ijjia ajja poaje.

¹⁶Majoya Jesosaa huohui canaje pea esohui ejjashahuabaqui meeji: —Eseyaya baacojja esee'yohua caca ajja bishe eyacuajo. Cho. Baacojja etii

enajo nequi see'yani, ca'a'ama. Jjasajajeaquiye'yo. Bishe ihuicuaajicuajije. Bishe eyacuajo ca ca baacojja eyacuaa cacaña.

17—Pea'ai ena sese cuatatanijo iya ajja meshimisi etijjo. Ena sese cuatata neineianijo, meshimisi ca'a'ama jjaajajeaqui majje ena sese jjaschojajeaquiye'yo. Cho, ena sese cuatatanijo meshimisi eyacua quea ca'ajo iya cajji.

Jamaya Jesusaa huohui canaje o jjabahuejjaquijji ba'a: Ojaya esohui eyacua quea ja'a jama ca'a cahua. Jamajjeya Eyacuiñajjiya oya cuana quea bojea nee ba caje'yo.

Epona sho'i emano'yojaa Pea epona najji poani tii tii
(*Macoso 5.21-43; Noca 8.40-56*)

18Jesusa jamaya dejja cuana nijje mimianijo, pea Jodio dejja o que poeyanaje, ma Jodioja ojee ejjachichaquijji equi jaahuanajji poani. Ecu'i'oshajjajo nequinaje o bihuijji. Jama poanaje ba'a: —Esohui huohuijji, ecuea ebacua piona mano'yonaje jjeja nei. ¡Poecuajicue o napa'ajjaa emeya! Jamajjeya oya shequije o'oya, de.

19Nequisohua majje Jesusa epona sho'ija chii nijje poquinaje. Jesosa shajja'ajjajji cuana onijje poquinaje pea'ai. 20Jesusa poquije oe eponaa ba canaje. Oya quea mano, najji popaje'yo ajja. Ome miji pea beca, 12 eshequijame na cuayapajeaqui'yo ajja poa. Jesosa que quehuajje poeyanaje. Ohuaya oja daqui cuema ña canaje, emeya. 21Jjashahuabaquinaje jama ba'a: —Eya Jesusaja daqui cuema ña majje najji popajeaje'yo.

Ohua daqui cuema ña cajje Jesusa jjabajeaquinaje. 22Epona nama'yo ba canaje. Jama poanaje onijje ba'a: —She, ¡quea bihui nee pocue! Miya quea ja'a jjashahuabaquinaje ejo jama ba'a: “E'e jojo nei Jesusaa eya najji popajea mee caje'yo”. Jamajjeya eyaya miya najji popajea mee'yonaje.

Jamajjeya ma epona najji popajea'yonaje.

23Majoya Jesusa equi jaahuanajji equi yasijje poquinaje. Dobiquinaje. Ba cañaquinaje quea huiso dejja cuana, ponaña pea'ai equijo nequi. Epona sho'i emano'yojo ojee pa'ani. Ojjaña quea shajjaquijjo poani. Dehue mia cani emojea'yojjijo pea'ai. 24Jesusaa ojjaña cuana huoojeacuayajea canaje: —¡Cuayaquicue nequiana esecue yasijje! Jiquio epona sho'i cahuijaa; epoquijeyo'yo pojjeama —poanaje.

—Chojja de. Oya mano'yonaje, de; shequi'yo ajja —poanaje cuana.

25Ojjaña cuana esecue yasijje cuayaqui'yajo, Jesosa epona sho'i jaa huasijje dobiquinaje, pea equecuayijji yasijje. Me' ña majje epona sho'i shequi mee ca'yonaje. 26Jamajjeya ojjaña ma meshijo ba'e yasijje huohuiqui canaje cuaa: —¡Jesusa jjashequi meequi'yojji, de! ¡Jiquio epona sho'i ma emano'yo poanaje shequi'yonaje! —poanaje.

Jesusaa beca dejja cojjama' quea cojja ja'a po mee ca'yonaje

27Quijje pishana Jesusa ma equijo ani cuayaqui'yonaje. Ejiojjijje poquianijo beca dejja o quiquishijji poquinaje, cojjama' cuana. Taaanaje

jama ba'a: —Jesosa, miya emeshi mese Dabija bacua. ¡Ecuanaajo jashahuabaquicue! ¡Cojjajji mo po mee'yocue!

²⁸Jesosa pea equi yasijje dobiqiajo cojjama' cuana o que poeyanaje. Jesosaa oya cuana huohui'ajja canaje: —Miquianaya ejo jashahuabaquiani jama ba'a: “E'e, Jesosa ca ca quea cojja ja'a jjapo meequi'yoyji, de”.

—E'e, Jesosa, miya quea cojja ja'a jjapo meequi'yoyji —poanaje cojjama'.

²⁹Jamajjeya Jesosaa ojaya ecojja napa'ajja canaje emeya. Huohui canaje jama ba'a: —E'e, miquianajaya ejjashahuabaquijji ejo quea ja'a nee nee. Jamajjeya eyaya cojjajji po meeje'yo nequiana.

³⁰Jjeya nei quea cojja ja'a nee nee po'yonaje. Jesosaa huohui neinei canaje pea'ai: —E'e, eyaya miquianaya quea cojja ja'a po mee'yonaje. Jamatii ja'a jihuhuijji so'o! —acanaje.

³¹Jamatii poqui majje huohui poanaje ojjaña huasijje: —¡Jesosaa ecuana quea cojja ja'a nee nee po mee ca'yonaje, de! —jamaya poanaje.

Dejja mimi'ajja mimi mee ca'yonaje Jesosaa

³²Majoya ma cojjama' poanaje cuana poqui'yajo, pea cuaa dejja mimi'ajja jjequi canaje Jesosa que. Eshahuaa oja yami yasijje dobiqii majje mimi'ajja po mee canaje. ³³Jesosaa eshahua huoojeacuayaje'yo majje dejja mimi'ajja quea ja'a nee mimi o'oyanaje. Ba majje ojjaña cuana quea bihui nee nee poanaje. Miminaje jama ba'a: —¡Chama' beca dejja Jesosa jama, de! Ohuaye nei eshahua huoojeacuayajea ca'yani, mimi'ajja mimi mee ca'yonaje, de —poanaje.

³⁴Jamatii Paniseo cuanaa Jesosa quehua niñeba canaje. Jama acanaje ba'a: —Chojja de, Jesosa eyamiquecua pojja'a. Pea eshahua huoojeacuayajea mee cani Edosiquiana nijjeya —siajje pome poanaje.

Jesosa Quito ojjaña cuanaajo jashahuabaquinaje quea yeno

³⁵Jamajojoya Jesosa poquinaje ojjaña cuiñajji quea quemo huasijje, ojjaña cuiñajji sisi cuana huasijje pea'ai. Jodioja equi ojee ejjachichaquijji cuana huasijje dobiquinaje esohui huohuiya.

—Eya quijje eyajo ojjañaja Emeshi Mese oe nei poaje'yo —Jesosaa acanaje.

Ojjaña quea mano jaa jjaajaqui mee ca'yonaje, huaquia mee ca'yonaje pea'ai. ³⁶Dejja cuana quea huiso nee nee jjachichaquinaje o que. Jesosaa oya cuana ba canaje ñajjajja jama. Ejaahuanajji quea pame chamajo ñajjajja nequi mee ajja quea pame nee. Jamaya ojjaña cuana quea yeno poani; eba'ejji quea camaja ba'yani, ejaahuanajji quea pame chama' pea'ai, de. Jamajjeya Jesosa ojjañajo quea yeno poanaje. ³⁷O shajja'ajjajji cuana nijje miminaje dejja cuanaajo. Jama poanaje Jesosa ba'a: —Anoso quejo jahua majje echacojji cuanaa cachicha cahua. Dejja cuana anoso jahuajahua jayojja jama, quea huiso nee nee. E'e de, jjeya ojjaña cuana jashahuabaquiani e'e jojo nei epojji; shajja'ajja caje eya Emeshi Mese nei poeyanaje o jaahuaana. Jamatii oe

pojji Eyacuiñajjijo chaco sa poani. ¿Aya acuae oya cuana jjabahuejjaqui mee caje'yo Eyacuiñajjijo? ³⁸Jamajjeya ¡Eyacuiñajji nijje mimicue! Jama acue ba'a: “Eyacuiñajji, ¡huojoecue oe miquea echacojji cuana esohui huohuiya, pea cuana minijje ejjapeequi mee'yojji!” —Jesosa poanaje.

Jesosaa iyaa canaje o shajja'ajjajji cuana 12 huisome
(*Macoso 3.13-19; Noca 6.12-16*)

10 ¹Jamajjeya Jesosaa o que iyaa canaje o shajja'ajjajji cuana. Oya cuana quea ca'a po mee canaje eshahua cuana huoojeacuayajea mee'yojji, ojjaña emanojaa cuana huaquia mee'yojji, ejjaajaqui mee'yojji pea'ai.

²Jesosa shajja'ajjajji nei 12 poa, yohua bajjani ba'a: Simohui ojaya pea bajjani Peno, oja chahua Anesi; Semeneoja bacua ejja Jacobo, oja chahua Huani; ³Penipe, Matonome, Tomasi, Mateo ma bejjo chichajji emeshi mesejo poa; Apeoja bacua ejja Satiaco; ⁴Simoni Senote; Nemeo ojaya pea bajjani Taneo; Jodasa Isicanote, ma Jesosa iña meesahuajji poanaje dejja mimishija quecua'yojji. Mahuiso Jesosaa babaca ca'yonaje ojaya esohui huohuijji epojji.

Jesosaa o shajja'ajjajji huoojea canaje esohui huohuiya
(*Macoso 6.7-13; Noca 9.1-6*)

⁵Jamajjeya Jesosaa jiquio 12 huoojea canaje onijje chacohua. Jamaya huohui canaje: —¡A'a poquijji Jodio dejja pojjeama cuanaja meshi yasijje! ¡Dejja cuana Samania meshijo ba'e cuana huasijje pea'ai a'a poquijji jjeja! ⁶Chojja, ¡jjeja poquicue Jodio cuana huasijje! Oya cuana poquiquehuanaje; Eyacuiñajji nijje jjapeepajeaquinaje ñajjajja epoquiquehua jayojja jama, de. ⁷Ojjaña cuana huohuicue jama ba'a: “Jjeja Jesosa ojjaña huoojeajji poani” acue. ⁸¡Emanojaa cuana jjaajaqui mee'yocue! ¡Emano'yo cuana shequi mee'o'yacue! ¡Dejja batata epo'yo cuana jjaajaqui mee'yocue pea'ai! ¡Eshahua cuana dejja cuana huasijje dobiqiajo huoojeacuayajea'yocue pea'ai! Eyaya miquianaya huaquia meesahuaña pea dejja cuana sosema!. Jamajjeya ¡pea cuana quea bihui nee oe huaquia mee'yocue sosema! ⁹Jjeja ¡ejjeshejji, mei huo'o pea'ai, bejjo pea'ai a'a dojojji! ¹⁰¡Bashosoco bobi dojojji a'a dojojji! ¡A'a beca daqui dojojji! ¡Miquea ejiojji nequi ejiojji shejee dojocue! ¡Oe acui ejjaquecuaca'aquijji dojocue, beca pojjeama! Miquea esohui shajja'ajja majje pea cuaa miya cabobia cahua. E'e, miyaya esohui huohuiñaajo, bobi caquia cahua. ¹¹Miquianaaya pea cuiñajji yasijje poqui majje ¡sa'ajjacue oe dejja miquea epeeji epojji, joya bei bei! ¡Ojaya equijo anicue ma cuiñajjijo ani majje! ¹²Ojaya equi yasijje dobiqiu majje huohuicue jama ba'a: “¡Eyacuiñajjiya miquianaya cajaanuana cahua!” ¹³Ojjaña ma equijo ba'eya miya quea pame nee acajo, Eyacuiñajjiya miquea esohui jayojja jama oya cuana jaahuana caje. Miya quea pame nee mi ba'e mee cajo, cho; Eyacuiñajjiya oya cuana ejaahuanajji pojjeama. ¹⁴E'e pojja'a beca equijo, beca cuiñajjijo miquea esohui shajja'ajja sa po'yo ajjajo, niñeba cani pea'ajjo, ¡oya cuana jeajeana'yocue!

Poquije'yohua jama acue ba'a: “Eyaya miquianaya cajaa aje'yo, ¡quea mimishi mi coma. Eyacuiñajjiya miya ba cani quea mimishi nee nee. Ohuaya miya quea nee nee po mee caje'yo” acue —Jesosa poanaje—. ¹⁵Eyaya miya e'e jojo nei huohuaña jama ba'a: Quijje Emeshi Mese nei poeje o'oya, ojjaña quea mimishi poani quea nee nee po meeje'yo. Yahuajo nei nei dejja cuana Sonomajo ba'e, Jomoshajo ba'e pea'ai quea mimishi nee ba'yanijo, Eyacuiñajjiya quea nee po mee ca'ya poa, yahuajo. Ma dejja shajjama' cuana ca ca Eyacuiñajjiya quea nee nee po tiitii mee caje'yo, de. Sonomajo ba'e cuana ca ca quea nee pishana po tiitii mee caje'yo.

Quijje dejja cuana quea mase nee poaje

¹⁶Jesosaa o shajja'ajjajji cuana huohui canaje pea'ai: —Eyaya miya huoojeaña dejja quea mase ibia jama huasijje. Miquianaya quea beijo ohuaya mi napa ca chana!. Jamajjeya ¡quea jjashahuabaqui ja'a pocue! ¡Quea bei pocue; mimishi'ama pea'ai! ¹⁷¡A'a pajea'yojji dejja cuana quea mase poaje'yo minijje! Miya iña majje dojo caje Jodio etii ani yasijje jeanobiaa. Janobajjima nei cuia caje Jodioja equi ojee ejjachichaquijji. ¹⁸Miya cuana enijje jjapeequianijo dojo caje cuaa pea emeshi mese cuana huasijje, ona huoojajji nei nei yasijje pea'ai. ¡Jamajjeya miquianaaya esohui quea pame nee ejo huohucue ona huasijje, Jodio pojjeama cuanaja ejjahuojeaquijji nei nei yasijje pea'ai! ¹⁹Dojo majje huohui'ajja caje jama ba'a: “¿Ae poani miquianaya?” Jamaya acajje ¡a'a quea mete pojji! A'a jjashahuabaquijji jama ba'a: “¿Ae shai eyaya huohuije?” ²⁰E'e nei Eyacuiñajjiya miya mimi meesahua caje. Ohuaya huoojea caje Edojjoshahua Pame mi que. Edojjoshahua Pameya miquianaya huohui meesahua caje —Jesosa poanaje.

²¹—E'e, quijje pishana dejja cuana, ponaña pea'ai quea mase nee poaje ecuea epeejji cuana nijje. Jamajjeya e'o'i mese oja chahua iña meesahua caje'yo onajaya equecua'yojji. Ejeajji cuaa jamaya acaje'yo oja bacua. Ebacua cuana shajjama' poaje. Dejja mase oja chii, oja enaese pojja'a iña mee caje'yo equecua'yojji. ²²Miquiana enijje jjapeequianijo, quea huiso cuana quea quene nee nee poaje'yo minijje. Jamatii enijje jjapeequi pajea'yo ajjajo nequi tiitii meeje'yo enijje eyajo, eya ojjañaja Emeshi Mese oe nei, ejjahuojeaquijji nei nei poaje. ²³Dejja cuaa oe cuiñajji jo ba'eya miquianaya janobajjima napa cajo, ¡poquicue pea cuiñajji yasijje! Eyaya miya e'e jojo nei huohuaña: Ojjaña Jodio dejja cuanaja cuiñajji cuana huasijje poqui jjimahuajo, ojjaña cuana huasijje ecue sohui huohui jjimahuajo pea'ai eya, ojjañaja Edoe Mese poeje o'oya —Jesosa poanaje.

²⁴—Ojjaña cuana enijje quea mase poani. Jamajjeya minijje quea mase poaje pea'ai e shajja'ajjajji poani jojoya. ²⁵Echacojji poani o chacomeejji nijje chacochoanijo, pea cuaa echacomeejji napa cajo, echacojji poani pea'ai napa caje cuaa. ¿A'a e'e? Dejja mimishi cuana ejo siajje poanaje jama ba'a: “Miya Edosiquiana Meesemo bajjani”. Jamaya enijje quea tai mimijajianijo quijje quea tai nee nee mimijajje minijje ecuea epeejji poani jojoya. Jamajjeya miya e jayojjaya acaje'yo; ¡jamatii quea bihui nee pocue! —Jesosa poanaje.

¡A'a quea mete pojji dejja cuanajo!

(Noca 12.2-7)

²⁶—Jamajjeya dejja mimishi cuanajo ¡a'a quea mete pojji! Ojjaña esohui quehuajje acani, pea cuanaja shajja'ajja jjima, quijje shajja'ajja caje. Ojjaña quehuajje amajje quijje ojjaña ba mee caje'yo.

²⁷—Jjeya eyaya esohui huohuiaña miquiana huasijje, ma pea cuanaja shajja'ajja jjima. Quijje pishana miquianaaya ojjaña huasijje huohuiquije ecuea esohui. ¡Quea ja'a nee huohuicue! ²⁸Ojjaña cuanajo, eshahua cuanajo pea'ai ¡a'a quea mete pojji! Oya cuanaa miya quecua caje'yo pojja'a. Jamatii, miquea edojjoshahua mano meeme ajja. ¡Eyacuiñajji oe neijo jjashahuabaquicue! Shajjama' poajo ohuaya miya mano mee'yo majje cuaqui yasijje jea caje'yo miquea edojjoshahua —Jesosa poanaje.

²⁹—E'e —Jesosa poanaje—, beca anohuii jjeshe cajji beshahua nei sosema'. Nahue'ama nei cuichojji cuana. Jamatii Eyacuiñajjiya, esejaya Chiia cuichojji cuana ba cani, bobi ijja mee cani. ³⁰Pea'ai ¿ache huiso ehujjaña miquea esapajo ba'e? Eyacuiñajjiya eba. Ojjaña ojaya ehujjaña esico, de. ³¹Jamajjeya ¡a'a quea mete pojji! Cuichojji cuana Eyacuiñajjiya nahue'ama; miya ca ca ojaya quea nahue nee nee —Jesosa poanaje.

¡A'a quea bicho pojji Jesosa nijje jjapeequiani!

(Noca 12.8-9)

³²—Beca cuaa bicho'ama huohui cani: “E'e, eya ca iña bicho'ama Jesosaja epeeji e'e jojo nei”. Jamajjeya eyaya ecue Chii eyajo ani huohuije bicho'ama jama ba'a: “E'e, oya cuana ecuea epeeji e'e jojo nei”. ³³Pea cuana quea bicho poani: “Cho, eya Jesosa Quitoja epeeji pojjeama”. Jamajjeya eyaya ecue Chii eyajo ani huohuije jama ba'a: “Cho, oya cuana ecuea epeeji pojjeama. Cajaa” eyaya aje —Jesosa poanaje.

Ojjaña dejja Jesosajo ojee ba'e meeme ajja quea bei

(Noca 12.51-53; 14.26-27)

³⁴—¡A'a jjashahuabaquijji eya poeyanaje ojjaña cuana ojjaña meshijo ojee quea bei ba'e meeya! Chojja, de. Pea cuana quea mase poaje ecuea epeeji cuana nijje. ³⁵E'e, ecuea esohui ohua shajja'ajja canijo, oja chii nijje oja bacua ejja cuana quea quene poaje. Ecuea esohui jayojja jama ohua acanijo, oja enaese nijje ojaya ebacua piona quea quene poaje pea'ai. Enijje jjapeequianijo, oja ano nijje oja bacua ejjaja huanase quea quene poaje pea'ai. ³⁶Jamajjeya ecuea epeejjiya huapa pojjeama cuana quea quene poaje onijje ecuea epeeji pojjeama jjejojo; pea cuana quea quene pishana poaje onijje —Jesosa poanaje.

³⁷—Ojjaña joya oja chii, ojaya enaese pojja'a quea jea nee nee acanijo eya quea jea pishana acani ecuea epeeji pojjeama, de. Pea'ai ojjaña joya oja bacua ejja, oja bacua piona pojja'a quea jea nee nee acanijo eya quea jea

pishana acani enijje jjapeequi meemee ajja. Cajaa. ³⁸Eyaya Eyacuiñajjiya esohui huohuañaajo, pea cuana enijje quea quene poaje'yo. Dejja mimishiya enapa ca poani jjejojo enijje mi jjapeequiani. Ojjaña joya e jayojjaya ba'e sa po ajja ecuea epeeji pojjeama. E'e, jiquio ecua acui ecueata'apee quea camaja e'abojji jama jayojja enijje jjapeequiyajo quea camaja poaje. ³⁹Dejja mimishi cuaa ecuea epeeji quecua ca chana'. Jamajjeya quea mete nee neejo enijje jjapeequi sa po ajja. Cuaqui yasijje dobiqijje'yo tiitii. Joya enijje jjapeequiani ca ca dejja mimishi cuaa quecua caje'yo pojja'a. Jamatii. Mano'yo majje enijje ba'e tiitiije'yo quea pame nee eyajo —Jesosa poanaje.

Ojjaña joya quea pame poani sosequia caje'yo quijje Eyacuiñajjiya
(*Macoso 9.41*)

⁴⁰—E'e —Jesosa poanaje pea'ai—, beca cuana minijje jjapeequije'yo miya ecue sohui huohuañaajo. Jamajjeya oya ecuea epeeji poani pea'ai. Eyacuiñajji e huoojeajji poani; ojjaña joya enijje jjapeequiani Eyacuiñajjiya epeeji poani pea'ai. ⁴¹Quijje Eyacuiñajjiya ojaya esohui huohuijji sosequia caje'yo ojaya esohui huohui cani sosejje. Pea cuana ojaya esohui huohuijji nijje jjapee neineiquianijo, sosequia caje'yo esohui huohuijji jayojja jama. Ojjaña joya Eyacuiñajjiya epeeji nijje e'e jojo nei jjapeequiani Eyacuiñajjiya sosequia caje'yo quea pame nee oya quea pame nee poanijo. ⁴²E'e jojo nei ojjaña joya ecuea eshajja'ajjajji poani ba'e meesahua cani, ena e'ishijji quia cani pojja'a eya ojaya quea boti neejo, Eyacuiñajjiya oya quijje sosequia caje'yo oya quea pame nee poanijo —Jesosaa o shajja'ajjajji cuana huohui canaje mahuiso huoojea jjimahuajo.

Huaniya Jesosa que huoojea canaje o shajja'ajjajji cuana
(*Noca 7.18-35*)

11 ¹Majoya Jesusaa ojaya ome miji becanejjijji pea'ai, 12 eshajja'ajjajji cuana huasijje esohui huohui majje pea cuiñajji quea chipi nee yasijje poquinaje esohui huohuiya.

²Yahuajo pea dejja cuaa Huani iña ca poa, ma ona besameejji poa. Dejja maseja equi ejjajejanobiaquijji yasijje jeanobiajea ca poa, eme' jeyo'yo. Ejejanobiajaaa Huaniya shajja'ajja canaje onaja ehuohui'yo Jesusajo. Jamajjeya o shajja'ajjajji cuana huoojea canaje Jesosa que. ³Oya cuana Jesosa huohui'ajjaña meequi canaje jama ba'a: —Jesosa, yahuajo Huaniya huohui canaje jama ba'a: “Eyacuiñajjiya Emeshi Mese nei ojjaña jaahuanajji huoojea caje'yo ecua huasijje”. ¿A'a miya ma Emeshi Mese nei? E'e pojja'a ecuaa pea ishoaje. ¡Jamajjeya huohucue miyaya! ¿Yajja shai ecuaa Huani aje'yo so'o? —Huanija eshajja'ajjajji cuana poanaje.

⁴Jesosaa oya cuana saja'a canaje: —¡Poqui o'oyacue Huani que! ¡Ecuea esohui miqianaaya shajja'ajjaña, jiquio miya eya banajeya pea'ai oe Huani huohuiquicue! Jama acue ba'a: ⁵“Huani, Jesusaa cojjama' cuana quea cojja ja'a po mee ca'yani. Jiojjijajja jeo mee ca'yani. Dejja batata epo'yo

cuana jjaqueaqui mee ca'yani. Shajjaqueba pea'ai quea shajja ja'a po mee ca'yani. Emano'yo cuana shequi mee ca'yani pea'ai. Eshohi quea pame nee huohui ca'yani ojjaña deija quea yeno huasijje”. ⁶E'e, eya Eyacuiñajjija huoojea'yo ojjaña jaahuanajji. Quea bihui nee capo'yahua ojjaña joya ejo jjashahuabaquiani jama ba'a: “E'e jojo nei Jesosa Eyacuiñajjija huoojea'yo ojjaña jaahuanajji”. ¡A'a jjashahuaba quehuaquijji! —Jesosa poanaje.

⁷Jamajjeya Huanija epeeji cuana poqui o'oyanaje Huani que. Majoya poqui'yajo Jesosa miminaje pea cuana nijje: —Yahuajo Huani meshi jabojo, quimajo aninaje. Miquianaya o que poquinaje. ¿Ae shai banaje miyaya? ¿Ae jjashahuabaquinaje Huanijo? ¿A'a jjashahuabaquinaje Huani esohui huohuijji quea ja'a pojjeama? Chojja. ⁸Miquianaya Huani que poquinaje ¿ae baa? ¿A'a dejaja daqui quea nahue nee ehuosho ba'e banaje? Chojja. Dejja daqui quea nahue nee huosho cani equi quea quemajo ba'eya. ⁹¿Achajja Huani ba'ya poa? ¿A'a miya jjashahuabaquinaje Huani Eyacuiñajjija esohui huohuijji nei nei? E'e, de. Jamatii Eyacuiñajjija esohui huohuijjiya ba cani oe pojji. Huanija eba quea huiso nee. ¹⁰Yahuajo nei Eyacuiñajjija esohui etehue'yo Huanijo jama poa ba'a:

“Jiquio deija ecuea esohui huohuijji nei poani. Jamaya eya sa poani.

Eyaya oya huoojeaje ebionei, mi hui dojojji. Ohuaya deija cuana huasijje huohui caje miquea epoejjijo”.

Jamaya yahuajo nei nei Eyacuiñajjiya ojjaña ba mee ca poa Huaniya poe majje ejo jjabahuejjaqui mee caje cuana. ¹¹Ecuea pea esohui a'a pajea'yojji jama ba'a: Ojjaña pea cuana quea pame. Huani ma ona besameejji poa quea pame nee nee. Jjeya pea chama' Huani jayojja jama. Jamatii quijje eya Emeshi Mese nei poaje, ojjaña ecuea epeeji cuana Huani jayojja jama poaje'yo, quea pame nee nee. ¹²Eya poeyanajejo Huaniya ojjaña pojja ejo huohui canaje jama ba'a: “Jjeya nei Emeshi Mese nei Quito poeje”. Jamatii deija mase cuaa Huani napa cani ojjaña pojja. Eya, Emeshi Mese nei jeabichaje sa acani cuaa pea'ai. Oya cuana emeshi mese jayojja jama huohui sa poani —Jesosa poanaje.

¹³—Yahuajo nei Eyacuiñajjija esohui huohuijji cuaa huohui ca poa, Moisesija esohui etehue'yojo jama poa pea'ai ba'a: “Quijje Eyacuiñajjija huoojea'yo ojjaña jaahuanajji Emeshi Mese oe nei poeje”. Jamaya Huani miminaje. Jamaya pea cuana miminaje Huani poe jjimahuajo pea'ai. ¹⁴E'e, yahuajo nei Eyacuiñajjija esohui huohuijjiya tehue ca poa jama ba'a:

“Ecuea huoojea'yo ojjaña jaahuanajji poe jjimahuajo, eyaya Enia huoojeaje ebionei, ehui dojojji”.

—Huaniya Enia jayojja jama huohui canaje, ma Eyacuiñajjija esohui huohuijji yahuajo nei nequia poa jama. ¹⁵Jamajjeya ¡bacue; a'a shajjama' pojji, ca miquiana ba sa poanijo! ¹⁶Ojjaña cuana jjeya nei ba'e ecuea eba. Oya cuana esho'iquiana quebanei poani jayojja jama. Quebanei poanijo jama poani: Esho'i cuaa pea esho'i taaa cani. ¹⁷Jjamimihue'equiani jama ba'a: “Ecuaa dehue miaña epona ejjahueaquijjijo jama. Jamatii miquianaya majamaja ajja. Pea'ai e pa nishoanijo, emano'yojo pa'ani jayojjayajo, miquianaya pa nisho

ajja. Jamajjeya miqianaya quebanei po ajja ecuana nijje” poani esho'iquiana —Jesosa poanaje—. Jamaya miqianaya jjeya poani, de. ¹⁸E'e, yahuajo pishana Huani poeyanaje. Eyacuiñajji nijje mimi tiitianijo bobi ijja'ijja ajja. Ecahuishi ishi jjima pea'ai. Jamajjeya ojjaña cuaa huohui canaje ojo jama ba'a: “Huani jja ca niñepoqui jama”. ¹⁹Eya ojjaña cuanaja Edoe Mese poeyanaje. Eya ca jja ca ijja'ijjiani; ojjaña nijje mimimimiani. Jamajjeya miqianaya ejo sijje poani jama ba'a: “¡Bacue jiquio dejja Jesosa! Oya jeje ajja tii. Dejja mimishi nijje jjapeequiani, bejjo chichajji cuana nijje pea'ai, de”. Jiquio ecua esho'iquiana pea nijje jjapeequi sa po ajja jama jayojja miqianaya ecuana nijje jjapeequi sa po ajja. Miqianaya jjashahuaba quehuaquiani Huanijo, ejo pea'ai. Jamatii ecuaa Eyacuiñajjija ejjashahuabaquijjijo quea ja'a nee jayojja jama añajo ecuaa quea pame nee año —Jesosa poanaje.

Beca cuiñajjijo ba'e cuana shajjama' poanaje

(Noca 10.13-15)

²⁰Quea huiso cuiñajjijo Jesosaa ma dejja cuaa ajjima acani ahuicha'a huicha'a canaje. Jamatii quea huiso cuana mimishi pajea sa po'yo ajja. Jamajjeya Jesosaa oya cuana tecuea canaje. ²¹Jama poanaje ba'a: —Miqianaya quea mimishi nee nee. ¡Quea yeno nee nee miqianaya poaje Conasijo ba'e, Betesainajo ba'e pea'ai! Ma dejjaa ajjima acani eyaya ahuicha'a huicha'anaje miqianaja cuiñajji cuanajo miquea ebajji nisho. Yahuajo nei nei pea dejja cuana Tinojo, Sinonojo pea'ai ba'eja ojaya ba jjima eyaya ma dejja cuaa ajjima año. Eba jojjemo oya cuana mimishi cuana pajea ca'yo queaye mimishijo quea yeno po majje. ²²¡Bacue oe! Quijje Eyacuiñajjiya ojjaña cuana sosequia caje'yo ojaya eba'e'yojji sosejji. Ohuaya yahuajo nei nei Tinojo ba'e cuana, Sinonojo ba'e cuana pea'ai quea nee po mee caje'yo mimishijo. Miqianaya Conasijo ba'e, Betesainajo ba'e pea'ai ca ca quea nee nee po mee caje'yo ecuea esohui miquiaaya mi shajja'ajjajo. ²³Miqianaya Capenaomajo ba'e quea pame poso jjabaquiani, jjashahuabaquiani jama ba'a: “Ecuana quea pame nee nee; pea meshijo ba'e cuana quea pame pishana”. Chojja, de. Sijje miya poani. Quijje Eyacuiñajjiya janobajjima nei napa cajje miqianaya quea yeno poaje. Eyaya ma dejjaa ajjima acani año miqianajaya cuiñajjijo quea huiso. Jamatii miquea mimishi cuana pajea sa po'yo ajja. Yahuajo nei nei pea cuiñajji Sodoma bajjani yania poa. Eyacuiñajjiya ma dejjaja ba jjima acani eba jojjemo oya cuana quiyo jeyojeyo'yo jjima poqueaye. Jamatii jjeya Sodoma chama'yo tii. ²⁴¡Bacue oe! Quijje aje Eyacuiñajjiya ojjaña cuana sosequia caje'yo ma ecua oya po nequia poa jama. Ma pojajjo ohuaya dejja cuana yahuajo nei Sodomajo ba'e quea nee po mee caje'yo quea mimishijo. Miqianaya Capenaomajo ba'e ca ca quea nee nee po mee caje'yo ecuea esohui miquiaaya mi shajja'ajjajo —Jesosa poanaje.

Jesosa Quitohua eseya jomishoca mee caje
(*Noca 10.21-22*)

²⁵Jamaya dejja cuana tecuea majje Jesosa eseya Chii ai nijje miminaje jama ba'a: —Ecuea Chii, miya eyajo Emeshi Mese nei poani. Ojjaña meshi cuana miquea poani pea'ai. Eyaya miya bihuiaña. E'e, beca cuana jjashahuabaquiani jama ba'a: “Ecuea eba quea huiso esohui, quea huiso aquiana pea'ai”. Jamajjeya miyaya oya cuana ba meesahua ajja. Jamajjeya oya cuanaja ba jjima eya Emeshi Mese oe nei poani. Pea cuana esho'i cuana jama ca ca miyaya jjashahuabaqui meesahuaña quea ja'a nee eya Emeshi Mese nei poani. Jamajjeya eyaya miya bihuiaña. ²⁶E'e ecue Chii, jamaya miyaya aña miquea ejjashahuabaquiji. Apoa —jamaya Jesosa miminaje eseya Chii ai nijje.

²⁷Majoya Jesosa jama poanaje ba'a: —Eyacuiñajji ecue Chii e huoojeajji epo. Eya ojaya esohui huohuijji poani. Ecue Chiiya eyajo anija ecuea ejjashahuabaquiji ojaya eba nei nei, ojaye nei. Ecue Chiiya ejjashahuabaquiji ecuea eba nei nei pea'ai, ecuee nei. Eyaya ecuea epeeji ba meesahuaña quea ja'a nee ecue Chiiya ejjashahuabaquiji —Jesosa poanaje.

²⁸—¡Enijje jjapeequicue quea bei! Mique mimishi cuanajo miya quea yeno. Miquea echaco quea camajajo miya quea yeno poani pea'ai. ¡Enijje jjapeequicue! Eyaya miya jomishoca meeje'yo camaja'ama eba'e'yojji. ²⁹Eyaya quiana ca ca oe miquianaya jama pojjeamaa jjejojo quea jea aña; tecue'ama; quea bei pea'ai. Ecuea epeeji po majje miquianaya quea bei poaje'yo. Ba'e tiitii meeje'yo enijje eyajo pea'ai. Jamajjeya ¡ecuea esohui jayojja jama acue! ¡Jashajja'ajjaquicue quea ja'a nee ecuea esohuijo! ³⁰Camaja'ama ecuea esohui jama eba'e'yojji. Ecuea esohui aquiana pejapeja e'abojji jayojja poani —Jesosa poanaje.

Esohui epojja ejomishocajji
(*Macoso 2.23-28; Noca 6.1-5*)

12 ¹Majoya epojja ejomishocajji Jesosa o shajja'ajjajji cuana nijje ejiojijje poquinaje. Que yiyeje poquije quea shoe poanaje; quejo nequi anoso ai sejja canananaje eshe tii e'ijjiyajji, o shajja'ajjajjiya. ²Maya Paniseo cuaa ba canaje. Jamajjeya Jesosa nijje mimijajinaje jama ba'a: —¡Bacue oe! Mi shajja'ajjajji poani cuaa chaco cani. Anoso ai sejja cani epojja ejomishocajji. Moisesija etehue'yo jama poani ba'a: “¡A'a chacojji epojja ejomishocajji!”

³Jesosa oya cuana saja'a canaje jama ba'a: —¡A'a miquea ba jjima esohui etehue'yo emeshi mese Dabija? ⁴Yahuaajo nei nei ojaya epeeji cuana quea shoe po majje ojee Eyacuiñajji equi yasijje dobiquinananaje. Ijja ca poa ejji ecabeje, maya Eyacuiñajji yasijje quia ca poa cuaa ojaya ebajji. Jiquio ca oe Eyacuiñajji nijje mimianiya ca'ijji cahua; pea cuanaja e'ijjiyajji pojjeama. ⁵¡A'a miquea ba jjima Moisesija esohui etehue'yo? Jama poa ba'a: Ojjaña epojja ejomishocajji Eyacuiñajji nijje mimiani cuaa ca oe Eyacuiñajji equijo cachaco cahua. Jamatii mimishi'ama, mimijaji ajja, de; ojaya yajji cachaco cahua.

6—E'e, eyaya miya e'e jojo nei huohuaña jama ba'a: Moisesija esohui Eyacuiñajjija equijo quea ja'a pishana yahuajo nei poa. Ecuea esohui ca ca quea ja'a nee nee —Jesosaa acanaje—. 7E'e, miquianajaya Eyacuiñajjija esohui etehue'yo eba neinei'yo jojjemo dejja cuana mimishi'ama jjaniñebaqui ajja pome. Jamaya quea tai. Yahuajo Eyacuiñajjija esohui etehue'yo jama poa ba'a:

“Huo cuana cuia cani. Cuia majje na sho cani e bihuiajji. Jamaya ecuea quea boti pishana. ¡Pea cuana oe ba'e meecue tii quea bei! Jamaya ecuea quea boti nee nee”.

Jamaya tehue ca poa yahuajo.

8—Jamajjeya eya ojjaña Edoe Mese Emeshi Mese nei poani. Eyaye nei huohuije epojja ejomishocajjijo; ¡quea pame nee nee acue! ¡Pea cuana quea jea nee acue! —Jesosa poanaje.

Meshahuama'yo epo jjameshahuanequi mee ca'yonaje
(Macoso 3.1-6; Noca 6.6-11)

9Majoya Jesosa poquinaje pea huasijje. Equi ojee ejjachichaquijji yasijje dobiquinaje. 10Jomajo dejja meshahuama'yo epo aninaje. Jamajjeya Jesosa ba majje Paniseo cuana jama jjashahuabaquinaje ba'a: —E'e pojja'a Jesosaa chaco caje epojja ejomishocajjijo; e'e pojja'a eme' jeapisa mee caje'yo epojja ejomishocajjijo. Caba'ajja sahua —poanaje Paniseo.

Jesosa nijje mimijaji sa poanaje. Jamajjeya oya huohui'ajja canaje Paniseo cuaa: —Jesosa, ¿a'a dejja quea mano jaa miyaya huaquia mee'yome epojja ejomishocajjijo?

11—Epeeji cuana, e'e pojja'a miquea ñajjajja jjani quea doe yasijje oquequije epojja ejomishocajjijo. ¿A'a miyaya ñajjajja iña majje ma pojjaajo jjequishua'yo? E'e, de. 12 ¡Bacue oe! —Jesosa poanaje—, dejja Eyacuiñajjija quea boti nee; ñajjajja ca ca quea boti pishana. Jamajjeya e'e, pea cuana ca'a meesahua'yahua epojja ejomishocajjijo. Jamaya Moisesija esohui etehue'yojo poani pea'ai —Jesosa poanaje.

13Ma mimi majje Jesosaa meshahuama'yo epo jama acanaje ba'a: —Epeeji, ¡miquea eme' jeapisa'ajja'yo socue!

Jamajjeya eme' jeapihui majje eme' jeapisa ca'yonaje; pea mijije jayojjaya po'yonaje. 14Majoya Paniseo cuana esecue yasijje cuayaqui majje ojee miminaje: —¿Yajja amajje Jesosa quecua ca'yojji so'o, de? —jamaya poanaje Paniseo cuana.

Jesosa Eyacuiñajjija echacojji ojaya yajjijo

15E'e, Paniseo cuaa oya quecupana canaje. Ma shajja'ajja majje Jesosa poquinaje pea meshi yasijje. Quea huiso dejja cuana onijje poquinaje. Ojjaña cuana huaquia mee ca'yonaje, jjaajaqui mee ca'yonaje, Jesosaa. 16Jama poanaje ba'a: —E'e, eyaya miya huaquia mee'yonaje. ¡Jamatii a'a jihuohuijji so'o!

¹⁷E'e, Jesosaa ojjaña cuana huaquia mee ca'yonaje, sohuihuohui canaje pea'ai. Jamaya Isaiaja esohui etehue'yo ojo yahuajo nei nei jayojja jama poa. Eyacuiñajjiya Isaija yahuajo nei nei tehue mee ca poa Jesosajo jama ba'a:

¹⁸“¡Bacue! Jiquio deja ecuea echacojji ecuea yajjijo. Eyaya oya huoojeaje'yo. Oya ecuea quea jea nee nee. Ojo eya quea bihui nee nee. Ecuea Edojjoshahua Pame o que eyaya huoojeaje'yo; ohuaya ojjaña Jodio pojjeama cuana huasijje huohui caje jama ba'a: —¡Ojjaña cuana ecuea esohui e'e jojo neijo jjabahuejjaqui'yajo Eyacuiñajjiya quea boejea po mee caje'yo! ¹⁹Oya ecuea echacojji jjamimicuiajea nobiajeaqui ajja. Quea bei nee mimije'yo. Ejiojjijje poquiani quea shajjaquijjo po'yo ajja. ²⁰Joya quea mimishi nee nee aje jja oe ohua mimishi cuana cuijea ca'yajje quea boejea poaje'yo. Cuanaya jiquio ecua cuaquijji quijjo'yo jjimahuajo esei sho o'oyaña jama jayojja ecuea epeejji quea mimishi po o'oya chanajo ohuaya quea ja'a nee nee po mee caje o'oya, de. E'e, ohuaya ejo chaco tiitii caje'yo; quea huiso nee nee ba'e mee caje'yo quea ja'a nee nee. ²¹Jodio pojjeama quea huiso nee nee ojjaña meshijo ba'e cuanaya e'e jojo nei onijje jjapeequije'yo pea'ai”. Jamaya Eyacuiñajjiya Isaija tehue mee ca poa yahuajo nei nei Jesosa Quitojo.

Jesosa niñeba canaje cuaa

(Macoso 3.20-30; Noca 11.14-23; 12.10)

²²Majoya Jesosa que jjequi canaje cuaa deja niñepoqui. Oya cojjama', mimi'ajja pea'ai. Jesosaa eshahua huoojeacuayajea ca'yonaje. Jamajjeya oya quea cojja ja'a poanaje, emimijji pea'ai. ²³Ba majje ojjaña cuana quea bihui nee poanaje. Jama acanaje ba'a: —E'e de, a'ya shai de, ¿a'a pojja'a Jesosa Eyacuiñajjiya huoojea'yo Quito?

²⁴Ma shajja'ajja majje Paniseo cuaa Jesosa niñeba canaje. Jama poanaje ba'a: —Chojja, de. Jesosa aje oe eyamiquecua pojja'a. Ohuaya aje jja oe eshahua cuana huoojeacuayajea canaje Edosiquiana etii nijjeya, Satanasa bajjani, pea bajjani Meesemo nijjeya —poso acanaje Paniseo cuaa.

²⁵Paniseo cuanaja ejjashahuabaqui'yojji quea tai Jesosaja eba poanaje. Jamajjeya oya cuana tecuea canaje jama ba'a: —Shajja'ajjacue oe! Joya emeshi mese shajja'ajja sa po ajjajo ojee jjaquecuaqui majje jjaquecua iyaiyaquije'yo; deja cuana ma meshijo ba'e chama'yo tii poaje'yo. Cuiñajjijo ba'e cuana jamaya po pea'ajje, chama'yo tii poaje emeshi meseje echacojji cuana. Huapa pojjeama cuana jjacuiaquijjo chama' epeejji cuana poaje'yo pea'ai. ²⁶Jamaya pea'ai Edosiquiana, Satanasa pea eshahua ehoojeacuaya'yo jojjemo deja huoojea'yojji pojjeama po'yoqueaye —Jesosa poanaje. ²⁷—¿A'a ya eya Edosiquiana nijjeya niñe, pea eshahua cuana pea'ai huoojeacuayajeaña poso ña? Jamajjeya miquea epeejji cuanaa ¿ae nijje eshahua huoojeacuayajea cani? Eyacuiñajjiya asahua canijo. Jamajjeya ojaya eba miqianaya ejo sijje poani. ²⁸E'e, Eyacuiñajji nijjeya eyaya

eshahua huoojeacuayajea'yaña. Jamajjeya bacue eya e'e jojo nei Eyacuiñajji, Emeshi Mese oe nei jjeya poani tii. ²⁹Cuanaya ¡bacue! ¿A'a dejja quea ca'a neeya equi yasijje dobiqiani oja aquiana siya o jeyo jjima nequijo? Chojja. O jeyo majje ojaya aquiana cuana sii caje cuaa. Jiquio ecua e'aquiana mese ebionei jeyo cani jama amajje eyaya eshahua cuana jeacuayajeaña —Jesosa poanaje pea'ai.

³⁰—Cuanaya ojjaña joya enijje jjapeequi ajja aje oe e quecupanajji poani, ojjaña enijje chaco ajja ecuea epeeji pojjeama aje oe e ejeabichajeajji nisho poani —poanaje.

³¹—Jamajjeya eyaya miya e'e jojo nei huohuiaña: Eyacuiñajjiya ojjaña mimishi cuana, siajjepojji cuana pea'ai cuijea caje'yo. Jamatii joya Edojjoshahua Pame niñeba cani tii ca ca Eyacuiñajjiya maya emimishi cuijea'yojji pojjeama tii tii. ³²E'e —Jesosa poanaje—, eya niñeba cajo Eyacuiñajjiya ma mimishi cuijea caje'yo. Joya Edojjoshahua Pame niñeba cani tii ca ca Eyacuiñajjiya maya emimishi cuijea'yojji pojjeama tii tii. Jjeya ecuijea'yojji pojjeama; quijje ecuijea'yojji pojjeama tii tii poaje'yo, eya ecue Chii nijje eyajo ojjaña huoojea'yojji poaje —Jesosa poanaje.

Dejja mimishi acui tai jjajja ajja jayojja

(Noca 6.43-45)

³³Jesosaa Paniseo tecuea canaje pea'ai jama ba'a: —Acui quea pame jjajjani. Acui quea tai jjajja ajja, quea jjajja biso. Jamajjeya miyaya baña dejja mimishi acui tai jayojjaya; ohuaya quea tai acani. ¿A'a miyaya eya baña quea pame nee? Jamajjeya eya quea pame acui quea pame jayojja. ³⁴Miquianaya aje oe peyo quea se nee nee jama, quea mase. Miquianaya quea tai poanijo quea pame mimi ajja. E'e, quea jjashahuabaqui tai po tiitianijo quea tai mimiani —Paniseo cuana acanaje Jososaa—. ³⁵E'e, joya quea jjashahuabaqui ja'a nee poanijo quea ja'a nee ba'yani. Quea jjashahuabaqui taijo ca ca quea tai ba'yani. ³⁶Jamajjeya eyaya miya huohuije e epoe o'oyajjiyo ojjaña mimishi tecuea, ojjaña joya jjaniñebaquiani, mimijajiani, siajje poani pea'ai quea nee nee po tiiti meeje'yo. ³⁷E'e, miquea esohui quea ja'a nee poanijo, Eyacuiñajjiya miya etecueajji pojjeama. Quea sho'i taijo ca mi ca Eyacuiñajjiya quea nee nee po tiiti mee caje'yo —Jesosa poanaje.

Paniseo cuana Jososaa acani ba o'oya sa poanaje

(Macoso 8.12; Noca 11.29-32)

³⁸Majoya beca Paniseo cuaa, Moisesija tehue huohuijjiya pea'ai Jososa huohui canaje jama ba'a: —Esohui huohuijji Jososa, ¡quea pame acue! ¡Ma dejjaa ajjima acani a'o'oyacue so'o, Eyacuiñajjiya miya huoojea canaje ecuanaja ebajji! —poanaje.

³⁹—Chojja. Miquianaaya Eyacuiñajjiya esohui cajaa anaje. Jamajjeya miya peapea ba sa poani. Jamatii Eyacuiñajjiya yahuajo nei Jjonajo aca poa jayojja jama ohuaya jjeya acaje o'oya miquianaja ebajji. ⁴⁰Ma ecua yahuajo Eyacuiñajjiya esohui huohuijji Jjona jai ai'aia seejo ba'ya poa pea beca peejjima

cahuime jama jayojjaya aje eya ojjañaja Edoe Mese bajjani quijje pishana mano'yo majje mei jjanijo ehuananobia jaa shequije o'oya —Jesosa poanaje.

⁴¹—Yahuajo nei nei dejja cuana Ninebejo ba'eya Jjonaja esohui shajja'ajja majje mimishi cuana pajea ca'ya poa. Jjona quea ca'a pishana poa; eya ca iña quea ca'a nee nee. Jamatii miquianaya ecuea esohui shajja'ajja sa po ajja. Jamajjeya quijje eya poe o'oya majje mimishi cuana tecueajeaje. Ninebe dejja cuaa miya tecuea caje jama ba'a: “Miquianaya ca ca oe quea mimishi nee nee poanaje”. ⁴²Jama pea'ai poaje ba'a: Yahuajo nei nei Sama mese epona quea huesha nee poeya poa Jodioja emeshi mese Sanomoja esohui shajja'ajjaa. Sanomo quea jjashahuabaqui ja'a pishana poa; eya ca quea jjashahuabaqui ja'a nee nee. Jamatii miquianaya ecuea esohui shajja'ajja sa po'yo ajja. Jamajjeya quijje eya poe o'oyaje mimishi cuana tecuejeaa, eeno poejijije emeshi mese ponaa, Sama meseya jama miquianaya tecueame acaje pea'ai ba'a: “Miquianaya ca ca oe quea mimishi nee nee poanaje” acaje nequiana —Jesosa poanaje.

Eshahua dejjaya yami yasijje poe o'oyanaje

(Noca 11.24-26)

⁴³Jesosa esohui ejjabahuejjaqui meejji huohui canaje pea'ai jama ba'a: —Eshahua dejjaya yamijo nequi cuayaqui'yo majje quea huesha poquinaje. Sa'ajja canaje pea huasijje enequijji. Jamatii ba'yo jjima. Oya po'ayequeequi tii. ⁴⁴Jamajjeya oya jjashahuabaqui jama ba'a: “Eya poquije o'oya huacuaya oya' dejja huasijjeya, ma e cuayaquinaje yasijjeya, ma ecuea equi jayojja huasijjeya”. Jamajjeya oya' dejja huasijje poe o'oya majje ba cañaqui'yani chama' enahuejji Eyacuiñajjija epeeji nei pojjeama jjejojo. Ojaya eyami equi ecuiashaba jayojja jama, ehua bame bame jayojja, equi se ejjama' jayojja. ⁴⁵Jamajjeya oya poquije pea eshahua cuana sa'ajjaa. Ba caje quea huiso, me mijijje beca onijje enequijji. Oya cuana quea mase nee nee; pea quea mase pishana. Majoya ojjaña dobiqijajo ma dejja quea yeno nee nee poani. Yahuajo oe eshahua nequia huajo quea yeno pishana poanaje.

Jamaya poanaje Jesosa shajjama' cuana nijje, oya cuana onijje jjapeequi sa po ajjajo.

—Ma dejja jayojjaya miya poaje, quea mimishi nee nee tii tii poaje —Jesosa poanaje.

Jesosaja huapa pojjeama poeyanaje

(Macoso 3.31-35; Noca 8.19-21)

⁴⁶Jesosa mimianijo ojaya enaese, oja chahua cuana pea'ai o que poeyanaje. Esecuejo nequinaje. ⁴⁷Majoya Jesosa huohui canaje cuaa: —Miquea enaese, mique chahua cuana esecuejo nequi. Minijje mimi sa poani.

⁴⁸⁻⁴⁹Jesosa saja'a canaje: —¿Ache shai ecuea huapa pojjeama cuana? ¡Bacue! Jiquio ecuea shajja'ajjajji cuana ecuea huapa pojjeama cuana,

ecuea quea jea nee nee ecuea ecue nae quea jea ña jayojja jama. ⁵⁰E'e, ecue Chii eyajo ani; ojjaña jjashajja'ajjaquiani ojaya esohuijo ecuea huapa pojjeama, ecue chahua, ecue jjo'i, ecuea enaese pea'ai —Jesosaa acanaje.

Eso' jeaajaji

(Macoso 4.1-9; Noca 8.4-8)

13 ¹Majoya Jesosa equijo ani cuayaquinaje. Bae sahua huasijje poqui majje anioquenaje. ²Majoya o que jjachichaquinaje dejja cuana quea huiso nee nee. Jamajje bishe yasijje nequisohuaqui majje anioquenaje esohui huohuiya. Dejja cuana meshijajijo aninaje. ³Bishe quecuayijejea cajo, Jesosaa oya sohuihuohui canaje quea huiso nee nee. Pea esohui ona jjashahuabaquijji huohui canaje o ba meesahuajji. Jama acanaje ba'a: ⁴—Ebanajji cuana poquinaje banaa. Eso' jeaaja canijo, oe pojji eso' oquequinaje ejiojji yasijje. Poeyanaje cuichoiji cuana; ijja ca'yonaje eso'. ⁵Pea eso' oquequinaje mei biajje. Meshi chamajo eso' pohua'ajja'yonaje. ⁶Quijje cuayanaje eshequi. Quiyo'yonaje, esajja joca'yonaje, mano'yonaje. ⁷Pea eso' oquequinaje acuisha huasijje. Pohua'yo majje jjonohua bebo ca'yonaje. Tatajo nequi jjajja ajja poanaje. Mano'yonaje. ⁸Pea eso' oquequinaje meshi quea pame yasijje. Pohua'yonaje eso' cuana. Ejjajja quea pame nee nee poanaje. Oe esajo ejjajja iye huiso aninaje; pea esajo ejjajja quea huiso, pea esajo quea huiso nee nee aninaje. Sejja canaje quea huiso nee. ⁹¡Miya jjashajja'ajjaquicue! ¡A'a shajjama' pojji! —Jesosa poanaje.

Esohui eba meesahuajji Jesosaa sohuihuohui canaje ona

jjashahabaqui meejji

(Macoso 4.10-12; Noca 8.9-10)

¹⁰Quijje o shajja'ajjajji cuana poeyanaje Jesosa que. Huohui'ajja canaje: —Jesosa, ¿apiojji miyaya esohui eba meesahuajji quea quehua huohuíaña jiquio dejja cuana huasijje?

¹¹Oya cuana saja'a canaje Jesosaa: —Miya ca ca oe Eyacuiñajjiya ba meesahua cani eya ojjañaja Emeshi Mese nei poaje'yo. Yahuajo ba mee jjima poa. Pea cuana ca ca eba meesahuajji pojjeama. ¹²Jamajjeya joya Eyacuiñajjiya esohui ba cani quea huiso pishana quijje quea huiso ba mee caje'yo. Joya ojaya esohui ba sa po ajjaa ca ca pajea caje'yo. ¹³Jamajjeya eyaya peapea esohui eba meesahuajji huohuinaje o ba meesahuajji. Jamatii ecuea esohui shajja'ajja majje oya cuana jjashahuabaqui ajja, de, shajja'ajja jjima jama acani, de. ¹⁴E'e, oya cuana quea sapa ca'a nee poani. Jamajjeya Eyacuiñajjiya Isaia tehue mee ca poa yahuajo nei nei jama ba'a:

“Shajja'ajja huicha'a huicha'a majje jamatii jjashajja'ajjaqui ajja poaje. Eyacuiñajjiya acani ba huicha'a huicha'a majje jamatii jjashahuabaqui ajja poaje. ¹⁵Quea sapa ca'a nee nee poani, shajja dojjoma' jama, cojjama' jama pea'ai. Ecuea esohui eba jojjemo,

eshajja'ajja jojjemo jjabahuejjaqui'yome. Pea'ai enijje ejjapeequi'yo jjemo eyaya mimishi cuijea'yome”.

Jamaya yahuajo nei nei tehue ca poa etiiquiana Isaiia —Jesosaa acanaje.

¹⁶Jamajjeya Jesosaa o shajja'ajjajji cuana jama acanaje pea'ai ba'a: —Miquianaya ca ca quea cojja ja'a, quea shajja ja'a pea'ai. ¡Jamajjeya quea bihui nee pocue! ¹⁷E'e jojo nei eyaya miya huohuiaña jama ba'a: Quea huiso Eyacuiñajjija esohui huohuijji yahuajo, ojaya epeeji nei yahuajo ba'e pea'ai e ba sa neinei poa. Ecue huohui shajja'ajja sa neinei poa pea'ai. Jamatii ojaya eya ba jjima poa. Ecue huohui shajja'ajja jjima pea'ai poa. E'e jojo nei eya Eyacuiñajjija huoojea'yo ojjaña jaahuanajji. Ma ba sa poa Eyacuiñajjija esohui huohuijji yahuajo nei nei.

Jesosaa esohui ebanajjijo ba mee canaje

(Macoso 4.13-20; Noca 8.11-15)

¹⁸Majoya ojjaña cuana acanaje Jesosaa: —Jamajjeya eyaya miquianaya ba meesahuaje ecuea esohui ebanajjijo. ¹⁹Maya: Beca cuana ejiojji yasijje oquequi eso' cuana cuichojiya ijiajeyo ca'yonaje. Jamaya beca cuana ecuea esohui eya ojjañaja Emeshi Mese oe nei poaje shajja'ajja majje jamatii jjashahuabaqui ajja. Jamajjeya Edosiquiaa o que poe majje ecuea esohui pajea mee cani. ²⁰Beca cuana eso' mei biajje oquequinaje jayojja jama ecuea esohui shajja'ajja majje quea bihui nee enijje jjapeecuajji'ajjaquiiani. Jamatii ecuea esohui jayojja jama ba'e tittii ajja. ²¹Eso' mei biajje pohua esajja joca'yajo mano'yani jayojja jama poani; pea cuaa oya napa cajje Eyacuiñajji nijje jjapeequipajeani. ²²Beca cuana eso' acuisha nijje pohuani jama poani. Acuishaa bebo cajje jjajja ajja jayojja jamaya ecuea esohui shajja'ajja majje jjapee nishoquiiani. Jamatii oya cuana quea bejjo nahue poanijo, aquianajo quea huiso jjashahuabaquiianijo, quea mete pea'ai poanijo Eyacuiñajjijo chaco ajja. ²³Eso' meshi quea pame neejo pohua majje quea jjajja huiso poanaje jayojja jama beca cuana; ecuea esohui shajja'ajja majje jjabahuejjaquiiani; ecuea epeeji quea ja'a nee nee poani, pea cuana ejo jjabahuejjaqui meesahua cani iye huiso pojja'a, quea huiso pojja'a, quea huiso nee nee pojja'a —Jesosaa mahuisoya oya cuana acanaje.

Esohui acuisha cuanajo

²⁴Majoya Jesosaa oya cuana huohui canaje pea esohui eba meesahuajji. Jama poanaje ba'a: —Eyacuiñajjija esohui ejo ebanajjiya eso' bana canaje jama. Eso' ache bame nei quecua canaje quejo, anoso. ²⁵Majoya ojjaña echacojji cuana ecahuijaajo, dejja quea mimishi, o jeabichajeajji epo poeyanaje. Sipone so' quea huiso quehuajje nei jeaajaqui canaje quejo. ²⁶Anoso pohua'yo majje jjajjanaje. Sipone pohuanaje anoso tejje, jjajjanaje pea'ai. ²⁷Quijje pishana equeseja echacojji cuana o que poeyanaje. Jama poanaje ba'a: “Emeshi mese, ¿a'a miquea anoso sipone tejje quecua pojjeama poanaje?” huohui'ajja canaje.

²⁸—Echacojji meseya saja'a canaje: “E'e, quea pame poanaje. Dejja quea mimishiya quehuajje jeaajaqui canaje sipone so' ecuea quejo, de” poanaje.

—Echacojji cuaa huohui'ajja canaje: “¿A'a sipone chiyojeaje'yo?”

²⁹—“Chojja” poanaje equé mese. “Anosoya miyaya chiyojea chana'. Jamatii. ³⁰Ojee sipone nijje catiiquiahua. E'e, majoya anoso jahuajo eyaya huoojeaje anoso sejjajoyjji cuana anoso sejjaa. Sejjajeyo majje anoso chichaje. Ecuea equi yasijje iyanobiaje anoso, ecuea ejaahuanajji. Sipone ca oe caquiyojeaqu'i'yahua pasi'yo majje” poanaje equé mese.

—E'e, jiquio equé meseya sipone dahuajea cani jama dejja mimishi Eyacuiñajjiya acaje'yo. Anoso sejjajeyo majje equijo huana cani jamaya ecuea epeejji aje'yo —Jesosa poanaje.

Esohui acui so' che biso nei neijo motasa bajjanijo

(Macoso 4.30-32; Noca 13.18-19)

³¹Majoya Jesosaa pea esohui eba meesahuajji huohui canaje jama ba'a: —Eyacuiñajjiya ehuohui ojaya epeejji cuanajo jama pea'ai ba'a: Pea eso' motasa che biso nei eso' bana cani equi quibojo. ³²Jiquio eso' che biso nei nei; tii majjeya quea cui quemo nee poaje apo'e cui quemajja. Jamajjeya cuicho'ji cuana poeyani motasa acui biajje cahuiya —jamaya Jesosaa huohui canaje ojjaña ba meejji quijje Eyacuiñajjiya epeejji cuana quea huiso nee, quea ca'a nee poaje'yo.

Esohui eba meesahuajji eshejee meejji

(Noca 13.20-21)

³³Pea esohui eba meesahuajji huohui canaje Jesosaa jama ba'a: —Eponaa pahui dahuajjiya quea huiso nee pohuipohui tejjee oe pojji nei nei eshejee meejji iñahuahuo neinei cani, ojjaña eshejee meejji. Jiquio eshejee meejjiya ojjaña pohuipohui shejee mee cani jamaya poaje ecuea epeejji cuana. Jama ba'a: Jjeya beca cuana jjashajja'ajjaquiani. Majoya aje quea huiso nee ojjaña pojja'a jjashajja'ajjaqui mee caje'yo Eyacuiñajjiyo —Jesosa poanaje.

Esohui eba mee'yojji

(Macoso 4.33-34)

³⁴E'e, jiquio esohui ehuohui'yo cuana Jesosaa ma bishejo nequiya huohui canaje. Esohui eba meesahuajjiyo ca ca oe huohui canaje. ³⁵Jamaya poanijo ohuaya Eyacuiñajjiya esohui huohuijjiya esohui yahuajo nei nei jama acanaje. Jamaya aje yahuajo nei nei Eyacuiñajjiya ojaya esohui huohuijji huohui mee ca poa Jesosajo ba'a:

“Eyaya aje jja esohui huohuije esohui eba meejji. Yahuajo jiquio meshi panajeyo majje ecuea dejja cuana ba meesahua jjima poanaje ecuea ejjashahuabaqui'yojji. Jjeyahua ca ca ecuea ejjashahuabaqui'yojji ba meejje'yo, eyaya”.

Ehuohui'yo siponejo ba mee canaje Jesosaa

³⁶Majoya Jesosaa —Poquia ña —acanaje dejja cuana. Bishejo ani cuayaqui'yo majje poquinaje equi yasijje. Dobiqui majje o shajja'ajjajji cuana o que poeyanaje. Huohui'ajja canaje: —Jesosa, ¡ba meesahuacue ehuohui'yo siponejo! Maya ecuanaja quea quehua.

³⁷Jamajjeya Jesosaa oya cuana huohui canaje: —E'e, eya ojjañaja Edoe Mese anoso banajji nei nei jama. ³⁸Que quea pame jayojja ojjaña dejja ojjaña meshijo ba'e cuana. Eso' quea pame nee Eyacuiñajjija epeeji nei jayojja jama. Sipone so' quea tai jayojja eshahuaja epeeji cuana. ³⁹Joya dejja sipone so' jeaajjiji epo jayojja jama dejja mimishi, e cuiajji nisho epo, Edosiquiana, de, Satanasa. Jiquio ecua epojja anoso jahuajo sejjajeyo ca'yonaje jama meshi oe poaje. Joya anoso sejja'yojji ca ca Eyacuiñajjija esohuidojojji cuana jama. ⁴⁰Jamajjeya jiquio ecua sipone pasi'yo majje dahuajea canaje jayojja jamaya poaje dejja mimishi meshi oe poajo.

⁴¹—E'e, eyaya ojjañaja Edoe Meseya esohuidojojji cuana huoojeaje dejja mimishi cuana ñaa, ona mimishi po meeji poani pea'ai ñaa. ⁴²Ña majje jeajea caje'yo cuaqui quea quiyo nee nee yasijje. Jomajo pa neinei'e'yo; ese' ijjaiyajjea caje'yo cuaqui quea quiyo nee neejo. ⁴³Ecuea epeeji ca ca ecuea esohui jama acanijo ba'e tiitiije'yo eyajo eseja Chii nijje quea ja'a nee nee, eshequi ja'ajja, de —Jesosa poanaje.

Aquiana quea nahue ehuanaquehua'yo

⁴⁴Majoya Jesosaa huohui canaje pea esohui eba meesahuajji jama ba'a: —Eyacuiñajjija esohui cuana ojaya epeeji cuanajo jama pea'ai ba'a: Quejo aquiana pame quea nahue nee nee ba majje dejja jjataqui canaje jomajo tii. Majoya oya quea bihui nee poquinaje. Ojjaña ojaya aquiana cuana dojo canaje; quia canaje que sosejje. Jiquio ecua aquiana quea nahue nee nee jjeshe canaje jama jayojja dejja Eyacuiñajji nijje jjapeequiani —Jesosa poanaje.

Pea esohui aquiana quea nahue nee neejo

⁴⁵—Eyacuiñajjija esohui ojaya epeeji cuanajo jama pea'ai ba'a: Dejja aquiana nahuejjiya sa'ajja tiitii canaje mei sisi siyosiyi copocopo quea nahue nee. ⁴⁶Oe mei sisi siyosiyi copocopo quea nahue nee nee ba majje ojjaña ojaya aquiana quiaa dojo canaje mei siyosiyi quea pame nee nee jjeshejji. Eya ca ca ña mei quea nahue nee nee quea pame nee nee jama, ojjaña jaahuanajji —Jesosa poanaje.

Esohui nahuoo cuiashajjijjo

⁴⁷—E'e jojo nei pea ba'eme epojji jamaya pea'ai ba'a: Nahuoo cuiashajjiji jea cani cuaa bae yasijje. Nahuoo cuiashaja cajje dobiquiani. Peapea nahuoo cuiashaja cani. ⁴⁸Quea huiso yanijo nahuoo cuiashajjiji cuaa meshijaji sahua

huasijje jjequisohua cani. Majoya pejo majje nahuoo cuana ba cani. Ojjaña nahuoo quea pame nee bio cani jjepai yasijje; peajja ijija ca ajja jojoya ca ca jeajea cani. ⁴⁹Jamaya poaje e poe o'oyajo. Esohuidojojji cuana poeje; Eyacuiñajjija epeeji cuana ojjaña quea pame ba'e chicha caje'yo. Dejja mimishi cuana ca ca jeajea caje'yo cajaajojo. ⁵⁰Cuaqui quea quiyo nee nee yasijje dobiquire'yo tii tii. Jomajo siasia'yoquiije tii; ese' ijjiayajjea caje'yo quea nee poanijo —Jesosa poanaje.

Esohui eyacua

⁵¹Majoya Jesosaa oya cuana huohui'ajja canaje: —¿A'a ecuea esohui quea ja'a nee? ¿A'a jjabahuejjaquinaje?

—E'e, quea ja'a nee.

⁵²Jamajjeya Jesosaa o shajja'ajjajji cuana acanaje: —E'aquiana meseya ojaya aquiana cuana etii, aquiana eyacua pea'ai ojjaña cuana huohui'ajja cani. Jiquo ecua pea huohui'ajja pea huohui'ajja acani jayojja jama esohui huohuijji poani, jjabahuejjaqui majje, Jodio esohui huohuijjiya Eyacuiñajjija esohui yahuajo etehue'yo, ecuea esohui eyacua pea'ai pea cuana ba meesahua cani —poanaje.

Jesosa Nasanena meshi yasijje poquinaje

(*Macoso 6.1-6; Noca 4.16-30*)

⁵³Majoya esohui huohuipajje majje Jesosa jomajo ani poqui o'oyanaje ojaya cuiñajji yasijje, Nasanena huasijje. ⁵⁴Jodioja equi ojee ejjachichaquijji yasijje dobiquinaje. Esohui huohui canaje. Ojaya esohui shajja'ajja majje Nasanenajo ba'eca cuana quea tecue poanaje. Oya Jesosa Joseja jea poso acanaje cuaa: —¿Yajjajje shai jiquio dejjaa Jesosaa esohui quea ja'a nee nee huohui cani, de? ¿Eyacuiñajji jayojjaya jjaajaqui mee cani emanojaa quea huiso nee, de? ⁵⁵Oya aje oe acui cacajji nei nejja bacua ejja pojja'a, oja nae Mania bajjani, oja chahua cuana Jacobo, Jose, Simohui, Jonasa pea'ai bajjani. ⁵⁶Oja jjo'i cuana pea'ai jiquiojo ba'e, de. Jamajje ¿achejo joya Jesosaa ojjaña jiquio esohui ba canaje so'o? —jamajjeya quea quene poanaje Jesosa nijje. Joseja jea poso cajaa acanaje.

⁵⁷Jamajjeya Jesosaa oya cuana jama acanaje ba'a: —E'e de, pea cuaa Eyacuiñajjija esohui huohuijji shajja'ajja cani. Jamatii oja meshijo ba'e cuana ojaya huapa pojjeama cuana ca ca oe jhashajja'ajjaqui sa po'yo ajja.

⁵⁸Jamajjeya oya cuana jhashajja'ajjaqui sa po ajja. Jesosa Eyacuiñajjija bacua pojjeama posojo, ohuaya emanojaa cuana oe pojji jjaajaqui mee ca'yonaje, ma dejjaa ajjima acani oe pojji nei acanaje Nasanenajo, Jesosaa.

Enodeya Huani sapa jajasejjajjea mee canaje

(*Macoso 6.14-29; Noca 9.7-9*)

14 ¹⁻²Jesosa Janinea meshijo anijo, Janinea meshi mese Enode bajjaniya shajja'ajja canaje onaja ehuohui'yo Jesosajo. Ma Enode pea emeshi mese, Enode pea'ai bajjani. Oya emeshi mese Enodeja bacua ejja; oya Enode

Antipa bajjani pea'ai poanaje. Shajja'ajja majje ma Enodeya Huani shequi o'oya posoya acanaje: —E'e de, jiquio dejja aje oe Huani, ma ona besameejji poa. E'e pojja'a oya mano'yo majje shequi o'oyanaje. Jamajjeya ohuaya Eyacuiñajjitya jayojjaya acani —jamaya ohuaya ojo chacochoacoani acanaje.

Yahuajo nei Jesusajo shajja'ajja jjimahuajo ma Enodeya Huani sapa jajasejjajea mee canaje. ³E'e, yahuajo ma emeshi mese Enodeja edoe mese Penipeja ehuanase Enodiasi bajjani Huani nijje quea quene poa. Jamajjeya ma Enodeya Huani iña mee canaje; jeanobiajeda mee canaje. ⁴E'e, Huaniya yahuajo ma Enode jama tecueame aca poa ba'a: —¡Miyaya aje oe mique doeja Penipeja ehuanase Enodiasi a'a huana'yojji! Jamaya pojjeama Jodioja etehue'yo; quea mimishi.

⁵Jamajjeya ohua tecuea cajje quenequenaje Huani nijje. Quecua sa aca poa. Jamatii quecua jjima; quea mete poanaje pea Jodio cuanajo. E'e, quea huiso Jodio cuana jjashahuabaquinaje Huani Eyacuiñajjitya esohui huohuijji nei nei poanaje. ⁶Jamatii ma Enodeya o cuaya poa pojja'o ojaña ojaya epeejji cuana iyaa canaje ojee ijia'ijjiaa, majamajaqui baa pea'ai. Enodiasija bacuase pea'ai oe nei majamaja nequinaje ojjaña ebañji, quea bihui nee epo meejji. Enode Antipa quea bihui nee nee poanaje epona sho'ijo. ⁷Jamajjeya onijje miminaje jama ba'a: —¿Ae shai sa poani miya? ¡Huohuicue mo! Eyaya miya quiaje. E'e jojo nei nei she, coya miya sañaya aje mi quiaje —acanaje Enodeya.

⁸Jamajjeya epona sho'i poquinaje ojaya enaese Enodiasi huohuiya.

—E'e —oja nae poanaje—, e'e ¡Huani sapa jajasejjajea meequicue, she!

Epona sho'i poe o'oyanaje Enode que. Huohui canaje jama ba'a:

—Huani, ma ona besameejji poani ejeanobia jaa. ¡Ojaya esapa jajasejjajea'yo majje piatojo jjequicue jjeyahua nei! Maya eya sa poani.

⁹Shajja'ajja majje emeshi mese Enode quea ajajja nee nee poanaje. Jamatii ojaya esohui epona sho'i nijje ojaña ojaya epeejji cuana shajja'ajja canaje. Jamajjeya ojaya esohui pajea ajja, Enodeja. Jamajjeya ohuaya sohuinano cuana huoojeda canaje: —¡Epona sho'ija esohui jayojja jama acue! ¹⁰¡Huani ma ejeanobia jaa oe sapa jajasejjajeaquicue! —poanaje.

¹¹Jjeya nei sohuinano cuana poquinaje Huani que. Huani sapa jajasejjajea ca'yonaje. Esapa jjequi canaje piatojo. Epona sho'i quia canaje. Majoya ohuaya Huanija esapa oja nae yasijje quia cañaqu'yonaje, epona sho'lya.

¹²Majoya Huani shajja'ajjajji cuana poe'yonaje o dojo'yohua emojea'yoyji. Mojea'yo majje papoqui'yonaje Jesosa huohuiya.

Jesosa 5.000 dejja cuana bobia canaje
(*Macoso 6.30-44; Noca 9.10-17; Huani 6.1-14*)

¹³Jesosa Huani emano'yo shajja'ajja majje o shajja'ajjajji cuana nijje sohuaquinaje bishe aijo quima huasijje.

Jamatii ma ba majje quea huiso dejja cuana cuiñajji cuanajo ba'e ejiojjijje poquinaje Jesosa baa. Poquicuajinaje ma Jesosa besapoquije yasijje. Onaya jjaja ebionei aniñajinaje Jesosa hui que añaquia. ¹⁴Quijje pishana Jesosa

o shajja'ajjajji cuana nijje ba'eñaquinaje. Bishe aijo ani nequisohuaquinaje etaja huasijje. Quea huiso nee nee dejja cuana ba cañaquinaje. Onajo quea yeno jjashahuabaquinaje, quea huiso emanojaajo, quea nee jaajo pea'ai. Jamajjeya ojjaña huaquia mee ca'yonaje, jjaajaqui mee ca'yonaje, Jesosaa.

¹⁵Siniajo Jesosa que poe majje o shajja'ajjajji cuaa huohui canaje jama ba'a: —Jesosa, sinia coma, de. Jiquiojo chama' equi, chama' bobi pea'ai. ¡Dejja cuana huoojeacue cuiñajji sisi cuana huasijje oja bobi jjesheya!

¹⁶—Chojja. Ca'aniahua cuana. ¡Bobiacue oe miquiaaya! —Jesosaa acanaje.

¹⁷—¿Yajja yajji? Oya cuana quea huiso nee nee aña ebobajji. Ecuanaja bobi oe pojji yani. Me oeje pahui, beca nahuoo sisi pea'ai yani —poanaje cuana.

¹⁸—¡Comaya jjajja oe yacua yecue! —Jesosa poanaje—. ¹⁹Ojjaña cuana jama acue pea'ai ba'a: “¡Ojjaña anioquecuc sipone biasje!” acue.

Anioque mee canaje sipone biasje. Majoya pahui me oeje huiso, nahuoo sisi becanejjijji pea'ai jjeshe majje Jesosaa eyahuasijje jjabajeasohuaquinaje. Eyacuiñajji bihuia canaje. Eyacuiñajji nijje bobijo mimi majje pahui miji canaje, nahuoo sisi pea'ai. O shajja'ajjajji que quia canaje, Jesosaa. Majoya ohuaya bobi quia canaje dejja cuana huasijje. Quia ca poquije quea huiso nee nee jJapanaquipoquipoquinaje bobi, de. ²⁰Ojjaña jeje majje eshajja'ajjajji cuaa chicha ca'yonaje bobi ojjañaja ijjiasejja. Jjepai ai yasijje iya ca'yonaje. Quea huiso nee poanaje; 12 jjepai huismo bobi e'ijjiasejjaja ecuatateja poanaje. ²¹Quea huiso nee nee bobi ijji mee canaje, de, 5.000 dejja. Epona cuana, esho'i cuana pea'aiya quea huiso nee nee ijji canaje.

Jesosa bae ena biasje poquinaje

(Macoso 6.45-52; Huani 6.16-21)

²²Majoya siniajo Jesosaa o shajja'ajjajji cuana huoojea canaje. Jama acanaje ba'a: —¡Bishe ai yasijje nequisohuaquicue! ¡Bae ojje miji yasijje besapoquicue! Quijje eya poquije mi que pea dejja cuana quea huiso nee nee cuana huoojea'yo majje —poanaje.

²³Majoya dejja cuana quea huiso cuana huoojea'yo majje eyiyo huasijje jaasohuaquinaje oe nei oja Chii nijje mimiya. Mecajje Jesosa oe nei aninaje eyiyojo. ²⁴Jesosa eyiyojo anijo o shajja'ajjajji cuaa bishe ai quea huesha nee dojo canaje. Bae yiyesamajo o epojo beni quea quemo poeyanaje. Enashajohua bishe ai janobajjima nei nane canaje, cuio canaje enaa. ²⁵Mecashono Jesosa eyiyojo ani o que poquinaje ena biasje. ²⁶O shajja'ajjajji cuaa Jesosa quea huesha pishana ena biasje jeojejebeje ba majje quea ajjajja nee nee poanaje. Quea metejo taaanaje; jama poanaje ba'a: —¡Coya ae shai poeje ba'a! —siasianaje—. ¡Coya eshahua, de!

²⁷Jamajjeya Jesosa onijje miminaje. Jama poanaje ba'a: —¡A'a quea mete pojji! Eya jja iña iquio, eshahua pojjeama. ¡Quea jaji nee pocue!

²⁸Jamajjeya Penohua jama huohuime acanaje ba'a: —Ecuea Emeshi mese, miya enequiya jjejojya, ¡eya mi que poqui meecue ena biasje!

²⁹—E'e Peno, ¡poecue! —oya acanaje Jesosaa.

Jamajjeya Peno bishe aijo ani nequioquequinaje. Ena biajje Jesosa que poquinaje. ³⁰Jamatii poqui pishana majje beni tii tii, enashajo quea quemoo nee nee ba majje metenaje, de. Mete majje jaadobi'ajjaquinaje Peno. Taaanaje: —Jesosa, ¡eya hui'ije'yo! ¡Ñacue mo, oe! —poanaje.

³¹Jesosa me' ñacuaji canaje. Peno jama acanaje ba'a: —¿Apiojji acuae mi meteani so'o? ¿A'a eya quea ca'a nee nee miquea ba jjima?

³²Majoya Jesosa Peno nijje bishe ai yasijje anisohuaqui'yajo beni nequioquequinaje. ³³Jamajjeya ojjaña cuana bishe aijo aniya Jesosa bihuia canaje. Jama poanaje ba'a: —¡E'e jojo nei miya Eyacuiñajjija Bacua Ejja oe nei!

**Cuichi cuana hui'i ca ya poa meshi yasijje Jenesane' meshi
yasijje besapoqui o'oyanaje
(Macoso 6.53-56)**

³⁴Majoya bae ai ojje miji yasijje Jenesane' meshi yasijje besapoqui o'oyanaje Jesosa. Ba'eñaquinaje. ³⁵Dejja cuanaja jomajo ba'eya Jesosa eba poanaje yahuajo. Jamajjeya oya ba o'oya majje ojjaña cuana iyaa meequi canaje Jesosa que. Jamajjeya ojjaña emanojaaca cuana Jesosa que ye canaje. ³⁶Jama huohui'ajjame acanaje cuaa ba'a: —Jesosa, ¡ojjaña emanojaaca cuana che mique daqui ña'ajja meecue ehuaquia'yojji! —acanaje.

Ojjaña oja daqui cuema ña'ajja majje jjaajacuajiqui'yonaje, huacia'yonaje pea'ai, de.

**Dejja quea jjashahuabaqui tai po majje quea tai poani
(Macoso 7.1-23)**

15 ¹Majoya Paniseo cuana Jodio esohui huohuijji cuana pea'ai Jenosanenajo ba'e Jesosa que poeyanaje. Oya huohui'ajja canaje: —Esohui huohuijji, ¿apiojji acuae mi mi shajja'ajjajji cuana etiiquianaja ehuhui'yo jama po ajja? ²E'e, ijja'ijjia jjimahuajo eme' topo neinei ajja, de.

³Jesosa saja'a canaje jama ba'a: —Miquianaya acuae ¿ae poani pea'ai? ¿Apiojji acuae miquianaaya Eyacuiñajjija esohui pajea'yaña etiiquianaja ehuhui'yo yajji nisho? ⁴E'e, Eyacuiñajjija esohui jama poani ba'a: “¡Mique chii, miquea enaese etii pea'ai jaahuanacue! ¡Joya oja chii, oja nae pea'ai cajaa acajo cajajahuejjajea ca'yahua cuaa, meiya!” ⁵Miyaya ca ca jama huohui taima yaña ba'a: “Dejja oja chii etii nijje, oja nae etii nijje pojja'a mimije jama ba'a: “Eyaya miya eba'e meesahuajji pojjeama. Chojja, eyaya ecuea aquiana Eyacuiñajji yasijje quiaña o bihuiajji”.

⁶Jamajjeya oja chii etii, ojaya enaese etii pea'ai pajea meeaña. Pea'ai Eyacuiñajjija esohui pajea mee'yo sa ña etiiquianaja ehuhui'yo yajji nisho. ⁷¡Miya ca mi ca oe jjadasiaquijji nei nei! Eyacuiñajjija esohui huohuijji Isaiaja esohui mijo e'e jojo nei yahuajo nei poa. E'e, yahuajo nei Eyacuiñajjija Isaija tehue mee ca poa jama ba'a:

⁸“Jiquio dejja cuanaa eya bihuia nisho cani. Jamatii jjashajja'ajjaqui ajja.

⁹Jamajjeya ecuea equi yasijje jjachichaquiani ejjachichajequijji. Ohuaya ojaya ejjashahuabaqui'yojji huohui cani, ecuea esohui pojjeama”.

Jamaya Isaiaa yahuajo nei tehue ca poa miqúanajo —Jesosa poanaje.

¹⁰Jamajjeya Jesosaa pea cuana huasijje jama huohuime acanaje ba'a: —¡Shajja'ajjacue, jjabahuejja neinei quicue oe! ¹¹Bobi cuana, ojjaña aquiana enabajje dobiqúanajo pojjeama miqúanaya quea mimishi poani. Chojja. Quea jashahuabaqui tai po majje esohui quea tai enabajje cuayaquíanajo ca ca quea mimishi poani. Eyacuiñajjiya miqúanaya ba caní quea mimishi —Jesosaa acanaje.

¹²Quijje o shajja'ajjajji cuaa Jesosa huohui canaje jama ba'a: —Jesosa, miquea esohuijo Paniseo cuana quea quene poani minijje —poanaje.

¹³Jesosaa oya cuana saja'a canaje jama ba'a: —Ojjaña acuí ecue Chiija eyajo anija bana pojjeama ohuaya chiyojea caje'yo jiquio ecua ohuaya ojaya epeeji nisho acaje'yo jama. ¹⁴Jamajjeya ja'a Paniseo cuanajo quea mete pojji! Oya cuaa aje oe esohui huohui caní quea tai, quea ja'a pojjeama. Cojjama' jayojja jama poani, de. Cojjamaa pea cojjama' mepejejea caní jayojja o pea'ai oquejeaquije'yo jjani yasijje. Cojjama' jayojja dejja mimishi pea dejja mimishiya dojo cajje cuaqui yasijje poquije'yo onijje tii —jamaya Jesosaa acanaje.

¹⁵Penohua Jesosa huohui'ajja canaje: —Jesosa, ecuanajaya ca ca esohui quea quehua miquea. ¡Ba meesahuacue mo!

¹⁶—¿A'a ecuea esohui miqúanajaya ba jjima pea'ai? —Jesosa poanaje—. ¿A'a miquea eba pojjeama? ¹⁷Ojjaña bobi, pea aquiana pea'ai enabajje ijiajea see ai yasijje dobiqúaní. Quijje jamatíi seejea caje'yo. ¹⁸Joya quea tai jashahuabaquíaníya ca ca esohuí tai jeacuaya caní. Maaya oya quea tai po mee ca'yani; quea mimishi Eyacuiñajjiya oya ba caní. ¹⁹E'e, jashahuaba taiqui majje pea quecua caní, onaja eponajo ba'e sa poani, peaja yahuejo ba'e sa poani, quehuajje cojjo caní, sii caní, siajje poani, mimijajiani pea'ai. ²⁰E'e, joya jama acanijo Eyacuiñajjiya ba caní quea mimishi; bobi ijia caní eme' shacua neinei jjimajo pojjeama quea mimishi poani.

Cananea epona Jesosa que poeyanaje

(Macoso 7.24-30)

²¹Majoya Jesosa Jenesane' meshijo ani poquinaje Sinono meshi yasijje, Tino meshi yasijje pea'ai. ²²Jomajo poquiani oe Cananea epona ma meshijo ba'e o que poeyanaje. Oya Jodio pojjeama. Jamatíi ejiojjijje poquije taaa majamaja poquinaje: —Emeshi Mese nei, Dabija osecua, ¡ejo jashahuabaquicue! Ecue bacua piona quea sapa niñe jaa. Quea nee nee poani, quea mano.

²³Jamatíi Jesosaja oya saja'a jjima. Jamajjeya ojaya eshajja'ajjajji cuana Jesosa nijje miminaje: —Jesosa, ¡epona huoojeacue! Joya ese nijje taaajebeje.

²⁴Jamajjeya oya cuana saja'a canaje Jesosaa: —Oya Jodio pojjeama. Eyacuiñajjiya eya huoojea canaje Jodio cuana sa'ajja'yohua. Oya cuana ñajjajja ecuaquisho'yo jayojja jama poquiquehuani Eyacuiñajjijo.

²⁵ Jamatii epona Jesosa que poe majje ecui'oshajjajo nequiñanaje; jama poanaje ba'a: —Emeshi Mese nei, ¿ecuea ebacua piona jjaajaqui mee'yocue, quea mano nee nee jaa!

²⁶ Ma epona Jodio pojjeamajo huapa jayojja saja'ame acanaje Jesosaa: —¿A'a acuae ecue bacuaja bobi jeaje iñahuehua que? ¿A'a cuae jamaya quea pame? —poanaje.

²⁷ Epona quea shoe jama jjejojo jama poanaje ba'a: —E'e, Emeshi Mese. Jamatii o huonejjiya ijia canijo, iñahuehuua ehuonejjiya ijjiasejja ca'ijjia cahua —poanaje.

²⁸ —Epona, miya ca mi ca oe quea ja'a nee, quea pame nee ojo jjashahuabaquiiani. Jamajjeya eyaya miquea esohui jayojja jama aje'yo. Jjeya nei miquea ebacua piona jjaajaqui meeje'yo —Jesosaa acanaje.

Jamajjeya jjeya nei oja bacua piona jjaajaqui'yonaje; quea aja nee po'yonaje.

Jesosaa quea huiso emanojaaca huaquia mee ca'yonaje

²⁹ Majoya Jesosa jomajo ani ejiojjijje poqui o'oyanaje Janinea bae sahuajje. Eyiyo huasijje jaasohuaqui majje anioquenaje. ³⁰ Quea huiso nee nee poeyanaje; o que jjachichaquinaje. Jjequi canaje emanojaaca cuana: quibojjisha cuana, cojjama' cuana, jiojjijjajja cuana, mimi'ajja cuana pea'ai, peapea epo'yo cuana pea'ai huanaoquea canaje cuaa Jesosa pejeje ejaajaqui'yojji. Ojaña cuana jjaajaqui mee ca'yonaje, huaquia mee ca'yonaje, de, Jesosaa. ³¹ Ba majje ojaña cuana quea bihui nee nee poanaje. Eyacuiñajji bihuia neinei canaje: —E'e, e, mimi'ajja cuana quea ja'a mimi mee ca'yonaje; jiojjijjajja jeo mee ca'yonaje; quibojjisha jjaquibopiqui mee ca'yonaje; cojjama' quea cojja ja'a po mee ca'yonaje, jjabaqui mee ca'yonaje pea'ai. Ma ecua ohuaya jjaja'aqui jjimahua Isaeni cuana nijje acaninaje, jamaya aje jja oe jjeya acani, Jesosaa —acanaje cuaa.

Jesosaa quea huiso cuana bobia canaje, 4.000

(Macoso 8.1-10)

³² Majoya Jesosaa o shajja'ajjajji iyaa canaje. O que poeyajo huohui canaje jama ba'a: —Jiquio dejja cuana enijje poani beca cahuime. Ojaya bobi oe poanaje. Jamajjeya ojo eya quea yeno jjashahuabaquiiani bobimajo. Oja equi yasijje huoojja sa po'yo ajja. Quea shoe nee nee; ejiojjijo bobi yasijje po chana'.

³³ O shajja'ajjajji cuaa Jesosa saja'a canaje: —Jiquiojo chama' bobi, dejjama'. ¿Yajja yajji? Oya cuana quea huiso nee nee ebobiajji. ¿Achacua pahui ejjeshejji ojaña bobiajji?

³⁴ —¿Ache huiso pahui miquea yani? —Jesosaa huohui'ajja canaje.

—Me oejje beca pea'ai, 7 pahui yani. Nahuoo sisi oe pojji yani pea'ai —acanaje cuaa.

³⁵ Jamajjeya Jesosaa ojaña ejjachichaquiiani cuana jama acanaje ba'a: —¡Meshijo anioquecue! —acanaje.

³⁶Majoya ma 7 pahui, nahuoo sisi pea'ai jjeshe majje Eyacuiñajji nijje, oja Chii nijje miminaje bobijo. Pahui, nahuoo pea'ai miji canaje, Jesosaa. O shajja'ajjajji que quia canaje. Majoya ohuiya dejja cuana huasijje quia canaje. Quia ca poquije quea huiso nee nee jjapanaqui poquipoquinaje, bobi. ³⁷Jamajjeya ojjaña cuaa ijja canaje, quea jeje poanaje, de. Ijja majje o shajja'ajjajji cuaa bobi e'ijjiasejja jjepai aijo chicha ca'yonaje. Quea huiso poanaje, 7 jjepaime. ³⁸E'e, dejjaa quea huiso nee neeya bobi ijja canaje, 4.000 dejjaa. Quea huiso nee epona cuana, esho'i cuana pea'aiya ijja canaje. ³⁹Majoya Jesosaa ojjaña cuana huoojea canaje ojaya equi yasijje. Majoya Jesosa o shajja'ajjajji cuana nijje bishe ai yasijje nequisohuaquinaje. Besapoquinaje ojje, pea meshi yasijje, Majadana meshi yasijje.

Jodio etiiya Jesosaa acani quea pame ba sa acanaje

(Macoso 8.11-13; Noca 12. 54-56)

16 ¹Majoya Paniseo cuana, Sanoseo cuana pea'ai poeyanaje Jesosa que. Oya cuaa Jesosa Eyacuiñajjija huoojea'yo pojjeama poso acanaje. Jamajjeya jama anisho canaje ba'a: —Esohui huohuijji Jesosa, ¿a'a miya Eyacuiñajjija huoojea'yo nei ojjaña jaahuanajji pojja'a? ¡Ejjaba'ajjaqui so'o! ¡Eyacuiñajjiya jayojja jama acue ecuanaja ebajji! ¡Eyajo oe panacue! —acanaje Paniseo cuaa.

Jamatii Paniseo cuaa Jesosa Eyacuiñajjija huoojea'yo pojjeama poso acanaje. Jamajjeya pea Paniseo cuana nijje jama poanaje ba'a: —Chojja, Jesosa Eyacuiñajjija huoojea pojjeama. Jamajjeya Eyacuiñajjiya jama pojjeama mi pana cajo, capajea ca'yahua.

²Jesosaa oya cuana saja'a canaje: —Eshequi oquequajo bo huo'ohuo'o poanijo miquianaaya huohuiaña: “E'e, de, mecahuajje quea jea poaje eshequi, ena epojji pojjeama”. ³Mecajjeahua ca ca quea apo nee nee poanijo miquianaya jama poani ba'a: “E'e de, quea apo; ijjea ena poaje”. E'e —Jesosaa poanaje—, eyahuasijje bo ba majje miquianaaya huohuiaña ena chama' pojja'a, ena poaje pojja'a. Jamatii Eyacuiñajjija esohuijo miquianajaya ba jjima ache shono ojjaña jaahuanajji poeje. ¿Apiojji miquea ba jjima? ⁴Miquianaaya Eyacuiñajjija esohui pajea yaña. Jamajjeya Eyacuiñajjiya pana cani ba majamaja sa poani. Jamatii Eyacuiñajjiya Jjona yahuajo nei nei aca poa jayojja jama ohuaya jjeyahua acaje miquea ebajji.

Jamajjeya Jesosaa oya cuana jea cana'yonaje jjabahuejjaqui ajjajojo.

Paniseoja esohui tai pahui shejje meeji jayojja

(Macoso 8.14-21)

⁵Majoya bae ojje miji yasijje besapoquianijo Jesosa shajja'ajjajji cuana jjashahuabaquinaje. Jama poanaje ba'a: —E'e de, ecuanaa bobi pajea'yonaje.

⁶Jamajjeya Jesosaa oya cuana huohui canaje: —¡Quea ja'a nee jjashahuabaquicue! Paniseo cuana, Sanoseo cuana pea'aija pahui shejje meeji miya quea tai poaje.

7 Jamajjeya o shajja'ajjajji cuana ojee mimimiminaje: —E'e pojja'a oya jama poanaje ecuanaja pahui ye jjimajo.

8 Ojaya ejjashahuabaqui'yojji Jesosaja eba poanaje. Jamajjeya oya cuana acanaje: —¿Apiojji acuae jja nequiana ojee mimimimiani pahuijo? ¿A'a jja nequianajaya eya ba jjima quea ca'a nee nee? 9 ¿A'a jja quiana ejo jashahuabaqui jjima tii? Eyaya me oeje pahui miji majje quea huiso dejja bobianaje, 5.000 dejja. ¿A'a jja miyaya maya pajea'yonaje? Ijjia'ijjiajeyo majje acuae jjaya ¿ache jjepai huiso chicha'yonaje pahui? 10 Oya jayojjaya me oeje beca pahui, 7 pahui miji majje quea huiso dejja bobianaje, 4.000 dejja. Majoya miyaya pahui ¿ache jjepai huiso chicha'yonaje so'o? ¿A'a ya pajea'yonaje? 11 Eyaya miquianaya huohuinaje jama ba'a: “Paniseo, Sanoseo pea'aija pahui shejje meejjijo quea tai miya poaje” —Jesosa poanaje.

12 Jamajjeya o shajja'ajjajji cuana jjabahuejjaquinaje Jesosaa huohui cajje: —E'e, Paniseo, Sanoseo pea'aija ehuohui taijo se quea tai poaje; pahui shejje meejjijo pojjeama Jesosaa huohui canaje —poanaje.

Penoja esohui quea pame Jesosajo
(Macoso 8.27-30; Noca 9.18-21)

13 Majoya Jesosa Pinipo meshi yasijje poquinaje. Sesanea huasijje poquijeya o shajja'ajjajji huohui'aija canaje Jesosaa: —Dejja cuana acuae jja ¿yajja poani ejo, ojjañaña Edoe Mesejo? ¿A'ya cuae eya?

14 Oya cuaa saja'a canaje: —Beca cuana jja jama poani ba'a: Miya Huani, ma ona besameejji poa shequi o'oyanaje poso ca jja mi ca acani. Pea cuana aje jja oe jama poani: Miya Enia, Eyacuiñajjija esohui huohuijji yahuajo nei nequia poa. Pea poani jama ba'a: Miya Jenemia pojja'a pea esohui huohuijji yahuajo nei nequia poa pojja'a. Oya cuana yahuajo nei mano'ya poa shequi o'oyanaje poso ca jja mi ca acani cuaa —poanaje o shajja'ajjajji.

15 Jamajjeya Jesosaa oya cuana huohui'aija canaje: —¿Miya acuae yajja poani ejo? ¿A'ya cuae eya?

16 —¡Miya ca ca Eyacuiñajjija Bacua Ejja oe nei, oja huoojea'yo ojjaña jaahuanajji! —Simohuiya Jesosa saja'a canaje.

17 Jamajjeya Jesosaa oya jama acanaje ba'a: —Simohui, Jjonaja bacua, ¡quea bihui nee pocue! Ecue Chii eyajo aniya miya ba meesahua cani eya oja huoojea'yo ojjaña jaahuanajji. Dejjaa pojjeama miya ba meesahua cani, de.

18 Jamajjeya eyaya miya huohuiaña miya bajjani aje Peno, esejaya esohuijo Mei bajjani. Eyacuiñajjija esohui e'e jojo nei ejo eyaya miya huohui meesahuaje'yo ecuea epeeji cuana quea ca'a nee epo'yojji. Equi mei jiyo nei jayojja jama quea ca'a nee nequi tii jayojja jama ecuea epeeji cuana quea ca'a nee nequi tiitijje'yo; ejeabichajea'yojji pojjeama Edosiquianaja, eshahua cuanaja pea'ai.

19 —Eya Emeshi Mese nei jiquio meshijo poaje'yo. Jamajjeya aje miya huoojeaña ecue sohui huohuiya. Ecuea esohui esecue ca'apejojji jayojja jama eyahuasijje edobiqui mee'yojji. Jamajjeya ecuea esohui ba majje miyaya

huohuije ache eba'ejji quea mimishi Eyacuiñajjija boti'ama. Miyaya huohuije pea'ai ache eba'ejji quea pame nee Eyacuiñajjija eyajo anija quea boti nee.

²⁰Majoya Jesusaa o shajja'ajjajji cuana huohui neinei canaje jama ba'a: —E'e, eya Eyacuiñajjija huoojea'yo ojjaña jaahuanajji. Jamatii ja'a oe jihuhuijji so'o! —poanaje.

Ojaya emano'yojjijo Jesosa miminaje
(*Macoso 8.31-9.1; Noca 9.22-27*)

²¹Majoya Jesusaa o shajja'ajjajji cuana huohui coo canaje ojaya emano'yojjijo: —Eya quijje Jenosanena huasijje poquije. Jomajo Moisesija etehue'yo huohuijji cuaa, Jodio etii bajjani cuaa pea'ai, Eyacuiñajji nijje emimijji etii cuaa pea'ai eya quea huiso cuia caje'yo. Quea nee nee poaje'yo eya. Quijje ya mo manoje'yo ohua me caca mee cajje. Jamatii beca cahuime po majje mo shequi mee caje o'oya ecue Chiia —acanaje.

²²Jamajjeya Peno quea yeno nee poanaje Jesusajo. Oya oe nei iyaa canaje, Penohua. Jama poanaje ba'a: —Chojja, ecuea Emeshi Mese, miya Eyacuiñajjiya jaahuana caje'yo. Peaa aje oe miya enapajji pojjeama, equecua'yojji pojjeama jja mi, de.

²³Jamajjeya aje jja oe Jesusaa oya Peno cojja ba neinei cani jama tecueame acanaje ba'a: —Peno, ja'a jamaya mimijji! Miya e dasiajji nisho epo jayojja mimiani. Miya Edosiquiana Satanasa jama mimiani. Jjashahuabaquiani quea tai, dejja jama; Eyacuiñajjija ejjashahuabaqui'yojji jama pojjeama —poanaje.

²⁴Jamajjeya Jesosa ojjaña o shajja'ajjajji nijje jama miminaje ba'a: —¡Ojjaña joya enijje e'e jojo nei jjapeequi'yo sa poani Eyacuiñajjija esohui jayojja jama ba'ecue! E'e, e jayojjaya jja enijje capoquiahua, jamatii onaa napa cajje aje jja oe quea nee poaje'yo pojja'a. ²⁵E'e, ojjaña joya Eyacuiñajjija esohui jayojja jama ba'e sa po ajja aje oe ba'e tiitii ajja enijje. Joya ecuea esohui jayojja jama ba'e sa poani ca ca ba'e tiitii'e'yo enijje eyajo. ²⁶E'e pojja'a dejjaa quea huiso nee nee aquiana ojaya yajji chicha caje. Jamatii oya cuana cuaqui yasijje jeajea cajo, ojjaña ojaya aquiana cuana edojjii pojjeama. ¿A'a ojjaña ojaya aquiana cuana Eyacuiñajji yasijje quia cajo, oya cuana cuaquijo ani cuayaqui mee caje'yo? ¿A'a Eyacuiñajjiya oya cuana onijje eyajo ba'e mee caje'yo ma aquiana quea huiso nee nee sosejje? Chojja. ²⁷E'e jojo nei eya ojjañaja Edoe Mese poeje o'oya. Quea jeajahua nee nee, quea ca'a nee nee poeje'yo. Eya esohuidojojji quea huiso nee nijje poeje'yo. Poe majje eyaya ojjaña cuana sosequiaje'yo. Ojjaña ba'enaje jayojja eyaya sosequiaje'yo. ²⁸E'e jojo nei eya ojjañaja Edoe Mese ojjaña huoojea'yojji quea ca'a nee nee poaje'yo. Beca cuaa jiquiojo nequiya jjaja mo jamaya ba caje mano'yo jjimahuaa —Jesusaa o shajja'ajjajji cuana acanaje.

Jesosa quea cojja jiji poanaje oja Chii nijje mimianijo
(Macoso 9.2-13; Noca 9.28-36)

17 ¹Quijje pishana me oejje pea emejje oe cahuime po majje Jesosa poquinaje o shajja'ajjajji nijje pea beca peejjima dejja nijje, Peno nijje, Satiaco, oja doe Huani nijje pea'ai. Mahuiso dejja nijje poquinaje eyiyo huasijje quea huesha nee. ²Jocuama nequi oya Jesosa jjahuapaqui'yonaje; quea cojja jiji nee poanaje, eshequi jayojja poanaje, quea jeajahua nee nee. Oja daqui quea oshe nee nee, bo oshe jayojja poanaje. ³Moisesi, Enia pea'ai ma yahuajo nei ba'ya poa Jesosa nijje mimimiminequi ba canaje o shajja'ajjajji cuaa. Moisesi, Enia pea'ai Jesosa nijje mimimiminequinaje Jesosa onaja mimishijo emano'yojji jjejojya. ⁴Jamajjeya Peno Jesosa nijje jama poanaje ba'a: —E'e Emeshi Mese, jiquiojo ecuana canequiquiahua, quea pame nee. Pea beca peejjima equi sisi ecuaaya ca'yaahua miquea, Moisesija, Eniaja pea'ai eba'ejji.

⁵Peno mimianijo tii bo quea oshe nee nee nequioquenaje. Queya canaje huoja. Shajja'ajja canaje Eyacuiñajji jama poani ba'a: ⁶—Jiquio ecuea ecue Bacua Eja quea jea nee nee. Eya ojo quea bihui nee nee. ¡Oya oe shajja'ajjacue!

O shajja'ajja majje quea mete nee nee poanaje Peno, Satiaco, Huani pea'ai. Meshi yasijje hui oquequinaje. Ecu'oshajjajo nequinaje.

⁷Jamajjeya o que poeyanaje Jesosa. Napa canaje emeya.

—¡Nequisohuacue! ¡A'a quea mete pojji! —Jesosa poanaje.

⁸Jamajjeya oya cuana nequisohuanaje. Jesosa oe nei nequi baja canaje.

⁹Eyiyojo jaoquequije'yo mimimimi jaoque'yonaje. Jesusaa ma ojjañaja Edoe Meseya acanaje jama ba'a: —¡Ma miya eyiyojo banaje a'a jihuhuijji! ¡Quijje eya emano'yojja shequi o'oyajo mo oe pea cuana huohuicue! —Jesusaa acanaje.

¹⁰Jamajjeya oya cuaa huohui'ajja canaje: —Jesosa, Moisesija etehue'yo huohuijji poaniya jama acani ba'a: “Enia oe ebionei capoe'yahua Eyacuiñajjija huoojea'yo ojjaña jaahuanajji poe jjimahuajo”. ¿Yajjaje acuae Moisesija esohui huohuijji cuaa jama acani? —poanaje Peno, Satiaco, Huani pea'ai.

¹¹Jesosa saja'a canaje jama ba'a: —E'e jojo nei Enia jayojja jama oe dejja ebionei epoejji, ojjaña cuana ejo e'e jojo nei ejjashahuabaqui meesahuajji. ¹²E'e, Enia jama ca ca oe yahuajo pishana poeyanaje. Jamatii Jodio cuanaja oya ba jjima poa. Pea poso acanaje. Jamajjeya cuia ca'ya poa. Jamaya pea'ai eya acaje'yo cuaa. Eya ojjañaja Edoe Mese quea nee nee po mee caje'yo cuaa —poanaje Jesosa.

¹³Jamajjeya o shajja'ajjajji cuana jjashahuabaqui nequinaje. Jama poanaje: —E'e de, oya Huanijo mimiani, ma ona besameejji poajo. Eniaa jama sohui huohuime acanaje Huaniya, de —poanaje Peno Satiaco nijje Huani pea'ai nijje.

Esho'i niñepoquipajea mee ca'yonaje Jesosaa
(Macoso 9.14-29; Noca 9.37-43)

¹⁴Eyiyojo nequi jaaoque'yo majje Jesosaa, o shajja'ajjajjiya pea'ai ba cañaquinaje quea huiso cuana ejjachichaqui nequica. Oe dejja Jesosa que poeyanaje. Ecu'i'oshajjajo nequiya huohui'ajja canaje: ¹⁵—Emeshi Mese Jesosa, jecuea ebacua ejjajo quea yeno jjashahuabaquicue! Oya quea mano nee nee, niñepoqui poani. Niñepoqui majje ena huasijje jea cani, cuaqui yasijje pea'ai jea cani. ¹⁶Eyaya oya yenaje mi shajja'ajjajji cuana huasijje. Jamatii niñepoquipajea ajja.

¹⁷Jesosaa ojjaña cuana acanaje: —¡De! ¿Ache shono acuae jja nequiana ejo jjashahuabaquije e'e jojo nei? Quea sapa ca'a mi coma. ¿Ache cahui huiso minijje nequi majje miyaya eya baje'yo Eyacuiñajjiya huoojea'yo ojjaña jaahuanajji quea ca'a nee nee? ¡Miquea ebacua ejja e que jjequicue!

¹⁸Jjequi canaje Jesosa que. Jesosaa o niñepoquimeejji poani huoojeacuayajea ca'yonaje: —Eshahua, ¡cuayaqui'yocue, esho'i niñepoquimeejji poani! —Jesosaa poanaje.

Cuayaqui'yonaje. Jamajjeya oja bacua ejja niñepoquipajea'yonaje, quea aja nee po'yonaje.

¹⁹Quijje ojjaña cuana poqui majje Jesosa que poeyanaje o shajja'ajjajji cuana. Huohui'ajja canaje: —¿Yajjajo acuae ecuaaya eshahua mi huoojeacuayajea mee'ajja'yonaje?

²⁰Jesosaa saja'a canaje: —Miquianaya jja ejo jjashahuabaqui ja'a jjima. Jjashahuabaquiani jama ba'a: “E'e pojja'a Jesosaa ecuanaja eshahua huoojeacuayajea mee ajja”. Jamajjeya mi huoojeacuayajeaña. ¡Bacue oe! Ejo jjashahuabaquicue jama ba'a: “Jesosaa e'e nei ohuaya jayojja jama ecuaana ameesahua caje'yo”. Miya jama jjashahuabaquiajo, Eyacuiñajjiya miya amee caje'yo ojjaña eyaya aña jayojja jama, ma dejjaa ajjima acani amee caje'yo pea'ai. ²¹E'e, jamatii jiquio eshahua jayojja quea huoojeacuayajea camaja. Eyacuiñajji nijje mimi huicha'a huicha'a majje, ojo jjashahuabaquianijo ijja'ijjia jjima po majje pea'ai huoojeacuayajeaje'yo miyaya —Jesosaa poanaje.

—Quijje eya manaje'yo —Jesosaa poanaje
(Macoso 9.30-32; Noca 9.43-45)

²²⁻²³Majoya Janinea meshijo ojee poquijeya Jesosaa o shajja'ajjajji cuana huohui canaje: —E'e, quijje eya iña meesahuaje onaja equecua'yojji. Quecua caje'yo cuaa. Jamatii beca cahuime po majje mo shequi mee caje'yo Eyacuiñajjiya.

O shajja'ajja majje o shajja'ajjajji cuana quea yeno nee nee poanaje. Quea mete pea'ai poanaje.

Eyacuiñajjija equi iya bame'yojji bejjo chicha canaje bejjo chichajji poaniya

²⁴Majoya Capenaoma huasijje poeyajo, bejjo chichajji poani Peno que poeyanaje; huohui'ajja canaje jama ba'a: —¿A'a acuae mi mi sohui huohuijjiya bejjo quia cani, ma Eyacuiñajjija equi iya bame'yojji?

²⁵—E'e de, quia cani —Peno poanaje.

Majoya Simohui Peno equi yasijje dobiqiajo, Jesosaa oya huohui'ajja canaje: —Simohui, ¿yajjaje acuae mi jjashahuabaquiani? ¿Emeshi mese neiya ajea bejjo sosequia mee cani? ¿A'a quea huesha ba'aja? ¿A'a oja meshijo ba'aja pojja'a?

—Quea huesha ba'eya poe majje sosequia caje'yo —poanaje Peno.

²⁶—E'e —Jesosa poanaje—. Jamajjeya emeshi mese neija echacojji cuana esosequia'yojji pojjeama. ²⁷Jamatii oya quene'ama epojji ejjasosequiaquijji. ¡Poquicue miya bae yasijje! ¡Joya ebionei ijji caje oe jjequiquiayacue! ¡Oja nabajo ba'e oe bacue ejjeshejji quea sose huiso nee nee, ejo, mijo pea'ai esosequia'yojji! ¡Dojocue! ¡Bejjo chichajji poani yasijje quiacue! “Ma'aje esohui huohuijjiya, ecuea pea'ai” acue —Jesosa poanaje.

¿A'ya ona huoojeajji jayojja nequije eyajo?

(Macoso 9.33-37; Noca 9.46-48)

18 ¹Majoya ojjaña o shajja'ajjajji cuaa Jesosa que poe majje huohui'ajja canaje: —Jesosa, quijje miya ojjaña huoojeajji poaje. ¿A'ya cuae mi jayojja jama poaje minijje ona huoojeajji? ¿A'a ecuanaya pojja'a?

²Jamajjeya Jesosaa oe esho'i nei o que iyaa canaje. O cojja nei nequinaje. ³O shajja'ajjajji cuana huohui canaje Jesosaa: —¡Bacue oe! ¡Jiquio esho'i nei jama pocue! ¡Jashajja'ajjaquicue oe! Esho'i nei pojji mi po'yajo ca ca enijje eba'e'yojji pojjeama quijje eya ojjaña huoojea'yojji poaje. ⁴Jamajjeya joya esho'i jama quea bei jjashajja'ajjaquiani e que poquije'yo, e jayojja ona huoojea'yojji eyajo poaje. ⁵E'e, ecuea epeejji esho'i quea pame jama jjashajja'ajjaquiani. Ojjaña joya ecuea epeejji quea jea acani eya pea'ai quea jea acani —Jesosa poanaje.

Quea mimishi mi po o'oya chana'

(Macoso 9.42-48; Noca 17.1-2)

⁶—Ecuea epeejji jjeya nei jjapeequi ca'a'ama ¡a'a quea mimishi po meejji cuana! Joya o mimishi pomeejji poani Eyacuiñajjiya quea nee nee po mee caje'yo, de. Jamajjeya ¡quea mimishi epo mee cuahuajje oe mano'yocue! ¡Janaayipecaqui majje mei quea quemo nee jeyocue; bae quea doe yasijje oe tohuaacue! ⁷Mimishi pomeejji cuanajo quea yeno nee nee ojjaña poani. Jamatii mimishi pomeejji yani, de. Quea yeno ca ca oe mimishi pomeejji poaje, quea nee nee po mee caje'yo tii Eyacuiñajjiya —Jesosa poanaje.

⁸—Jamajjeya miya quea mimishi po mee cani emeya, ejiojjiya pojja'a. ¡Ejiojji, eme' pojja'a ejajasejjajea jayojja jama acue mimishi'ama epojji! Eme', ejiojji pea'ai

chamajo eyahuasijje poqui'yajo Eyacuiñajji nijje eba'e tiitii'yojji quea pame nee nee. Miquea beca eme!, ejiojji pea'ai yanijo pojja'a quea mimishi tii poani ca ca cuaqui yasijje poquije'yo. Quea tai nee nee, quea nee nee; cuaqui jijipajea'yo ajja, de. ⁹Ecojjajo jjabaqui majje miya quea mimishi poani pojja'a. Jamajjeya ꞑecojja ecajjajea jayojja jama acue! Cojjama!, mimishi'ama miya eyahuasijje poquije'yo quea pame nee nee poaje'yo. Cojjajji, quea mimishi tii poani miya cuaqui yasijje poquije'yo ca ca quea tai nee nee, quea nee nee poaje'yo tii tii. E'e, ꞑquea jjashahuabaqui ja'a oe pocue! ¡Mimishi cuana oe pajea'yocue! —Jesosa poanaje.

¹⁰—Jamajjeya ꞑecuea epeeji eyacua a'a boti'ama ajji! E'e jojo nei eyaya miya huohuiaña eyajo esohuidojojjiya, o jaahuanajjiya ecue Chii yasijje huohuiqui cani. ¹¹Eya ca iña ojjaña Edoe Mese poeyanaje mimishi cuana cuijea'yohua cuaqui yasijje miquianaya epoqui poani jjejojo —Jesosaa o shajja'ajjajji huohui canaje.

Esohui eba meesahuajji ñajjajja epoquiquehua

(Noca 15.3-7)

¹²—Jamajjeya eyaya miquianaya huohuije esohui ejjashahuabaquijji —Jesosa poanaje—. Oe dejjaja quea huiso ñajjajja yaninaje, 100 huisome. Oe nei poquiquehua'ya poa, ¿ae poanaje oya? ¿A'a sa'ajja canaje? E'e. Pea cuana, ⁹⁹huisome ñajjajja ojee ijja'ijjaqui jeanana canaje epoquiquehua sa'ajja'yohua. ¹³Ba'yo majje quea bihui nee po'yonaje. Pea ñajjajja poquiquehua jjimajo quea bihui pishana poanaje: “¡Jiquioya ecuea ñajjajjaja bacua, de!” poanaje eñajjajja mese. ¹⁴Ñajjajja jaahuanajji ñajjajja ba'yo majje quea bihui nee nee poa. Jamaya poaje ecue Chii: Ecuea epeeji eyacua quea mimishi jjejojo epoquiquehua'yo jayojja jama ojo jjashahuabaqui o'oyajo, Eyacuiñajji quea bihui nee poaje'yo —Jesosa poanaje.

**¡Miquea epeeji minijje quea mimishi poajo oja mimishi pajea'yocue,
quea bei po o'oyacue onijje!**

(Noca 17.3)

¹⁵—Ecuea epeeji minijje quea mimishi poanijo, ꞑonijje mimiquicue! ꞑOjaya mimishijo jjashahuabaqui meesahuacue! Jjashahuabaqui majje mimishi capajea ca'yahua. Jamajjeya minijje jjapeequije o'oya. ¹⁶O mi jjashajja'ajjaquijajo ꞑpea iyaacue, beca pojja'a, ecuea epeeji pea'ai! ꞑOjee poquicue onijje mimiya! Jamajjeya oya cuaa miya ba caje e'e jojo nei miquea epeeji nijje jjapeequi o'oya sa poani. ¹⁷Ohuaya oya cuana mi jjashajja'ajjaquijajo ꞑojjaña Eyacuiñajjija epeeji cuana huasijje iyaacue emimijji, ojaya mimishi epajea'yojji! Ojjaña niñeshe'ajja cajo mi jjashajja'ajjaquijajo, Eyacuiñajjija epeeji jama pojjeama oya. Jamatii jjadasiaquijji jama, de —Jesosa poanaje.

¹⁸—Jamajjeya ojjaña ecuea epeeji cuana miquianaaya huohui meeje ache eba'ejji quea mimishi, ma Eyacuiñajjija eyajo anija boti'ama pea'ai.

Huohui meeje pea'ai ache eba'ejji quea pame nee, ma Eyacuiñajjija eyajo anija quea boti nee pea'ai —Jesosa poanaje.

¹⁹—E'e jojo nei miqúanaya meshijo ba'e ojee mimiajo, Eyacuiñajjiya, ecue Chiya eyajo aniya miqúanajaya esohui saja'a cani. ²⁰Beca cuana enijje jjapeequiani ejjachichaquianijo, eya o pejeje nequiani —Jesosa poanaje.

**Esohui ejjashahuabaqui meeji oe dejja onaja
mimishijo quea quene tii tii poani**

²¹Majoya Penohua Jesosa huohui'ajja canaje: —Emeshi Mese Jesosa, ecuea epeejjiya quea mimishi ahuicha'a huicha'a cajo, ¿a'a eyaya oja mimishi capajea huicha'a huicha'a'yahua? ¿Ache huiso huohui'yome amajje jjabei qui ca'yojji? ¿A'a quea huiso pojja'a, me oejeje pea beca, 7 pojja'a?

²²Jesosaa saja'a canaje: —Chojja, Peno, me oejeje pea beca, 7 pojjeama. Quea huiso nee nee huohui'yome amajje jjabei neinei qui ca'yojji, jama tii tii epo'yojji —Jesosaa acanaje.

²³Jamajjeya Jesosaa pea esohui ejjashahuabaqui meeji huohui canaje jama poani ba'a: —Eyacuiñajji ojjaña huoojea'yojji poaje. Jamaya poaje ba'a: Emeshi meseya aquiana oja quia sosequia mee ca'yani echacojji cuana. ²⁴Sosequia mee canijo o que jjequi canaje oe echacojji poani. Aquiana quea huiso nee nee oja jjeshe poanaje. Jamajjeya sosequia ajja'ajja jjima, ojaya. ²⁵Ma echacojji sosequiaquia ajja; yajja sosequia'yome yajji jojoya mi sosequiajeyo ca'yonaje. Jamajjeya emeshi meseya quea quene huohui canaje: “¡Oya oe quiacue ejjeshejji sosejje! Sosema' cachaco cahua. ¡Ojaya ehuanase, oja bacua cuanaya quiacue pea'ai, ojaya aquiana cuana pea'ai quia'yocue e sosequia'yojji!”

²⁶—O shajja'ajja majje echacojji o que poquinaje. Ecui'oshajjajo nequi oya mimi nequinaje: “Ecuea emeshi mese, ¡a'a ecuana dojojji equia'yojji bejjo sosejje! ¡Ishoa'ajjacue! Eyaya ojjaña sosequia jeyojeyoje'yo miya”.

²⁷—Emeshi mese ojo jjashahuabaquinaje. Quea aquiana huiso nee nee nee sosequia jjima. Jamatii oja bajjani cuijea ca'yonaje, sosequia jjima tii. Poqui mee ca'yonaje, de.

²⁸—Majoya echacojji poquinaje quea bihui nee nee. Jamatii poqui majje ma echacojjiya pea echacojji onijje nequi sa'ajja canaje. Ba majje iñasibijea canaje. Jama poanaje ba'a: “¡Jjeya nei mo sosequiacue mique jjeshe cuana!” oya poanaje. Ojaya oe pojji nei sosequia jjima poanaje. ²⁹Ecui'oshajjajo nequi mimi nequinaje jiquio pea echacojji: “Epeejji, ¡ejo jjashahuabaquicue! ¡Ishoa'ajja socue! Ojjaña aje mi sosequia jeyojeyoje'yo de”.

³⁰—“¡Chojja! ¡Ishoa sa po ajja iña!” poanaje. Jeanobiaa dojo canaje; ohua sosequiajeyo ca'yajje huoojea ca'yonaje.

31—Pea echacojji cuaa ba canaje. O dojo cajo quea yeno jjashahuabaquinaje. Poquinaje emeshi mese huohui'yohua. 32Ma shajja'ajja majje emeshi meseya huoojea canaje ojaya echacojji jjequi'yohua. Poeyajo tecuea canaje emeshi meseya: “Miya ca mi ca oe quea mimishi nee. Miquea aquiana quea huiso nee nee sosequia jjima. Jamatii enijje mimi'yajo eyaya miquea bajjani cuijea'yonaje, sosequia jjima tii. 33Jamajjeya ¿yajjajo miquea epeejjijo mi jjashahuabaquinaje miya? ¡E jayojja oe miya mi poanaje!” emeshi mese poanaje. 34Quenequene neinei'yonaje emeshi mese. Ejeanobiajji huoojea ca'yonaje quea nee nee po meeya ohua sosequiajeyo ca'yajje —jamaya Jesosa poanaje.

35—Jamajjeya jiquio ecua emeshi meseya acani jayojjaya jamaya miquianaya acaje'yo ecue Chiiya, ca onaja mimishi miya mi pajea neinei'yajo. Miquea mimishi cuana pajea'yo ajja, cuijea'yo ajja pea'ai —Jesosaa acanaje.

Esohui huohui canaje ehueijjijo, Jesosaa
(*Macoso 10.1-12; Noca 16.18*)

19 1Majoya esohui huohui majje Jesosa Janinea meshijo ani po'oquequinaje Jodea meshi yasijje, Jodana cuei ojje miji yasijje. 2Jomajo quea huiso dejja cuana onijje poquinaje. Ohuaya ojjaña jjaajaqui mee ca'yonaje, huaquia mee ca'yonaje. 3Paniseo cuana ca ca o que poeyanaje jjadasiaquiya nisho. Jamaya jjashahuabaquinaje ba'a: —E'e pojja'a Jesosa Moisesija etehue'yo jayojja jama pojjeama mimije. Jamajjeya ecuaaya oya tecueaje.

Jamajjeya Jesosa huohui'ajja canaje cuaa jama ba'a: —Esohui huohuijji, ¿a'a acuae ehuanase huei cajji? ¿Yajjajo acuae ehuanase hueijea cajji so'o? ¿Achajja tehuemeya acuae oe Moisesiya aca poa?

4Saja'a canaje Jesosaa: —¿A'a miquea Moisesija etehue'yo ba jjima esohui? Yahuajo nei nei tehue ca poa Moisesiya jama ba'a:

“Yahuajo Eyacuiñajjiya pana coo ca poa yahue, epona pea'ai.

5Huohui ca poa ohuaya: —Jamajjeya yahueya oja chii, ojaya enaese pea'ai cajiñayiya ca'yahua oja huanase nijje eba'ejji”.

6Oya cuana beca. Jamatii oe nei jayojja Eyacuiñajjiya oya ba cani, becanajjiji pea'ai pojjeama, oe nei jayojjaya. Cuanaya Eyacuiñajjiya oe jayojja aca poa. Jamajjeya ¡a'a oe jea meeji! ¡Jama tii tii oe nei oe acue! —Jesosaa acanaje.

7Huohui'ajja o'oya canaje Paniseo cuaa: —Jamajjeya ¿yajjajo acuae Moisesiya tehueme aca poa? Jama ba'a:

“Huei'yo majje yahueya ehueijeajji papeni etehue'yo caquia cahua oja huanase. Majoya cahuoojea cahua”.

8Saja'a canaje Jesosaa: —Miquea etiiquiana quea mimishi nei jjejojya Moisesiya huei mee'ajja canaje. Quijje nei Moisesiya jamaya tehue ca poa;

jamatii Eyacuiñajjiya jamaya pojjeama pana coo ca poa. ⁹Jamajjeya eyaya miya huohuiaña e'e jojo nei ehuanase pea dejjaja sii jjima huei ca ajja. Joya ehuanase hueijji epo pea epona ehuanayojji quea mimishi nee, epona siijji epo jama. Eyacuiñajjiya oya ba cani quea mimishi. Joya ma eponajo jjahuanaquijajo quea mimishi pea'ai poani; onaja ehuanase nijje poani —Jesosa poanaje.

¹⁰—¡De! Jamajojoya eseya jjahuanaqui ca ajja. Jamatii shacuima' nequi caji ojjaña eseya cuana. —o shajja'ajjaji poanaje.

¹¹—Cho, ojjaña pojjeama shacuima' nequi caji —Jesosa poanaje—. Beca cuana Eyacuiñajjiya huoojea caje'yo shacuima' tii enequijji. ¹²Beca cuana jjahuanaqui ajja, jamatii ejjahuanaquijji pojjeama. (Jamaya joya quibojjisha nei, biñajjjama' cuana pea'ai.) Beca cuana jjahuanaqui ajja jamatii yajjaje shai jjahuanaqui sa po'yo ajjajo. Beca cuana Eyacuiñajjiya esohui ehuhui aiquijji, ojo echaco neinei caji Eyacuiñajjiya huoojea canaje jjahuanaqui jjima tii tii enequijji. Jamatii Eyacuiñajjiya ojjaña huoojea'yo ajja shacuima' tii enequijji. Jamajjeya ¡ojaya ejjashahuabaqui'yojji mijo jamaya acue, miyaya! —Jesosa poanaje.

Esho'iquianajo Eyacuiñajji nijje miminaje Jesosa

(Macoso 10.13-16; Noca 18.15-17)

¹³Majoya Jesosa que esho'i nei cuana jjequi canaje cuaa. Huohui canaje: —Jesosa, jiquio esho'i nei sapa napa'ajja majje ¡Eyacuiñajji nijje mimicue ojaya ejaahuanajji! —poanaje.

Jesosa shajja'ajjaji cuaa oya cuana tecuea canaje: —¡A'a jja oe Jesosa que jjequi majajji esho'iquiana! ¡Esohui oe cahuohui cahua!

¹⁴Ma ba majje Jesosa poanaje: —¡Esho'iquiana e que capoe'yahua! ¡A'a quea huesha nequi meeji! E'e, esho'iquiana jjashahuabacuajiquiani; enijje jjapeecuajiquiani. Jamaya ecuea epeeji esho'i jayojja eyaya jaahuana mee sa aña pea'ai. Jamajjeya e que poquije'yo, eya eyajo ojjaña huoojea'yojji poaje —poanaje.

¹⁵Jamajjeya esho'i cuana biajje eme' huana majje Jesosa poquinaje.

Edejja etii pishana quea aquiana huiso Jesosa nijje miminaje

(Macoso 10.17-31; Noca 18.18-30)

¹⁶Majoya oe dejja Jesosa que poeyanaje. Huohui'ajja canaje jama ba'a: —Emeshi Mese, ¿achajja po majje acuae mo eyahuasijje poqui ca'yojji Eyacuiñajji nijje eba'e tiitii'yojji? ¿Achajja acuae ba'e caji quea pame nee epojji?

¹⁷—¿Apiojji miyaya eya huohui'ajjaña: “¿Ae quea pame nee epo'yojji?” Eyacuiñajji ca oe nei quea pame nee. Jamajjeya onijje ba'e tiitii'yo sa po majje ca oe ¡oya shajja'ajjacue! ¡Ojaya esohui etehue'yo jayojja jama oe ba'ecue! —Jesosa poanaje.

¹⁸—¿Ache esohui etehue'yo? —huohui'ajja canaje.

¹⁹Jesosa saja'a canaje: —Eyacuiñajjiya esohui etehue'yo jama poani ba'a:

“¡A'a pea quecuajji!

¡A'a sii pojji!

¡A'a sijje pojji!

¡A'a pea siijji!

¡Mique chii, mique nae pea'ai oe shajja'ajjacue!

¡Pea cuana mi pejjejo ba'e mique huapa pojjeama jayojja quea jea oe acue!”

20—E'e, eyaya jamaya ña, esho'yahuaa jama tii tii sohuaqui eya. ¿Pea acuae yajja po cajji eyajo eba'e tiitii'yojji? —jiquio dejjaa Jesosa huohui'ajja canaje.

21—E'e, miya quea pame nee nee Eyacuiñajji jayojjaya po sa po majje ¡poquicue, miquea aquiana cuana quiaquicue ejjeshejji soseje! ¡Ejjeshejji quia'yocue aema' cuana huasijje! ¡Majoya poecue, enijje epo'yojji! Jamajjeya eyajo Eyacuiñajjiya miya aquiana quea pame nee quea huiso quia caje'yo quijje.

22Jesosaja esohui shajja'ajja majje dejja etii pishana quea dejja tai jjejojo quea yeno poquinaje; ojaya aquiana quea huiso nee nee yani joyoya quia sa po'yo ajja.

23Jamajjeya Jesosaa o shajja'ajjajji cuana huohui canaje: —E'e, dejjaa quea mimishiya jjejojya aquiana quea huiso, meshi quea quemo pojja'a nahue canijo beshahua nei e que poqui ajja, eya eyajo ojjaña huoojea'yojji poaje'yo.

24—E'e, eyaya huohuiaña pea'ai jama ba'a: Ahuoja quii huejjajje ino jeanobiaña jamaya, ¿a'a mapichi jeanobia cajji ahuoja quii huejjajje? Quea camaja coma. Jiquio ecua mapichi ahuoja quii huejjajje jeanobia cajji pome jamaya dejja quea aquiana huiso nee nee nahue cani eyahuasijje edobiquijji pojjeama.

25O shajja'ajja majje jashahuaba neineiquinaje o shajja'ajjajji. Ojee mimimiminaje: —Jamajjeya ¿a'ya shai eyahuasijje dobiqii mee caje'yo?

26Cojja ba neinei canaje Jesosaa. Huohui canaje: —Dejjaa jamaya amee ajja tii. Eyacuiñajjiya oe neiya ojjaña acani. (Eyahuasijje dobiqii mee cani pea'ai joya quea aquiana huiso nee) —Jesosa poanaje.

27Jamajjeya Peno jashahuabaquinaje ma dejja aquiana quea huiso nee nee jeana'yo sa po ajjajo. Huohui'ajja canaje: —Jesosa, ecuaaya ojjaña aquiana jeana'yonaje minijje epoqui'yojji. Jamajjeya ¿ae acuae ecua quiaje so'o, de?

28Jesosaa saja'a canaje: —E'e jojo nei quijje Eyacuiñajjiya ojjaña eyacua pana ca'yajo eya eyajo nequije'yo ojjaña huoojea'yojji nei. Miquianaya, 12, e shajja'ajjajji poani enijje nequije'yo, enijje ona huoojea'yojji poaje'yo. E'e, miquianaaya Jodio cuana, ecuea pea epeeji cuana pea'ai huoojeaje'yo tii. 29E'e nei beca cuana ecuea esohui jama a sa poanijo aquiana cuana jeana ca'yani: Ojaya equi, oja huapa pojjeama, oja chii, oja nae pojja'a, oja bacua cuana pojja'a, oja huanase pojja'a jeana ca'yani. Jamajjeya e'e jojo nei quijje Eyacuiñajjiya oya cuana quea huiso nee nee o jayojja quia caje'yo; quea bhui nee nee ba'e tiitii mee caje'yo pea'ai

eyajo onijje. ³⁰Jamatii beca cuana jjeya ona huoojeajji poani eyajo ona huoojea'yoyji pojjeama poaje'yo. Joya jjeya ona huoojea'yoyji pojjeama ca ca eyajo ona huoojea'yoyji nei nei poaje'yo e jayoyja —Jesosa poanaje.

Esohui ese jjashahuabaqui meejji huohui canaje Jesusaa e'acuijjajja mesejo

20 ¹—E'e —Jesosa poanaje—, quijje eya ojjaña huoojea'yoyji poaje, ojjaña sosequiaje'yo jjeya enijje chaco canaje sosejje. Jamaya poaje ba'a: Oe dejja, e'acuijjajja mese mecajjeahua poquinaje. Echacojji cuana iyaa canaje. Huohui'ajja canaje: ²“¿A'ya cuae jjeya poquije acuijjajja huojohua? Ojjaña miya eyaya sosequiaje oe esodojjo quea sose huiso nee nee sosejje”. “E'e” poanaje, “chacoje ecuaaya oe esodojjo quea nahue nee sosejje”. Majoya huoojea canaje chacohua.

³—Quijje pishana eshequi jaasohua pishana majje ona ijia'ijjia'ani yasijje poquinaje e'acuijjajja yiye mese. Beca dejja chaco chaco jjima ani ba canaje. ⁴Huohui'ajja canaje: “¿A'a miyaya acuijjajja yiyejo chacoje pea'ai? Miya eyaya sosequiaje quea sose huiso pea'ai”. “E'e, chacoje” poanaje. Poquinaje chacohua.

⁵—Quijje eshequi biacojjajja nequijo, sinecua nei pea'ai oya poqui majamajanaje pea cuana iyaa echacojji. ⁶Eshequi ejjajeapaaquijo pea'ai poqui o'oyanaje. Dejja cuana chaco chaco jjima ani ba canaje. “¿Apiojji acuae mi chaco chaco jjima ani?” acanaje e'acuijjajja meseya. ⁷“Chama oya ecuea echacomeejji aña, de; ajea esosequia'yoyji” saja'ame acanaje cuaa. “E'e. ¡Ecuea acuijjajja yiyejo chacoquicue pea'ai!” poanaje.

⁸—Meca nei e'acuijjajja meseya ona chacomeejji huohui canaje: “¡Echacojji cuana iyaacue! ¡Sosequiacue! ¡Joya quijjeyejje nei dobiquinaje ebionei sosequiacue! ¡Joya ebionei dobiquinaje quijje yejje nei sosequiacue!”

⁹—Majoya echacomeejjiya joya eshequi ejjajeapaaquijo dobiqui cuana sosequia canaje oe esodojjo quea nahue. ¹⁰⁻¹¹Jamajje quijje joya mecajjeahua dobiqui cuana poeyanaje. Sosequia canaje oe esodojjo quea nahue pea'ai. Ba majje quea yeno poanaje, quea huiso nee nee esosequia caje poso. Jamatii oya sose huisoajja pea'ai sosequia canaje. E'acuijjajja mese nijje quenequenaje. ¹²Mimijajinaje jama ba'a: “Joya eshequi ejjajeapaaquijo poeyanajeya aje oe oe pojji chaco canaje. Ecuaanaaya ca chaco neineinaje eshequi quea quiyojo. Jamatii miyaya oya sose huisoajja pea'ai sosequianaje. ¿Apiojji acuae jja ecuaana jayoyja pea'ai sosequianaje so'o?” poanaje. ¹³“E'e epeejji cuana, eyaya miya sosequianaje quea pame nee” poanaje. “Mi poeyajo jama poanaje ba'a: —E'e, chacoje oe esodojjo quea nahue sosejje —poanaje. ¿A'a e'e? Jamajjeya eyaya jamaya miya quia meenaje. Jamajjeya ¡a'a quea quene pojji! ¹⁴Eyaya jiquio dejja quijjeyejje nei cuana oe esodojjo quea nahue nee quia sa poani mi jayojjaya. Jamaya quea pame. ¹⁵Mi jayojjaya quea huiso sosequianaje. ¡A'a jja oe miya quea quene pojji! Bejjo ecuea jojoya eyaya quia sa amajje eyaya quiaña” e'acuijjajja mese poanaje —Jesosa poanaje.

¹⁶—E'e, e'acuijjajja meseya ojjaña sosequia canaje ojaya ejjashahuabaqui'yoyji jayoyja jama. Jamaya Eyacuñajjiya acaje'yo. Joya

quijje nei jjapeequije'yo quea bihui nee ba'e tiitii mee caje'yo eyajo onijje pea'ai. Ojjaña ojaya ejjashahuabaquijji jayojjaya jama sosequia caje'yo pea'ai. Eyacuiñajjiya quea huiso iyaa caje onijje eba'e tiitii'yojji. Jamatii oe pojji babaca caje'yo oja epeeji huoojea'yojji epojji —Jesosa poanaje.

—**Quijje eya manoj'e'yo —Jesosa po o'oyanaje**
(*Macoso 10.32-34; Noca 18.31-34*)

¹⁷Majoya Jenosanena huasijje poquinaje. Jesosaa o shajja'ajjajji cuana dojo canaje ejiojji sahua huasijje esohui huohuijji: ¹⁸—¡Bacue oe! Eya jiquio ojjaña Edoe Mese. Eseyá Jenosanena huasijje poquije. Jomajo mo ña meesahuaje eya Jodio cuanaja equecua mee'yojji. E'e, Moisesija etehue'yo huohuijjiya, Eyacuiñajji nijje emimijji etii cuaa pea'ai eya ña mee caje. Taa neineje cuana: “¡Oya quecuajeacue!” poaje. ¹⁹Jodio pojjeama cuana huasijje mo huoojea caje. Ejo soa neineje cuana; cuia caje'yo mo cuaa huaca jee ejeapashajjajja; acui ecueata'apeejo me cacajea majje mo ba'ehuanasohuajjea caje cuaa emano'yojji. Jamatii mo beca cahuime po majje Eyacuiñajjiya shequi mee caje'yo —Jesosaa huohui canaje.

Semeneoja ehuanase Jesosa nijje miminaje oja bacua ejjajo
(*Macoso 10.35-45*)

²⁰Majoya Jacobo, Huani pea'ai enaese nijje Jesosa que poeyanaje. Ecuio'shajjajo nequiñanaje onijje emimijji.

²¹—She, ¿ajeo ami poeyanaje? —Jesosa poanaje.

—Jesosa, ecuea ebacua ejja cuana mi pejejo canequi'yahua quijje miya ojjaña huoojea'yojji poaje. Oe shani mijijje, pea ebianeí mijijje canequi'yahua minijje, ona huoojea'yojji. ¡Jamaya oe acue! —poanaje enaese.

²²—Chojja. Miquianajaya ba jjima —Jesosaa oya cuana acanaje—. Eya quea nee nee po mee caje'yo cuaa. ¿A'a miquianaya e jayojja quea nee nee poajo quea ca'a poaje? Eya quecua caje'yo pea'ai cuaa. Enijje jjapeequianijo miquiana quecua caje'yo pea'ai pojja'a cuaa. ¿A'a jamatii miquianaya quea ca'a poaje?

—E'e —saja'a canaje Jacobohua, Huaniya pea'ai—. Quea ca'a poaje mi jayojja onaa quea nee nee po mee ca'yajje. ¡Jamaya capoahua, jamatii caquecua cahua cuaa mo!

²³—E'e —poanaje Jesosa—, jamajjeya e'e jojo nei miquiana e jayojja quea nee nee po mee caje'yo cuaa; e jayojja quea ca'a nee nee poaje, onaa mano mee ca'yajje. Jamatii, e pejejo eyajo eyaya miya enequi mee'yojji pojjeama enijje ona huoojea'yojji. Chojja, ecue Chiiya eyajo aniya yahuajo nei pea cuana babaca ca'yonaje. Ohuaye nei nequi mee caje'yo e pejejo quijje, eya ojjaña huoojea'yojji poajo —Jesosa poanaje.

²⁴Jesosa pejejo nequi sa pea'ai poanijo onijje ona huoojea'yojji epojji, Jacobo, Huani nijje pea'ai quea quene poanaje pea shajja'ajjajji cuana, ome mijijje pea'ai.

²⁵Jamajoya aje oe Jesusaa oya cuana iyaa canaje. Jama huohuime acanaje ba'a: —¡A'a onijje quea quene pojjí! Miquea eba dejja cuana, Eyacuiñajjija epeeji pojjeama. Onajaya emeshi mese cuaa, ona huoojeajji cuanaa pea'aiya pea cuana huoojea neinei caní; quea quene nee nee poani, quea mase. ²⁶Jamaya pojjeama miquianaya poaje, ecuea epeeji cuana. ¡E jayojjaya po sa poanijo pea cuana ba'e meesahuacue! ²⁷Joya ona huoojea'yojji po sa poani ca ca echacojji sosema' jayojja capoahua. ²⁸E'e, ¡e jayojja jama pocue! Eya ca ca iña ojjañaja Edoe Mese poeyanaje ojjaña cuana ba'e meesahuaa; ojjañaja eya eba'e meesahuajji pojjeama. Ojjañaja mimishi sosequia'yojji mo manoj'e'yo, ojjaña cuaqui yasijje epoqui'yo poani jjejojya —Jesusa poanaje.

Cojjama' cuana quea cojja ja'a po mee ca'yonaje Jesusaa
(*Macoso 10.46-52; Noca 18.35-43*)

²⁹Jenosanena huasijje poquijje Jesusa dobiquinananaje Jenico huasijje. Majoya dobinana majje poquinaje Jenosanena huasijje. Quea huiso nee nee cuana onijje poquinaje. ³⁰Becanejjijji pea'ai cojjama' ejiojji sahuajo e'anioque ani. Jesusa shajja'ajja canaje poeje. Taaa neineinaje cuana: —Jesusa, miya emeshi mese Dabija osecua. ¡Ejo jjashahuabaquicue quea yeno! —taanaje.

³¹—¡A'a oe taaa majajji! ¡Esohui oe ca'acue! —acanaje cuaa.

Jamatii taaa neineinaje cojjama' cuana: —Jesusa, Dabija osecua, ¡ejo jjashahuabaquicue!

³²Jamajjeya o shajja'ajja majje Jesusa nequiñaquinaje. Cojjama' cuana iyaa canaje: —E'e, ¡poecue! ¿A'ya so'o? —poanaje.

³³—Emeshi Mese, ¡míyaya iña jjacojjapojjaqui mee'yocue! —poanaje.

³⁴Jamajjeya Jesusa cojjama' cuanajo jjashahuabaquinaje. Cojja napa canaje. Cojja napa cajje ecojja jjabapojjaqui'yonaje. Quea bihui nee nee po'yonaje jjacojjaja'aqui mee ca'yajje. Jamajjeya Jesusa nijje poquinaje.

Jenosanenajo Jesusa nequiñaquinaje
(*Macoso 11.1-11; Noca 19.28-40; Huani 12.12-19*)

21 ¹Majoya Jesusa Mepajejo nequiñaquinananaje Jenosanena pejeje, acui tii'ajja yiyejo, Onimo bajjani eyiyo pejeje pea'ai. Nequiñaquinana majje o shajja'ajjajji becanejjijji pea'ai huoojea canaje Jesusaa. ²Jama poanaje ba'a: —¡Poquicue Mepaje yasijje! ¡Dobiqui majje mapichi sisi, ebacua sho'i ai nijje ejeyo nequia nequi bañaquicue! ¡Ba majje, picho majje yecue e que! ³Onaa: “¿Apiojji acuaeya ecua mapichi sisi pichojeaña so'o?” acajje, “Ecuea Emeshi Mese sa poani” saja'ame acue. Jamajjeya: “Ee, ocue dojo'ajja joya mapichi” acaje dejjaa Mepajejo ba'eya —Jesusa poanaje.

⁴E'e, jamaya acanaje Jesusaa, Eyacuiñajjija esohui huohuijji yahuajo nei nei ojo tehue ca poa jama ba'a:

5 “Ojjaña Jenosanenajo ba'e huohuicue jama ba'a: —¡Bacue oe! Mi huoojea'yojji nei poeyani; oya quea bei nee. Jamajjeya mapichi sisija daasa biajje poeyani, mapichi sisija ebacujaja daasa biajje”. Jamaya yahuajo nei nei Jesosajo tehue ca poa Eyacuiñajjija esohui huohuijjiya.

6 Jamajjeya Jesosaa huoojea cajje o shajja'ajjajji poquinaje. 7 Mapichi sisi bacujaji dojo canaje. Daqui ao cuana mapichi sisija bacujaja daasa' biajje iya canaje. Jesosa anisohuaquinaje mapichija bacua sho'i aija daasa' biajje.

8 Ojjaña cuana ejjachichaqui nequi canaje, quea huiso nee nee. Ojaya daqui ao cuana ejiojjijo jeapihui canaje Jesosa ja'ajjequijji. Pea cuaa acui ña jajasejja canaje. Huana yiyoyiyo canaje ejiojjijo. Jama yahuajo nei Jodio cuaa emeshi mese cuana ja'ajjequi caninaje cuiñajji yasijje, jama ja'ajjequimeya acaninaje ohua ba cahuajje. 9 Ojjaña ehui dojojji poquije, Jesosa quishishijji poquije pea'ai taaca poquinaje quea bihui nee nee: —E'e Jesosa, emeshi mese Dabi yahuajo ba'e miquea etiiquiana. Mi poeyajo ecuana quea bihui nee nee. Quea pame nee nee miya, Jesosa. ¡Eyacuiñajji eyajo aniya miya cajaanuana cahua! ¡Eyacuiñajji cabihuia cahua, ojjaña!

10 Jamajjeya Jesosa Jenosanena huasijje dobiquianijo, ojjaña cuana jomajo ba'e cuajicuajjibenaje jjachichaquiya, ojjaña. Huohui'ajja canaje: —¿A'ya shai poeje? —poanaje.

11 —Jesosa poeje, Eyacuiñajjija esohui huohuijji nei, ma Nasanenajo ba'enaje —saja'ame acanaje cuaa.

**Aquiana quiajji poani Eyacuiñajjija equijo nequi cuana
huoojeacuayajea canaje Jesosaa
(Macoso 11.15-19; Noca 19.45-48; Huani 2.13-22)**

12 Quijje pishana Jesosa ojjaña cuana nijje Eyacuiñajjija equi yasijje poqui o'oyanaje. Dobiquinaje. Aquiana quiajji poani Eyacuiñajjija equijo nequi cuana huoojeacuayajea canaje Jesosaa, aquiana jjeshe poequi pea'ai. Aquiana cuana jjahuojjojeajeaqui canaje; bejjo, pea bejjo sosejje quia cani cuanaja bejjo nequijji cuana jeapajjajea canaje; huia' quiajji pea'ajja huia' nequijji cuana jeabichajea canaje: 13 —¡A'a jja oe Eyacuiñajjija equijo aquiana quiajji! —tecueame acanaje Jesosaa—. Eyacuiñajjija esohui jama poani ba'a: “Ecuea equi ojjaña cuana enijje emimijji”. Miquianaaya ca ca siipojji nequijji jayojja amee ña Eyacuiñajjija equi.

14 Majo tii aniya cojjama' cuana, jeo'ajja cuana pea'ai Jesosa que poeyanaje. Ojjaña cuana Jesosaa quea pame nee po mee ca'yonaje.

15 Jesosaja jjaajaqui mee'yo cuana quea pame nee ba canaje; esho'iquiana majo tii ani sohuicuayanaje shajja'ajja canaje pea'ai. Jamatii Jodio etii cuana aje oe Jesosa nijje quea quene poanaje. Jesosa Eyacuiñajjija Bacua Ejja pojjeama poso tecuea canaje Moisesija etehue'yo huohuijji poaniya, Eyacuiñajji nijje emimijji etii cuaa. Jama poanaje ba'a: 16 —¿Apiojji acuae jiquio esho'iquiana sohuicuaya meeaña mi bihuiajji? ¿A'a shajja'ajja jjima?

—E'e, shajja'ajjaña —Jesosa poanaje—. ¿A'a miquea ba jjima Eyacuiñajjija esohui etehue'yo ejo? Jama poani ba'a:

“Joya esho'i ai'ai, esho'i jjonajjona ai pea'ai quea pame nee esohui cuaya mee'yojji mi bihuia'yojji”.

Jamaya Eyacuiñajjija esohui yahuajo nei ejo etehue'yo poani —Jesosa poanaje.

¹⁷Mimi majje Jesosa poquinaje. Jea cana'yonaje. Jenosanenajo ani poquinaje Betania huasijje cahuiya.

Acui etona jjajja jayojja, iquena bajjani sajjai mee ca'yonaje Jesusaa
(Macoso 11.12-14, 20-26)

¹⁸Mecajjeahua Jenosanena huasijje poe o'oyanaje; quea shoe poanaje Jesosa. ¹⁹Ba canaje ejiojji sahuajo nequi acui etona jjajja jayojja. Acuijjajja ba'ajjaqui canaje. Chama' poanaje ejjajja. Eña oo pana nequi'yo. Jamajjeya oya Jesusaa huohui canaje: —¡Jamajjeya jjajjama' tii capo'yahua acui! —Jesusaa jama acaje jjeya nei sajjainana'yonaje acui.

²⁰Quijje pishana acui esajjai'yo ba majje o shajja'ajjajji cuana jjajjasoquinaje: —¡De! ¡Jjeya nei ca ca sajjai'yonaje! —poanaje.

²¹⁻²²—E'e —Jesosa poanaje—. ¡Miya Eyacuiñajjijo quea ja'a nee jjashahuabaquicue! A'a jjashahuabaquijji jama ba'a: “E'e pojja'a Eyacuiñajjija eya shajja'ajja'yo jjima”. Cho, jama jjashahuabaquicue ba'a: “Eyacuiñajjiya e'e jojo nei nei eya saja'a caje'yo”. Jamaya miya jjashahuabaquijajo, Eyacuiñajjiya miquea esohui saja'a caje. E'e, Eyacuiñajjiya e jayojja jama ameesahua caje'yo pea'ai, ma dejjaa ajjima acani.

¿Aya acuae Jesosa huoojea canaje esohui huohuiya?
(Macoso 11.27-33; Noca 20.1-8)

²³Majoya Jesosa Eyacuiñajjija equi yasijje dobiqui o'oyanaje. Esohui huohui canijo, Jodio etii cuana, Eyacuiñajji nijje emimijji etii cuana pea'ai o que poeyanaje. Jesosa ojaya ba jjimajo huohui'ajja canaje: —¿Aya acuae mi huoojea canaje? ¿Apiojji acuaeya esohui huohuiaña so'o? ¿Apiojji acuaeya aqui ana quiajji poani huoojeacuayajeanae oma mecajje? —acanaje Jodio etii cuaa.

²⁴⁻²⁵Jesosa oya cuana saja'a canaje: —E'e, eyaya miya ebionei huohui'ajjaje. ¿Aya Huani huoojea canaje ona besa meeya? ¿A'a Eyacuiñajjiya? ¿A'a dejja cuaa pojja'a? ¡Huohuicue mo! Eyaya majoya huohuije e huoojea'yojji epo.

²⁶Shajja'ajja majje Jodio cuana ojee mimimiminaje: —¿Yajja saja'ame shai eseya aje so'o, de? Quea mete ojjaña dejja cuanajo. Ojjaña ba cani Huani Eyacuiñajjiya huoojea canaje esohui huohuiya. Jamajjeya: “Dejjaa Huani huoojea canaje” eseya ajje se jajahuejjajja ca chana' meiya. “Eyacuiñajjiya Huani huoojea canaje” eseya ajje aje se oe jama acaje ba'a: “Jamajje, ¿apiojji miyaya Huani shajja'ajja jjima aña?” Jesusaa acaje.

²⁷Jamajjeya jjashahuabaqui majje Jesosa huohui canaje Jodio cuaa: —Cua'a, de. Ecuanaja ba jjima —anisho canaje.

—Jamajjeya ecuea miya ehuohuijji pojjeama e huoojea'yojji epo
—Jesosaa acanaje Jodio esohui huohuijji cuana, etii cuana pea'ai.

Esohui ejjashahuabaqui meejji beca ebacua ejjajo

28 Jesosaa oya Jodio cuana huohui canaje pea'ai jama ba'a:
—Shajja'ajjacue oe ecue sohui ejjashahuabaqui meejji jama ba'a: Oe dejjaja becanajijji pea'ai ebacua ejja yaninaje, shacuima' nequi cuana. Ejeajjiya oja bacua ejja etii huohui canaje: “Cha, ¡che oe jjeya que chacoquicue!”

29 “Cho, cajaa. Mijo chaco sa po'yo ajja ca iña” poanaje. Jamatii, jjashahuabaqui majje “Cachacoquiahua” poanaje. Poquinaje que yasijje.

30 —Ejeajjiya oja pea ebacua ejja, echahua mese huohui canaje pea'ai: “Cha, ¡che oe que chacoquicue jjeya!” poanaje. “E'e ecue Chii, jaaya chacoquije aje ca eya” poanaje. Jamatii poqui jjima poanaje, de.

31 —Jamajjeya ¿ache esho'i oja chiija ehuohui jama poanaje? ¿Achajja acuae miña jjashahuabaquiiani?

—E'o'i mese —acanjaje cuaa.

—E'e —Jesosa poanaje—. Eyaya miya e'e nei huohuiaña jama ba'a: Jiquio ecua e'o'i mese jjashahuabaqui majje oja chiiya huohui canaje jayojja jama acanjaje jama jayojja dejja mimishi cuana, epona pea cojjojji poani pea'ai. Eyacuiñajji nijje jjapeecuajiquiani oja ejaahuanajji. Miquiana ca mi ca oe, cho. Eyacuiñajji nijje jjapeequi jjima. 32 E'e, Huani, ma ona besameejji poa yahuajo nei poeya poa miquiana ba meesahuaa. Huohui ca poa jama ba'a: “¡Miquea mimishijo quea yeno pocue! ¡Mimishi cuana pajea'yocue Eyacuiñajji esohui jama eba'ejji, onijje ejjapeequijji!” Huani poa. Miquianaya aje oe Huani shajja'ajja sa po ajja poanaje. Dejja mimishi cuana, epona quea mimishi cuanaya ca ca shajja'ajja majje: “E'e, ¡Eyacuiñajji nijje ejjapeequi, mimishi cuana ejjapajeaqui'yo!” poanaje. Ma ba majje jamatii miquianaya jjashahuabaqui jjima, Eyacuiñajji esohui jama a sa po ajja tti poanaje —Jesosaa acanjaje Jodio etii cuana.

Pea esohui ejjashahuabaqui meejji jjonojajja yiyejo

(Macoso 12.1-12; Noca 20.9-19)

33 —¡Jiquio shajja'ajjacue pea esohui ejjashahuabaqui meejji! —Jesosa poanaje—. Oe dejjaa emeshi meseya que quea quemo nee neejo bana canaje jjonojajja oo pana, uva. Que peeyi canaje meija peeyi. Majoya que yiyesamajo equishipashajji iya canaje, mei cueehue iñaca canaje jjonojajja na quishipashajeajji. Majoya mei iyasohua ao'ao majje peehuana canaje que jaahuanajji quea huesha nee ojaya ebajji. Pea echacjji cuana iyaa canaje. Huohui canaje emeshi meseya: “¡Ecuea que jaahuanacue! Jaahuana sosejje quiaje'yo oya jjonojajja quea huiso nee” poanaje. Majoya emeshi mese quea huesha poquinaje. 34 Quijje jjonojajja jahuajo emeshi meseya pea o chacosahuajji poani beca huoojea canaje que jaahuanajji que, jjonojajja

jjequiya. Que jaahuanajji bañaqui majje huohui canaje jama ba'a: “¡Che mo jjonojjajja joya ecuea emeshi meseya pa cadojo'yahua, de!” poanaje.

³⁵—Que jaahuanajji cuana quea mimishi poanaje. Jjonojjajja quia sa po ajja, joya emeshi meseja iya tepe mee. Jamajjeya o chacosahuajji cuana iña canaje, cuiajea canaje, pea quecua canaje, pea jajahuejjajea canaje meiya. ³⁶Emeshi meseya pea huoojia ca o'oyanaje huacuaya o chacosahuajji poani quea huiso pishana. Jamatii yahuajo jama acanaje que jaahuanajji cuaa. Cuiajea ca o'oyanaje pea'ai. ³⁷Quijje yejje nei oja bacua ejja oe nei huoojia canaje que jaahuanajji baa: “E'e, ohuaya ecuea ebacua ejja shajja'ajja caje” poanaje emeshi mese. ³⁸Cho, oja bacua ejja poeje ba majje jama poanaje ba'a: “Joya emeshi meseja bacua ejja poeje. Jiquio meshi quijje ojaya poaje, ejeajji mano'yajo. ¡Cua'a, ejjaquecuajeaqui oya eque mesena'yojji! Jamajjeya meshi esejaya tii poaje'yo, de” poanaje que jaahuanajji quea mimishi cuana.

³⁹—Jamajjeya aje oe ebacua ejja iña canaje, quecuajea canaje, jeaqui canaje quea huesha nee, que jaahuanajji cuaa. Mahuiso esohui.

⁴⁰—Jamajjeya emeshi meseya poe o'oya majje ¿yajja acuae acaje'yo jiquio que jaahuanajji quea mimishi cuana? —Jesosaa huohui'ajja canaje Jodio cuana.

⁴¹—Oya quea quene nee nee poaje'yo. Ma que jaahuanajji quea mimishi cuana quecuajea caje'yo, de. Que cuiña meequi caje'yo pea cuana, joya ojjaña jjonojjajja shejo jjasosequiaquijji cuana —acanaje Jodio cuaa.

⁴²—E'e —Jesosa poanaje—. ¿A'a miquea eba Eyacuiñajji esohui etehue'yo yahuajo nei? jama ba'a:

“Oe equi yamajjana equi iyajji cajaa aca poa cuaa. Jamatii Eyacuiñajjiya ma eyamajjana equi yamajjana quea ca'a nee nequi mee ca poa. Jamajoya ojjaña ojaya epeeji cuanaa Eyacuiñajji bihuia cani”.

Jamaya yahuajo nei tehue ca poa ejo; eya ma eyamajjana equi iyajji jayojja jama quea ca'a nee nee nequi —Jesosaa acanaje.

⁴³—E'e, jiquio esohui eba meesahuajji jayojja jama Eyacuiñajjiya acaje'yo —Jesosa poanaje—. Ohuaya yahuajo nei miquianaya babaca ca'ya poa ojo echaco'yojji, onijje eba'e tiiti'yojji. Jjeya ca ca Eyacuiñajjiya miquianaya, Jodio cuana, cajaa acaje'yo shajjama' jojaya. Pea cuana babaca caje'yo ojo echacojji, onijje eba'e tiiti'yojji pea'ai, joya e'e jojo nei ojo jjashahuabaquiani.

⁴⁴—Jiquio ecua eyamajjana cajaa aca poa cuaa jjeya quea ca'a nee nequi jama eya miquianaaya cajaanaya anaje; jjeya ca ca iña quea ca'a nee eya nequi'yo. Ojjaña joya e ba jjima e cajaa amajje quea yeno poaje, de. E cajaa tiitii amajje ca ca quea nee nee po tiitii'yo —Jesosa poanaje.

⁴⁵Jesosaja esohui shajja'ajja majje Moisesija etehue'yo huohuijji cuana, Eyacuiñajji nijje emimijji etii cuana pea'ai quea quene nee poanaje: —¡De! Ecuanajo oya mimiani, equi yamajjanajo pojjeama. Eseyaya que jaahuanajji quea mimishi jayojja pea'ai ohuaya acani —poanaje Jodio cuana.

⁴⁶Jamajjeya Jesosa iña sa acanaje ejeanobiajeajji. Jamatii iña jjima; quea mete poanaje. Ojjaña dejja echicha'yo nequica'yo cuaa Jesosa Eyacuiñajjiya esohui huohuijji nei nei ba cani. Onajaya quea nahue nee nee Jesosa e'iñajji.

Ebacua ejjaja ejjahuanauquijji ojjaña ijia mee'ajja ca poa ejeajjiya
(Noca 14.15-24)

22 ¹Jamajjeya Jesosaa o poe o'oyajjiyo pea esohui ejjashahuabaquijji huohui canaje Jodio cuana huasijje jama ba'a: ²—Eyacuiñajjiya ojjaña cuana huoojea'yojji poajo jamaya poaje: Oe emeshi meseya oja bacua ejjaja ejjahuanauquijji bobi quea huiso dahua mee canaje ojaya epeejiya e'ijjiayji nisho. ³Ojjaña apoa poajo, o chacosahuajji huoojea canaje epeeji cuana iyaaa, bobi ijjiayji. Cho, poe sa po ajja poanaje.

⁴Jamajjeya emeshi meseya pea chacosahuajji cuana huoojea canaje. “¡Jamaya acue!” poanaje: “Epeeji, ¡poecuaicue oe! Ojjaña apoa. Ana'ai quea sei quecua meenaje. Bobi cuana apoa, ojjaña. ¡Poecue ecue ebacua ejjaja ejjahuanauquijji quea bihui nee epojji! acue” emeshi mese poanaje.

⁵—Jamatii jjashajja'ajjaqui ajja poanaje cuana. Poe ajja. Beca cuana que yasijje poquinaje; peaa aquiana quiaa poquinaje; ⁶pea cuaa emeshi meseja echacosahuajji iña majje cuia canaje, quecua ca'yonaje. ⁷Ma shajja'ajja majje emeshi mese quea quene poanaje. Sohuinano cuana huoojea canaje dejja shajjama' iña. Quecuajeyo ca'yonaje; equi cuana dahuajea canaje, sohuinano cuaa. ⁸Majoya emeshi meseya o chacosahuajji iyaa canaje pea cuana: “Ojjaña apoa e'ijjiayji ejjahuanauquijji. Pea cuana epeeji nisho poanaje, jamajjeya epoeji pojjeama. Cajaa. ⁹¡Poquicue! Quea huesha ba'e cuana iyaaquicue: —¡Poecue emeshi meseja bacua ejjaja ejjahuanauquijji yasijje! ¡Bobi quea huiso ijjiahuacue! —acue” emeshi mese poanaje.

¹⁰—Jamajjeya poquinaje. Ojjaña cuana iyaa canaje; dejja quea pame, dejja quea mimishi cuanaya. Quea huiso poeyanaje. Dobiquinaje. Equi cuio canaje. Chama' pea e'anijji poanaje. ¹¹Majoya emeshi meseya ojjaña cuana baa poeyanaje, ojjaña cuana nijje mimiya. Ba canaje oe dejja daqui jehuejji. ¹²“Epeeji, ¿apiojji acuae miya poeyanaje daqui quea jehuejji? ¡Jamaya pojjeama ecue bacua ejjaja ejjahuanauquijji yasijje epoeji!” poanaje. Saja'a jjima ma dejjaja. ¹³Jamajjeya emeshi mese quea tecue poanaje. Iyaa canaje o chacosahuajji: “¡Oya jeyo majje jeaquicue quea misi nee yasijje! Jomajo pa neineiye'yo, ese' ijjiayajjea caje'yo quea nee neejo” poanaje. Mahuiso ecuea esohui —Jesosa poanaje.

¹⁴—E'e, ojjaña cuana iyaa'ajja caje Eyacuiñajjiya. Jamatii oe pojji dobiquije'yo onijje eba'e tiitii'yojji —Jesosaa ojjaña cuana acanaje. (E'e, Eyacuiñajjiya Jodio cuana iyaa coo canaje onijje eba'e'yojji quea bihui nee. Jamatii shajjama' poanaje. Ojaya huoojea'yo quecuajjea canaje. Jamajjeya Eyacuiñajjiya Jodio pojjeama iyaa canaje. Quea huiso poeyanaje. Ma dejja daqui jehue jayojja jama beca cuanaja mimishi cuijea'yo jjima. Jamajoya jeacuayajea caje'yo quea nee nee epo'yojji.)

Bejjo oe pojji quia cajji ba'e sosejje emeshi meseja yajji
(*Macoso 12.13-17; Noca 20.20-26*)

¹⁵Jesosa mimije shajja'ajja majje Paniseo cuana quea quene poanaje: —Oya Jesosa jjashahuabaquiani eseya epeeji nisho jayojja jama, de —poanaje.

Poqui majje ojee mimimiminaje: —Cua'a, Jesosa ejjadasiaquiqui; esohui quea camaja nee ejjahuohui'ajjaquiqui, ojaya yajja saja'ame ya'yoyji. Jamajjeya Moisesija etehue'yo jayojja jama mi saja'a cajo, cacuijaja meequi'yahua.

¹⁶Jamajjeya Paniseo cuaa o shajja'ajjajji cuana, joya Enodeja esohui quea boti nee poani pea'ai huoojaja canaje Jesosa que. Huohui'ajja mee canaje jama ba'a: —Esohui huohuijji, miyaya e'e jojo nei huohuiaña Eyacuiñajjija ejjashahuabaqui'yoyji jama. Miya etii cuanajo jjashahuabaqui ajja; emeshi mese cuanajo pea'ai mete'ama. Jamajjeya quea ja'a nee huohuiaña. ¹⁷E'e. Jamajjeya mo oe che huohuicue: ¿A'a bejjo quia cajji Shomano meshi mese Sesa bajjanija yajji? ¿A'a equiajji pojjeama esejaya pojja'a? ¿A'a cuae jja ma Sesaja meshijo ba'e sosejje quia cajji so'o? —acanjaja cuaa.

¹⁸Ma Jodio cuanaja ejjashahuabaquijji Jesusaja eba poanaje. Jamajjeya: —¡Miquianaya ca mi ca oe e dasiajji nisho cuana, epeeji nisho quea tai nee nee! ¿Apiojji nequiaa eya dasia sa aña? ¹⁹¡Bejjo mo huohui'ajjacue esodojjo! —poanaje.

²⁰Jjequi canaje cuaa. Esodojjo ba majje huohui'ajja canaje Jesusaa: —¿Ae ecajja'yo jiquio? ¿Ae bajjani tehueme'ya?

²¹—Emeshi mese ecajja'yo, Sesa bajjani —acanjaja Jodio cuaa.

—E'e —poanaje Jesosa—. Jamajjeya ¡Sesaja bejjo quiaquicue ohua sa cajo! ¡Eyacuiñajji a'a pajea'yoyji; oya bihuicue, shajja'ajjacue pea'ai!

²²Jesosa shajja'ajja majje ojjaña cuana quea mete nee poanaje: —¡Quea jjashahuabaqui ja'a nee nee oya Jesosa! ¡Jjadasia meequi ajja!

Jamajjeya poquinaje, jeana ca'yonaje Paniseo cuaa.

¿A'a e'e jojo nei mano'yo majje shequije o'oya quijje? —huohui'ajja canaje cuaa Jesosa

(*Macoso 12.18-27; Noca 20.27-40*)

²³Ma pojajajo tii beca Sanoseo cuana poeyanaje Jesosa huohui'ajjaa. Sanoseo cuana aje oe jama poani ba'a: —Mano'yo majje jama tii tii; eshequi o'oyajji pojjeama quijje.

Jesosaja ca ca jama sohuihuohuime ajjima. Jamajjeya Jesosa huohui'ajja canaje Sanoseo cuaa; edasiajji nisho jama acanjaja ba'a: ²⁴—Esohui huohuijji, Moisesiya jama tehue ca poa yahuajo nei nei ba'a: “Dejja ejjahuanaqui, bacuama! mano'yajo, oja chahuua ehuanase equijjojaja ani cahuana ca'yahua, oja o'ija bacua jea jayojja jama epojji”. ¿A'a e'e? ²⁵Jamajjeya jama poso ba'a: Quea huiso edoe mese, me oejje pea beca nequia poa. E'o'i mese ebionei jjahuanaquia

poa eponajo. Mano'yonaje bacuama' tii. Oja chahuua epona equijiojea ani huana ca o'yanaje, bacuama' tii ani. ²⁶Oya jayojja mano'yonaje bacuama' tii. Jamajjeya peaa echahua meseya huana ca o'yanaje. Mano'yonaje bacuama' pea'ai. Jamaya ojjaña manojeyo'yonaje. ²⁷Quijje ehuanase pea'ai mano'yonaje. ²⁸Jamajjeya shequi o'oya majje eyajo, ¿ajea ehuanase epona poaje, ache edoe meseja? Ojjaña echahua cuana huea'ajja'yo epo —Sanoseo cuaa acanaje.

²⁹Jesosaa saja'a canaje jama ba'a: —Chojja. Jamaya pojjeama. Miquea ba jjima Eyacuiñajjija esohui; oya quea ca'a nee nee miquea ba jjima pea'ai. ³⁰E'e, shequi o'oya majje ejjahuanaku'yojji pojjeama. Esohuidojojji eyajo ani jama poaje. ³¹Cuanaya ¿a'a miquea ba jjima dejja cuana ojjaña mano'yo majje shequiye o'oya? Jamajjeya Eyacuiñajjiya yahuajo nei esohui tehue mee ca poa miqiana jjabahuejjaquijji. Jamaya poa ba'a: ³²“Eya ca ca iña Amajama jaahuanajji, Isaaca, Jacobo pea'ai jaahuanajji”. ¿A'a Eyacuiñajjiya emano'yo cuana meshijo e'ohuajea jaa jaahuana cani? Cho. Ojaya epejji cuana eshe nequi, mano'yo majje shequi'yo pea'ai jaahuana cani Eyacuiñajjiya —Jesosaa acanaje.

³³Jesosaja esohuijo ojjaña cuana quea bihui nee poanaje: —¡Quea pame nee ohuaya Jesosaa huohui cani! —poanaje cuana.

¡Eyacuiñajji quea jea nee acue, mi pejejo nequi cuana pea'ai!
(*Macoso 12.28-34*)

³⁴Majoya Paniseo cuaa shajja'ajja canaje Jesosa quea jjashahuabaqui ja'a nee; Sanoseo cuana jjadasia meequi ajja. Jamajjeya jjachichaqui majje ojee jjashahuabaqui o'yanaje Jesosa dasiaquijji, esohui quea camaja nee ehuhui'ajjaquijji. ³⁵Majoya Jesosa que poe o'yanaje Paniseo cuana. Dasia'yohua nisho Moisesija etehue'yo huohuijjiya huohui'ajja canaje jama ba'a: ³⁶—Esohui huohuijji, yahuajo Moisesiya tehue ca poa Eyacuiñajjija esohui. ¿Ache esohui quea pame nee nee e'ajji?

³⁷Jesosaa acanaje: —E'e, jamaya quea pame nee acue ba'a:

“¡Eyacuiñajji miquea Emeshi Mese nei quea jea nee nee acue! Miquea huapa pojjeama cuana miquea quea jea; ¡quea jea nee neeya oe acue Eyacuiñajji! Jamajjeya ¡ojo jjashahuaba tiitiiquicue!”

³⁸⁻³⁹Jiquio ehuhui'yo quea pame nee. Pea oya jayojja quea pame nee jama ba'a:

“¡Ojjaña pea cuana quea jea nee acue, miquea huapa pojjeama jama quea jea neeya oe acue!”

⁴⁰Jamaya miya poajo miya Moisesija etehue'yo jama ba'e; Eyacuiñajjija esohui huohuijji yahuajo nei ba'eja esohui jama ba'e pea'ai —Jesosa poanaje.

Eyacuiñajjija huoojea'yo dejja jaahuanajji Quito
(*Macoso 12.35-37; Noca 20.41-44*)

⁴¹Jamajjeya ojjaña Paniseo cuana jjachichaquiajo oya cuana huohui'ajja canaje Jesosaa: ⁴²—¿Yajja huohuime acuae nequiaa ña Eyacuiñajjija huoojea'yo dejja jaahuanajjijo Quitojo? ¿Ache etiiquianaja osecua oya?

—Quito emeshi mese Dabija osecua, ma yahuajo ba'ya poaja —acanjaje Paniseo cuaa.

⁴³—Jamajjeya ¿yajjajje acuae Eyacuiñajjija Edojjoshahua Pameya emeshi mese Dabi jama amee ca poa yahuajo ba'a: “Eyacuiñajjija huoojea'yo ojjaña jaahuanajji Quito ecuea Emeshi Mese nei”? Yahuajo nei Dabiya jama huohui ca poa pea'ai ba'a:

⁴⁴“Eyacuiñajjiya ecuea Emeshi Mese Quito jama aca poa: —¡Enijje anioquecue ebianeí mijijje ojjaña cuana huoojea'yojji! Eyaya mi quecuajji nisho epo jeabichajjea jeyojeyoje'yo”.

Jamaya huohui ca poa yahuajo Dabiya ejo. ⁴⁵E'e, Dabiya Eyacuiñajjija huoojea'yo Quito aca poa “Ecuea Emeshi Mese”. Jamajjeya Quito Dabiya Emeshi Mese nei poani. Jamatii oya Dabiya osecua pea'ai, de —Jesosaa acanjaje—. Eya, Eyacuiñajjija huoojea'yo, dejjaja jea pojjeama; Eyacuiñajjija Bacua Ejja. Jamajjeya eya ojjañaja Emeshi Mese nei.

⁴⁶Jesosa mimije shajja'ajja majje Paniseo cuana quea mete poanjaje. Jeca poanjaje, mimima'yo aninaje; huohui'ajja beca'yo jjima tii acanjaje.

—¡A'a Jodio esohui huohuijji jama ba'ejji! —Jesosa poanjaje
(Macoso 12.38-40; Noca 11.37-54, 20.45-47)

23 ¹Majoya Jesosaa ojjaña cuana, o shajja'ajjajji cuana pea'ai huohui canaje jama ba'a: ²—Moisesija etehue'yo huohuijji, Paniseo cuana pea'ai miquea esohui huohuijji. ³Jamajjeya ¡oya cuana shajja'ajjacue! ¡Ojaya esohui jayojja jama acue ojjaña! Jamatii oya cuana aje oe esohui jama ba'e ajja; quea mimishi. Jamajjeya ¡a'a o jayojja ba'ejji! —poanjaje—. ⁴E'e, jamaya poani ba'a: Dejjaa aquiana quea biquie abo mee cani pea dejja. Jamatii huanasohua sahua ajja, de, quea mimishiya jjejojo. O jayojja Jodio esohui huohuijjiya pea cuana ba'e meesahua ajja Eyacuiñajjija etehue'yo jama —Jesosa poanjaje.

⁵—Quea pame poso oya jjabaquiani onaja ebihuijji: “E'e de, oya esohui huohuijji quea pame nee” epo meeji acani. Jamajjeya esohui etehue'yo quea quemo jjasapahuahuo iyaquiani, aa huahuo pea'ai ojjañaja ebajji. Daqui quea pame nee nee, quea ao nee huosho cani ojjañaja ebajji pea'ai. ⁶Ojee ijja'ijjianijo, emeshi mese pejeje anioqueani ebionei ijja sa poanijo. Jodioja equi ojee ejjachichaquijjiyo pea'ai ebionei anioque sa poani Eyacuiñajjija esohui huohuijji pejeje, ojjaña nijje emimimimijji. “E'e, oya cuana Eyacuiñajjija esohui huohuijji nei quea pame nee” epo meeji acani. ⁷Ejiojijje poquiani ojjaña aquiana quia cani yasijje anicuaa, pea cuaa jama bihuia cani ba'a: “Esohui huohuijji, miya quea pame nee nee.” Jamaya aje oe ojaya quea boti nee, jiquio Jodio etii cuanaja, esohui huohuijji quea pame nee poso jjabaquiani —Jesosa poanjaje.

⁸Jamajjeya o shajja'ajjajji cuana Jesosaa acanjaje pea'ai jama ba'a: —¡A'a miqianaya o jayojja jama pojji! Pea cuana a'a jjabihua meequijji: “¡Miya esohui huohuijji quea pame nee nee!” a'a jjapo meequijji cuana. Cho. Miquea Esohui Huohuijji quea pame nee oe nei yani, miquea Emeshi Mese nei. Miquianaya ecuea

epeeji cuana ca ca Eyacuiñajjiya ba cani pea epeeji jayojjaya. ⁹Oe nei eyajo ani eseja Chii. Jamajjeya jesohui huohuijji oya jayojja “Esejaya Chii” a'a ajji! ¹⁰Cuanaya Eyacuiñajjiya huoojea'yo ojjaña jaahuanajji, Quito miquiana huoojea'yojji nei nei. Jamajjeya pea cuana “ese huoojea'yojji nei” a'a jjapo meequijji. ¹¹E'e, jemeshi mese jayojja jama nequi sa poani ca ca pea cuana chacosahuacue! ¹²Jamajjeya joya emeshi mese poso jjabaquiani Eyacuiñajjiya emeshi mese pojjeama acaje'yo. Echacosahuajji jjabaquiani ca ca Eyacuiñajjiya emeshi mese jayojja po mee caje'yo —jamaya acanaje Jesosaa o shajja'ajjaji cuana.

Jesosaa Jodio etii cuana tecuea canaje

¹³Majoya Jesosaa Paniseo cuana, Moisesija etehue'yo huohuijji poani pea'ai jama tecueame acanaje ba'a: —Miquianaaya aje oe Moisesija etehue'yo huohuiaña, Jodioja esohui huohuijji poaniya pea'ai. Jamatii miya ca mi ca oe esohui huohuijji nisho, sijjepojji. E'e, miquianaya Eyacuiñajji nijje jjapeequi ajja. Pea cuana Eyacuiñajji nijje jjapeequi sa poani miyaya jjapeequipajea meeyaña, de. E'e, jiquio ecua esecue ca'a cani cuaa ona edobiqui poani jjejojo jama jayojja miquiaaya pea cuana dobiqui mee ajja eyahuasijje Eyacuiñajji nijje eba'e tiiti'yojji. Jamajoya miquianaya quea nee nee po mee caje'yo quijje, quea nee nee tii tii, de —Jesosa poanaje.

¹⁴—E'e, miquianaya ca ca oe e'ahuemanoja equi cuana jjesheaña sosema'. Majoya Eyacuiñajji nijje mimi nishoani quea huiso nee. Jamajoya Eyacuiñajjiya miquianaya cajaa acaje'yo. Quea nee nee po mee caje'yo tii tii —Jesosa poanaje.

¹⁵—Jodioja esohui huohuijji cuana, Moisesija etehue'yo huohuijji cuana pea'ai, miquianaya aje oe esohui huohuijji nisho, peajja. Miquianaaya chaco neineiaña; quea huesha poquiani pea'ai pea cuana Moisesija etehue'yo shajja'ajja meeya. Jamatii mi shajja'ajjaji cuana mi jayojja quea mimishi nee nee. Jamajoya oya cuana e'e jojo nei quea nee nee po mee caje'yo, mi jayojjaya —Jesosa poanaje.

¹⁶—E'e, miquianajaya ehuohui quea quehuajo cojjama' jama poani. Cojjama' cuana pea cojjama' cuaa me iña majje mepejejea cani jayojja. Ojjaña poquiquehuaje'yo —Jesosa poanaje—. Miquea ehuohui jama ba'a: “Eyacuiñajjiya equi nequianijo, ecuea ehuohui jama eyaya e'e jojo nei aje”. Pea cuana jama poani ba'a: “Chojja, jamaya mimi majje miquea ehuohui jama e'ajji pojjeama”. Jamaya huohui cani cuaa pea'ai ba'a: “Ma mei huo'o Eyacuiñajjiya equijo anijo, ecuea ehuohui'yo jayojja jama eyaya aje”. “E'e, jjamaya mimi majje miquea ehuohui jayojja jama e'e jojo nei acue!” pea cuana poani. Jamaya mimi quehuani miquianaya —Jesosa poanaje.

¹⁷Oya cuana tecuea canaje jama pea'ai ba'a: —Chojja, de. Miquianaya jjashahuaba quehuaquiani. Mei huo'o Eyacuiñajjiya equijo quea pame ani; Eyacuiñajjiya equi quea pame nee pea'ai. ¹⁸Miquianajaya pea ehuohui quea quehua pea'ai jama ba'a: “Mei ehuana huicha'a huicha'a pea mei biajje yani Eyacuiñajjiya

equijo aquiana dahuaiji, Eyacuiñajji bihuaiji. Ma mei e'iya cuana nequianijo, eyaya ecuea ehuohui jayojja jama e'e jojo nei aje” amajje, dejja ojaya ehuohui jama e'ajji pojjeama, miqúanaya poani. Jiquio jama poani ba'a: Aquiana mei e'iya biajje huana cani cuaa. Majoya jama mimiani ba'a: “Ma aquiana mei e'iya biajje yanijo, ecuea ehuohui jayojja jama eyaya aje”. “E'e, ¡jamaya mimi majje ca ca miquea ehuohui jayojja jama e'e jojo nei acue!” ¡Miquianaya jamaya mimi quehua'ani cuana! ¹⁹ ¡Ma ehuohui'yo cajaa! —Jesosa poanaje—. Mei e'iya quea pame nee; aquiana mei e'iya biajje ani quea pame pea'ai. Pea jayojjaya. ²⁰ Jamajjeya dejja mei e'iyajo mimianijo oya ojjaña aquiana mei e'iya biajjejo mimiani pea'ai. Pea jayojjaya poani. ¡Jamaya a'a mimijji ma aquiana cuanajo! —Jesosa poanaje. ²¹—Miquianaya Eyacuiñajjija equi yasijje mimiani cuana jama ba'a: “Eyaya ecuea ehuohui'yo jayojja jama e'e jojo nei aje Eyacuiñajjija equi yanijo”. Jamaya aje oe miya mimiani Eyacuiñajjijo, ma equijo ba'yanijo pea'ai. Jamajjeya ¡Eyacuiñajjija equi yasijje a'a jama mimijji! ²² Pea cuana mimianijo eyahuasijje jama poani ba'a: “Eyajo Eyacuiñajjija eba'ejji yanijo eyaya ecuea ehuohui'yo jayojja jama e'e jojo nei aje. Ecuea esohui e'e nei pojjeama jójjemo eya quea nee capoahua”. Jamaya amajje miya Eyacuiñajjija eba'ejji mimiani; “Eyacuiñajji eyajo aniya eya ba canijo, eyaya ecuea ehuohui'yo jayojja jama e'e jojo nei aje”. “Ecuea ehuohui'yo jayojja jama ajjima jójjemo eya quea nee po mee ca'yome” beshahua nei aña; oya jayojjaya. Jamajjeya ¡a'a jamaya mimijji Eyacuiñajjijo; quea tai! —Jesosa poanaje.

²³ Majoya Jesosaa Moisesija etehue'yo huohuijji cuana, Paniseo cuana pea'ai jama tecueame acanaje ba'a: —Miquea aquiana bobi quea johua e'ajji equi pejjejo pohuani. Tiijajo quiaña iye huiso Eyacuiñajjija epojji, ojaya ehuohui'yo jayojja jama poani:

“Miquianajaya aquiana ipiacue; ome miji pea'ai, 10 oya jayojjaya, oe

Eyacuiñajjija epojji, pea me oejje ebeca pee pea'ai, 9 miquea epojji”.

Eyacuiñajji yahuajo nei jamaya poa. Jamaya miya poani. Quea pame. Jamatii de, Moisesija etehue'yojo quea ja'a jjashahuaba tiitiiqui ajja. Jamaya quea tai aña ba'a: Miya e'e jojo nei jjashahuabaqui jjima, sijje poani, jjashahuabaqui ajja aema' cuana ba'e meesahuajji. Eyacuiñajjija esohui jayojja jama po tiitii ajja. Jamajjeya ¡Eyacuiñajjija etehue'yo jama ba'ecue! ¡Majoya Eyacuiñajji yasijje iye huiso quiacue ojjaña miquea aquiana pea'ai! —Jesosa poanaje.

²⁴—Miquianaya cojjama' jama; jjashahuabaqui ajja pea'ai. ¿A'a huashapa bobijo anidobiquiajo jeajea'aña, jamatii aquiana quea quemo anidobiquiajo ijiajeaña? Jamaya miya poani; ojjaña miquea aquiana quea biso pea'ai ipia'ajja majje iye huiso quiaña Eyacuiñajjija epojji. Jamatii pea cuana ba'e meesahua ajja, de. Jamajoya Eyacuiñajjiya miqúanaya cajaa acaje'yo; quea nee nee po mee caje'yo —Jesosa poanaje.

²⁵—E'e Paniseo cuana, miqúanaya Moisesija etehue'yo huohuijji pea'ai. Jamatii miqúanaya ca ca oe esohui huohuijji nisho de, quea tai. ¿A'a caneco cueehue topo cani cuaa ena ishi jjimahuajo, jamatii eyiyedojjije quea ihui shacua jjima? Jamaya miya. Jjabaquiani quea pame jayojja. Jamatii quea

jjashahuabaqui tai nee; sii poani; epona, onaja aquiana jea baña pea'ai.

²⁶Paniseo cuana, miqianaya aje oe quea jjashahuabaqui quehua. Jamajjeya Eyacuiñajjiya miqianaya cajaa acaje'yo; quea nee nee po mee caje'yo, de. ¿A'a caneco yiyedojjoe ebionei topo cani cuaa? Jamajjeya e'e jojo nei quea pame nee. ¡Caneco topo cani jayojja jama acue miquiaaya; ebionei jjashahuabaqui tai paje'yocue e'e jojo nei quea pame epojji! —Jesosa poanaje.

²⁷—Paniseo cuana, Moisesija etehue'yo huohuijji pea'ai, miqianaya esohui huohuijji nisho de, quea mimishi. Emano mojea'yojji cuia'asha cani cuaa quea pame jayojja. Jamatii eyiyedojjoe quea ihui, emano'yo sajaajji. ²⁸Emano'yo mojea'yojji jayojja jama miqianaya cuana; quea pame jayojja ojjaña ba cani; jamatii quea jjashahuabaqui tai. Shajjama', quea pame po nishoani pea'ai. Jamajoya Eyacuiñajjiya miqianaya cajaa acaje'yo; quea nee nee po mee caje'yo —Jesosa poanaje.

²⁹—Moisesija etehue'yo huohuijji, Paniseo cuana pea'ai, miqianaya aje oe esohui huohuijji nisho, quea mase. Jamajjeya Eyacuiñajjiya miqianaya quea nee nee po mee caje'yo. E'e, miqianaya emano sajaajji mo'yaña, quea pame a'yaña ma Eyacuiñajjiya esohui huohuijji yahuajo mojea jaa. Esajaajji cuia'asha'aña quea pame nee Eyacuiñajjiya epeeji nei yahuajo emano'yo bihulia'yojji —Jesosa poanaje—. ³⁰Siajje miya poani jama ba'a: “Yahuajo ecuanaja etiiquiana cuana nijje eba'e'yo jojjemo ecuanaja ca ca oe Eyacuiñajjiya esohui huohuijji cuana ecuiajea'yojji pojjeama poqueaye. Chama' ecuanaja ejjashahuabaquijji etiiquiana jama; ecuanaja ca ca pea” miqianaya poani —Jesosa poanaje—. ³¹Chojja. Jamaya miqianaya po nishoani. Jamatii miqianajaya etiiquiana jama Eyacuiñajjiya esohui huohuijji quecuajji nei nei pea'ai. ³²Jamajjeya o jayojja jama poani quiana; Eyacuiñajjiya huoojea'yo cuana cuiajea jeyojeyo'yo, de —Jesosa poanaje—. ³³Miqianaya peyo quea se nee nee jama de, quea mase nee nee, esohui huohuijji quecuajji, miquea etiiquiana cuana jama. Jamajjeya ¿a'a acuae nequiana Eyacuiñajjiyo jjanequiquehuaquijji? Chojja. E'e jojo nei ohuaya miya huohui caje'yo: “¡Poquicue nequiana! ¡Cuaqui yasijje dobiquicue! ¡Quea mase nee nee aje oe nequiana!” —Jesosa poanaje.

³⁴—Jamajjeya eyaya miqiana huasijje huoojeaña Eyacuiñajjiya esohui huohuijji, esohui bameesahuajji, dejja quea jjashahuabaqui ja'a nee pea'ai. Jamatii beca cuana cuiajeaje'yo; pea cuana acui ecueata'apeejo me cacajeaje'yo; pea cuana cuiasejjajeaje'yo miquea equi ojee ejjachichaquijji yasijje; pea cuana ocuenaje'yo ojjaña cuiñajji yasijje equecua'yojji, miqianaaya —Jesosa poanaje—. ³⁵E'e Jodio cuana, miquea etiiquiana cuaa dejja mimishi'ama quecuajea ca'yonaje quea huiso. Eyacuiñajjiya etehue'yo ebionei tehue ca poa jama ba'a: Abeni cuiahuejjajea ca poa miquea etiiquiana Cainiya. Oya jayojja quea huiso cuiajea ca poa cuaa. Quijje nei Eyacuiñajjiya etehue'yo quijje yejje nei tehue ca poa oja sohui huohuijji Sacania, Benequijaja bacua ejja cuiahuejjajea ca poa cuaa Eyacuiñajjiya equijo, aquiana dahuajeajji pejjejo —Jesosa poanaje—. ³⁶Jamajjeya eyaya miya e'e jojo nei huohuiaña: Jjeya nei

apoa poaje; Eyacuiñajjiya miqiuana cuana quea nee nee po mee caje'yo ojjaña miquea etiuiquanaja mimishi cuanajo, o jayojja jama miqiuianaya poani jojoya. Jamaya Jesosaa Jodio cuana tecuea canaje quea mimishi nee jojoya.

Jesosa quea yeno poanaje ojjaña Jenosanenajo ba'e cuanajo
(Noca 13.34-35)

³⁷Majoya Jesosa quea yeno nee nee ojjaña cuana Jenosanenajo ba'e cuanajo jama poanaje ba'a: —Jodio cuana Jenosanenajo ba'e, miqiuana cuana ecuea quea jea nee nee. Jamajjeya eya miqiuianajo quea yeno poani. E'e, miqiuanaaya aje oe Eyacuiñajjiya esohui huohuijji quecuajea'ya poa; ojaya huoojea'yo jajahuejjajea'ya poa meiya pea'ai. ¡Bacue oe! Cachina enaeseya ebacua huojje cani ejaahuanajji jama jayojja eyaya miqiuana iyaa sa neineiaña e que, ejaahuanajji. Jamatii enijje jjapeequi sa po ajja. Cajaa aña jama ba'a: “Chojja, Eyacuiñajjiya miya huoojea jjima ojjaña jaahuanajji”. ³⁸Jamajjeya ¡bacue! —Jesosa poanaje—, Eyacuiñajjiya miqiuianaya cajaa acaje'yo. Jeajea caje'yo ejaahuana majajji pojjeama. ³⁹E'e, eya jiquiojo tii nequi tii ajja. Jamajjeya eya miqiuianajaya ba o'oya jjima poaje e poe o'oya jjimahuajo. Quijje e poe o'oyajo ca nequiana ca oe jama poaje ba'a: “Jesosa miya Eyacuiñajjiya huoojea'yo ojjaña jaahuanajji. ¡Eyacuiñajjiya miya cajaanahuana cahua quea pame!” poaje miqiuianaya quijje —Jesosa poanaje Jenosanenajo ba'e cuana nijje.

—Eyacuiñajjiya equi cajjajeajea caje'yo cuaa mei cuana —Jesosa poanaje
(Macoso 13.1-2; Noca 21.5-6)

24 ¹Jesosa Eyacuiñajjiya equijo ani poquinaje. Poquijeya o shajja'ajjajji cuaa oya huohui canaje: —¡Bacue Eyacuiñajjiya equi! Quea quemo, quea pame mei cuana.

²—E'e. ¿A'a jiquio equi quea pame nee baña? E'e jojo nei quijje mei cuana cajjajeajea caje'yo cuaa. Chama'yo tii acaje'yo —Jesosa poanaje.

Dejja cuana quea mase nee poaje quijje
(Macoso 13.3-13; Noca 21.7-19)

³Quijje Jesosa eyiyo huasijje Onimo acui yiye yasijje jaasohuaquinaje o shajja'ajjajji cuana nijje. Anioquenaje. Pea dejja poqui jjima. Jamajjeya o shajja'ajjajji cuaa huohui'ajja canaje: —Jesosa, ¿ache shono acuae mei cuana cajjajeajea caje'yo cuaa so'o? ¿Ae acuae poaje mi epoe o'oya cuahuajje? ¿A'ya ba majje ecuanaja eba poaje miya poeje o'oya, meshi chama'yo tii epojji? —

⁴Jesosaa saja'a canaje: —¡Jjashahuaba neineiquicue onajaya miya edasijji pojjeama! ⁵Quea huiso sijjepojji poeje, ecuea ehoojea'yo pojjeama: “Eyacuiñajjiya eya huoojea canaje, eya ca ca iña ojjaña jaahuanajji” sijje poaje. Quea huiso dasia caje'yo. ⁶“Ojjaña jjaquecuauquiani ojjaña meshi yasijje” huohui caje peaya pea'ai. Jamatii ¡a'a quea mete pojji! Jamaya poaje.

Jamatii apoa pojjeama, oe po ajja jjima poaje so'lo —Jesosa poanaje—. 7E'e, jjaquecuaqui caje'yo cuana ojjaña meshi yasijje, ojjaña cuiñajji yasijje pea'ai. Quea huiso emanomeejjiya mano mee caje'yo; bobi yasijje po majje manoj'e'yo quea huiso; meshi huehuahuehuaje ojjaña meshi yasijje pea'ai —Jesosa poanaje—. 8E'e, jiquio ecua epona bacua cuayaje ebionei jipashineijje nee'ani; quijje quea nee nee. Jamaya poaje e poe o'oya jjimahuajo. Quea nee pishana po majje quea nee nee poaje ojjaña cuana —Jesosa poanaje.

9—Majoya pea cuaa miqianaya iña majje jeanobiajea caje'yo ecuiasejjajeajji, equecua'yojji pea'ai. Enijje jjapeequianijo miqianaya boti'ama nei poaje ojjaña meshijo ba'e cuanaja. 10Jamajoya quea huiso enijje jjapeepajeaqui'yo majje mimishi aje o'oya. Peaja epeejjija boti'ama poaje'yo —Jesosa poanaje—. Jamajoya dejja mase iña mee caje'yo equecua'yojji. 11Quea huiso pea cuana poeje: “Eya Eyacuiñajjija esohui huohuijji” sijje poaje. Cho, Eyacuiñajjija pojjeama. Jamatii, ecuea epeejji dasia caje'yo quea huiso. Poquiquehua mee caje'yo eshahua nijje. 12Dejja cuana shajjama' jayojja po majje emeshi mese cuana shajja'ajja sa po ajja poaje'yo. Jamajjeya pea cuana boti'ama poaje'yo. 13Jamatii e poe o'oya jjimahuajo, enijje jjapeequi pajea'yo ajja tii ca ca Eyacuiñajji nijje ba'e tiitijje'yo, enijje pea'ai —Jesosa poanaje.

14—Eya poeje o'oya. Eyacuiñajji nijje ojjaña cuanaja Emeshi Mese nei poaje'yo. Ma ehuhui'yo quea pame nee ojjaña meshi cuana huasijje huohui caje, ojjaña dejja cuana huasijje pea'ai ojjañaja eshajja'ajjajji. Majoya e poe o'oyajo ojjaña oe poaje —Jesosa poanaje.

Aquiana quea tai nee ojjaña quea mete nee nee epo meejji
(Macoso 13.14-23; Noca 21.20-24, 17.22-24)

15—Eyacuiñajjija esohui huohuijji Dañeniya yahuajo nei huohui ca poa jama ba'a:

“Quijje Eyacuiñajjija equijo nequije aquiana quea tai nee nee, ojjaña quea mete nee nee epo meejji”.

16Jamajjeya ma ba majje ca ca, ma pojajajo tii ojjaña Jodio meshijo ba'e capoquicuajiahua eyiyo cuana huasijje. (Jiquio ehuhui'yojjo cajiashahuabaquiahua quea ja'a epojji.) 17;Joya equi huisa biajje chacochoacani a'a equi yasijje dobiquinanajji aquiana cuana biohua edojjiji! 18;Joya quejo chacochoaqui pea'ai a'a equi yasijje poquinanajji daqui moojo! Eyiyo huasijje poquicuajji ajja aje oe mano'yo chana'. 19Epona cuana o'ejji, bacua sho'ijji pea'ai quea yeno poaje; quea camaja equehua poquicuajjiji poaje. 20Jamajjeya Eyacuiñajji nijje mimicie jama ba'a: “Eyacuiñajji, ieenajo pojjeama capoahua, epojja ejomishocajjijo pojjeama pea'ai ecuanaja epoquijji eyiyo cuana huasijje!” acue —Jesosa poanaje—. 21E'e, ma pojja cuanajo ojjaña quea mete nee nee, quea yeno nee nee poaje. Jamaya pojjeama yahuajo, meshi pana majje, jjeya nei pea'ai, quijje pea'ai; quea mete pishana, quea yeno pishana. Ma pojja cuanajo ca ca quea nee nee poaje dejja cuana —Jesosa poanaje.

22—Eyacuiñajjiya oe pojji cahuime quea camaja po mee caje'yo; oe pojji cahuime epo'yo joggemo ojjaña cuana mano'yome. Ojaya epeeji jaahuana canijo, ojaya quea nahue nee emano jeyojeyo'yoggi, Eyacuiñajjiya oe pojji cahuijo quea camaja po mee caje'yo, quea cahui huiso pojjeama —Jesosa poanaje.

23—Ma pojja cuanajo a'a jjashajja'ajjaquijji ona siajje poajo jama ba'a: “¡Bacue oe, Eyacuiñajjiya huoojea'yo Quito jiquiacua poe'yonaje!” jama poso, ja'a shajja'ajjajji! “¡Bacue oe, Quito jocuama pa poe'yonaje!” Jama onaa acajje ja'a jjashajja'ajjaquijji, a'a poquijji! 24E'e, Eyacuiñajjiya huoojea'yo ojjaña jaahuanajji e jayojja nisho, Eyacuiñajjiya esohui huohuijji nisho pea'ai poeje quea huiso nee nee. Ohuaya ma pea dejjaa ajjima acani acaje'yo Eyacuiñajjiya epeeji cuana dasia'yoggi nisho. Dasia caje'yo quea huiso nee; ecuea epeeji nei pea'ai beshahua nei eya pajea mee caje'yo o jayojja epojji; chojja, jjadasia meequi ajja. 25E shajja'ajjajji cuana, eyaya miya huohuinaje quijje oya poeje ejjadasiaqui'yoggi. ¡A'a oya cuana shajja'ajjajji! —Jesosa poanaje.

26—Jamajjeya a'a jjashajja'ajjaquijji onaa miya siajje acajje jama ba'a: “¡Baquicue oe, Quito jocuama huenihueni aijo nequi!” Jama acajje ja'a baquijji! “¡Bacue oe, Quito equi equecuayijji dojjojo ejja'aniquehuaqui ani!” acajje ja'a jjashajja'ajjaquijji; a'a o que dobiqijji! 27-28Cho, shajja'ajjacue ecue sohui: ¿A'a joya e'ihuijaa huasijje be'o cuana cuabesajebeje? E'e jojo nei miquianaaya eya baje joya ecua be'o e'ihui yasijje oqueani jama. Cuanaya pojjeje nei nei poajo jeaja'a cani eyajo; ojjaña ba caje quea huesha nee. Jamaya eya ojjañaja Edoe Mese poeje o'oya, pojjeje jama. Jeaja'ajeajebeje. Eya ojjaña ba caje'yo. Quehuajje pojjeama eya poeje'yo —Jesosa poanaje.

Jesosa ojjañaja Edoe Mese poeje o'oya
(*Macoso 13.24-37; Noca 21.25-28*)

29—E'e, quea camaja nee nee po majje majoya eshequi quea apo poaje'yo. Ba'i jiji'yo ajja poaje'yo. Majameta cuana jjacajjaqui'yo majje jijijijioqueje'yo ojjaña pea'ai. Majameta nequijji cuana huehuahuehuaje'yo janobajjima nei pea'ai.

30—Majoya miquianaaya baje aquiana eyajo. Ma ba majje huohuije jama ba'a: “¡E'e jojo nei Jesosa Quito ojjañaja Edoe Mese jjeyahua nei poeje o'oya, de!” poaje.

—Jamajjeya ojjaña cuana ojjaña meshijo ba'e quea mete nee nee poaje'yo. Ecuea epeeji pojjeama siasiaje jama ba'a: “Coya aje oe ¿ae shai poeje ba'a? ¡Bacue, ojjañaja Edoe Mese Jesosa Quito poeje o'oya bo biajje! Oya oe nei quea ca'a nee nee, quea sohui poja nee nee. Quea jeajahua nee nee pea'ai. Esohuidojojji quea ca'a nee onijje poeje quea huiso nee nee” poaje cuana —Jesosa poanaje—. 31Esohuidojojji quea ca'aa aquiana eshe'ana ai jayojja mia cajo, eyaya esohuidojojji cuana huoojeaje'yo biacua, macua huasijje pea'ai ojjaña ecuea epeeji cuana jjequiya —Jesosa poanaje.

Esohui acuijo, iquenajo, huohui canaje Jesosaa
(Macoso 13.18; Noca 21.29-33)

³²Jesosaa huohui canaje pea esohui jama ba'a: —E'e, eyaya miquianaya esohui ejjashahuabaqui meejji huohuije iquena acuijo. Esejaya meshijo acui iña'yani ba majje eseya jama poani ba'a: “E'e nei, nayaya po'yonaje. Jjeya eshequiaja po pajea'yonaje”. ³³—Jamaya eshequi, ba'i quea misi, majameta eyajo jijiijioque'ani ba majje pea'ai quea bihui jjashahuabaquicue jama ba'a: “E'e, jjeya nei apoa poaje. ¡Jjeyahua nei esejaya Emeshi Mese nei Jesosa Quito poeje o'oya!”

³⁴—E'e jojo nei ojjaña ma pojja cuanajo ba'e cuana mano jeyojeyo'yo jjimahuajo ojjaña apoa poaje'yo; eya ojjañaja Emeshi Mese oe nequije'yo. ³⁵E'e, aquiانا eyajo nequi chama' poaje'yo; ojjaña meshi chama'yo tii poaje'yo pea'ai. Jamatii ecuea esohui oe epo'yajji pojjeama; shajja'ajja tiitii caje'yo cuaa —Jesosaa poanaje—. ³⁶¿Ache shono shai jamaya poaje, ojjaña apoa poaje'yo? Dejja cuanaja ba jjima; esohuidojojji cuanaja ba jjima pea'ai; ecuea ehuhuijji pojjeama. Ecue Chiija eba ojaye nei. Ohuaye nei huohui caje'yo ojjaña apoa epo'yajji —Jesosaa poanaje.

¡Jesosaa poe o'oyajjijo jja'ishoa'ajjaqui anicue!
(Noca 17.26-30, 34-36)

³⁷—Yahuajo nei nei dejja Noe bajjani nequia poa. Noe enequiahuajo ojjaña cuana quea mimishi poa. Quijje eya ojjañaja Edoe Mese poe o'oyajo, ojjaña cuana quea mimishi poaje o'oya, yahuajo nei nei jayojjaya poaje o'oya. ³⁸Yahuajo ojjaña meshi ohua jjimahuajo jamatii dejja cuana ijja'ijjia ania poa. Ishi'ishi nequia poa pea'ai. Jjahuanaqui nequia poa. Jamaya poanaje Noe bishe ai yasijje dobiqii jjimahuajo. ³⁹Ona ojjaña jjashahuabaqui jjima anijo ena quea quemo poa. Jjayahuequia poa; johui oquea poa; hui'i ca'ya poa. Jamaya poaje o'oya eya ojjañaja Edoe Mese epoe o'oya cuahuajo: jjashahuabaquije cuana jama ba'a: “Jamatii ecuana quea pame nequi”. Ojjañaja ba jjima meshi ojjaña tii chama'yo tii poaje'yo. ⁴⁰E'e, e poe o'oyajo beca dejja nequije quejo. Oe dojosohuacui caje'yo; pea jea canaje'yo. ⁴¹Beca epona quecuapasha pashaqui, oe dojosohuacui caje'yo; pea jea canaje'yo, Eyacuiñajjiya —Jesosaa poanaje—. ⁴²¡Jamajjeya jjashahuabaqui tiitii anicue! Ache pojjaajo Emeshi Meseja epoe o'oyajji miquea ebajji pojjeama. ⁴³Jiquio jama poaje ba'a: Equi mese siipojji ache shono poeje poso jjabaquiani. Ojaya eba jojjemo ohuaya ishoa ca'anime, equi jaahuanajjiya. ⁴⁴Eya miquianajaya Edoe Mese ache pojjaajo miquiana que poeje o'oya ebajo ese. Jamajjeya ¡jja'ishoa'ajjaqui anicue! —Jesosaa poanaje.

Pea echacomeejji quea pame nee poanaje
(Noca 12.41-48)

⁴⁵—Ecuea esohui shajja'ajjacue echacomeejji cuanajo jama ba'a: Equi ai meseya poqui jjimahuaa echacomeejji iyaa canaje. Huoojea canaje: “¡Ecuea equi cuiñacue, miyaya! ¡Ecuea pea echacojji cuana oe bobiacue pea'ai! Quijje eya poeje o'oya”.

46—Equi mese poe'yo majje ojjaña quea pame nee ba caña'ya poa; quea bihui nee poña'ya poa. Jamajjeya echacomeeji quea bihui nee poanaje. 47Jamajjeya equi meseya echacomeeji quea pame huoojea caje'yo ojjaña ojaya aquiana cuiña. 48Pea echacomeeji siipoji ca ca jjashahuaba taiquiani jama ba'a: “Equi mese poquinaje quea huesha nee. Quije nei nei poje'yo”. 49Quea tecueya jjejojo ohuaya echacoji cuana cuia cani. Pea cuana nijje ishi'ishiani, huooani. Apoa pojjeama nequi. 50Equi mese ache pojajajo epoeje'yo poso acani. Jamajjeya equi mese quehua poje'yo. 51Ojaya equi cuiñajji poani ehuoo jaa baña'yo majje tecuea cañaje'yo. Jeacuayajea cañaje'yo ojjaña quea mimishi poani nijje. Jomajo quea nee nee poaje'yo tii tii; ese' ijjiyajjea caje'yo quea neeje —Jesosa poanaje—. Jiquio ecua equi meseya ojaya equi cuiñajji shajjama' tecueajea majje jeacuayajea caña'yonaje jayojja jamaya eyaya aje'yo ojjaña ejo ishoa'ajja, poe o'oya majje —Jesosa poanaje.

Epona sho'i cuana poquinaje pea epona sho'i jjahueaquequi baa

25 1—¡Pea esohui shajja'ajjacue Eyacuiñajji ojjaña Emeshi Mese oe nei poajejo! Jiquio jayojja jama poaje ba'a: Epona sho'i ahuema'ani ome miji pea'ai huisome, 10 poa. Ma jjahueaquequi baa cuaquijji dojo canaje. 2Me oeje epona jjashahuabaquinaje. Pea me oeje jjashahuabaqui jjima. 3Joya jjashahuabaqui jjimaa cuaquijji dojo canaje; jamatii esei dojo jjima ejijijji, de. 4Peaa jjashahuabaqui majje cuaquijji dojo canaje esejji. Tahuoojo dojo canaje pea'ai ejijijji.

5—Epona sho'i cuana quea cojja jee mano po majje cahuinaje. Shacuima' nequi mecashono poeyanaje. 6Jamajjeya mecashono pea equi yasijje poe'yo majje taaanaje; “Shacuima' nequi aje poe'yonaje. ¡Cua'a, baquicue!”

7—Taaaje shajja'ajja majje ojjaña epona sho'i cuana shequinaje. Ejijijji hui jeacuaya canaje. 8Epona sho'i jjashahuabaqui jjima cuaa ma ejjashahuabaqui cuana huohui'ajja canaje jama ba'a: “¡Esei mo quiacue! Esei ecuanaja oe poanaje. Cuaquijji ecuanaja jiji'yo ajja”.

9—Epona sho'i ojaya ejjashahuabaqui'yo cuaa saja'a canaje: “Miquea esei chama' eshojji. Ecuea ca ca jiquio che oe pojji. ¡Poquicue miya ma esei quia caqui yasijje; jocuama jjequicue!”

10—Jocuama o poquihuajo, shacuima' nequi poeyanaje. Ojjaña dobiqiu'yonaje, joya apoa epo, o jjahueaqueji equi yasijje. Dobiqiu majje esecue ca'a canaje. 11Joya esei jjequiya poquiya cuana poe'yo majje esecue eca'a nequi ba caña'yonaje. Taaa aninaje: “¡Che esecue ca'apejocue!”

12—Shacuimaa eyiye dojjojo nequiya saja'a canaje: “Chojja, ecuea miya ba jjima” acanaje. Jamaya poanaje —Jesosa poanaje.

13—E'e —Jesosa poanaje oja epeeji cuana nijje—, ¡jamajjeya jja'ishoa'ajjaqui ani tiitiicue pea'ai! Ecuea epoe o'oyajji miquea ebajji pojjeama.

Esohui ejjeshejjijo

(Noca 19.11-27)

¹⁴Jesosaa pea esohui eba meesahuajji huohui canaje: —Jjeya eyaya pea esohui huohuije, eya ojjañaja Emeshi Mese poe o'oyajo —Jesosa poanaje—. Jama poaje ba'a: Oe dejjaa, emeshi meseya quea huesha poqui jjimahuajo iyaa canaje ojaya echacojji cuana, ojjaña ojaya aquiana jaahuana meejji. ¹⁵Majoya ohuaya oe echacojji quea jjashahuabaqui ja'a huasijje esodojjo me oeje, 5 huisome quea nahue nee nee quia canaje aquiana jjeshejji, quea huiso bejjo chichajji. Pea echacojji quea jjashahuabaqui ja'a pishana huasijje beca esodojjo quea nahue nee nee quia canaje aquiana jjeshejji, quea huiso bejjo chichajji. Pea echacojji beshahua nei jjashahuabaqui ajja huasijje oe esodojjo quea nahue nee nee quia canaje bejjo chichajji nisho. Esodojjo quia majje emeshi mese poquinaje.

¹⁶—Echacojji quea jjashahuabaqui ja'aa ojaya esodojjo me oeje huisome quea nahue quia canaje aquiana jjeshejji. Majoya chicha canaje ome pea'ai huisome. ¹⁷Oya jayojjaya pea echacojjiya ojaya beca esodojjo quea nahue quia canaje aquiana jjeshejji. Majoya ohuaya chicha canaje ebeca pee pea'ai huisome esodojjo. ¹⁸Pea echacojji aje oe jjashahuabaqui ajja poanaje. Ojaya emeshi meseja esodojjo oe nei quehuajje nei ohua canaje.

¹⁹—Quijje nei emeshi mese poe o'oyanaje ojaya echacojji cuana huasijje. Jjashahuabaquinaje jama ba'a: “¿Ae shai poani so'o echacojji cuana ecuea esodojjojo?” Jamajjeya echacojji cuana iyaa majje huohui'ajja canaje: “¿Ache huiso esodojjo yani so'o jjeya?”

²⁰—Echacojji esodojjo me oeje huisome jaahuanajji ojaya emeshi mese nijje jama poanaje ba'a: “Yahuajo nei miyaya me oeje esodojjo quia'yonaje eya. Ma'aje miquea. Pea me oeje huisomeya miquea poanaje. Ma'aje pea me oeje ecue chicha” poanaje echacojji.

²¹—Ojaya emeshi mese onijje quea bihui nee poanaje jama ba'a: “E'e de, miya echacojji quea pame nee. Yahuajo eyaya miya quianaje me oeje esodojjo. Miyaya maya quea pame nee chichanaje. Jamajjeya jjeya eyaya miya ecuea aquiana quea huiso jaahuana meeje'yo. Cua'a, jenijje anicue quea bihui nee!” emeshi mese poanaje quea bei nee.

²²—Majoya pea echacojji poeyanaje, ma beca esodojjo yahuajo quia canaje. Ma echacojji jama poanaje ba'a: “Emeshi mese, yahuajo nei miquea esodojjo becanejjijji pea'ai quia'yonaje eya. Ma'aje miquea beca esodojjo. Pea esodojjo becanejjijji pea'ai ecue chicha yenaje. Ma'aje ecue chicha esodojjo pea'ai” echacojji poanaje.

²³—Emeshi mese onijje quea bei miminaje jama ba'a: “E'e, de, miya echacojji quea pame nee. Yahuajo eyaya miya quianaje esodojjo becanejjijji pea'ai. Miyaya pea chichanaje quea pame nee. Jamajjeya jjeya eyaya miya ecuea aquiana quea huiso jaahuana meeje'yo. Cua'a, jenijje anicue quea bihui nee!” emeshi mese poanaje.

24—Majoya pea echacojji poeyanaje, ma esodojjo oe nei quia canaje. Emeshi mese huohui canaje ohuaya jama ba'a: “Emeshi mese, ecuea eba miya quenequene cuajiani. Miyaya miquea echacojji chaco meeña sosema'. Quea dejja taija jjejojo miquea aquiana quea huiso yani” jama posoya acanaje echacojjiya. 25“Jamajjeya eya quea mete poanaje. Miquea esodojjo emoquehua aninaje onaa esii ca poani jjejojo. Ma'aje miquea bejjo, ma miyaya quianaje huisome tiya” echacojji poanaje.

26—Ojaya emeshi meseya oya acanaje: “Miya echacojji quea mimishi, quea huea. Miya quea jjashahuabaqui tai poanaje jama ba'a: —Ecuea echaco sosema' poanaje. Ecuea emeshi mese quea dejja tai. Jamajjeya quea huiso ojaya aquiana yani —miya poanaje. Siajje miya poani. Miquea ejjashahuaba taiquijji jayojja jama eyaya miya aje. 27 ¿Apiojji acuae miyaya ecuea ejjeshejji mi quianaje bejjo jaajji yasijje? Quijje pishana ohuaya eya quea huiso quia ca'yo queaye”.

28—Emeshi mese ma echacojji nijje quea tecue poanijo pea cuana huoojea canaje jama ba'a: “Echacojji quea hueaa jjejojo ecuea esodojjo mi chicha canaje. ¡Maya esodojjo oe nei jjeshe majje quia'yocue pea echacojji huea'ama huasijje, maya ecuea esodojjo me oejje ecue quia poanaje yasijje quiacue! 29 E'e, joya huea'ama poani aquiana cuana quia caje cuaa. Dejja aema' quea hueaja aquiana ojjaña jjeshe'yo majje dojo caje'yo cuaa. 30 Jiquio echacojji cajaa ajeaje'yo; quea huea coma. Enijje oya enequijji pojjeama. Huoojeacuayajeaje'yo. Oya quea yeno nee nee poaje'yo. Quea nee nee pea'ai poaje'yo” emeshi mese poanaje —jamaya Jesosaa acanaje.

E'e, jiquio Jesosaja ejjashahuabaqui'yojji jama ba'a: Poe o'oya majje Jesosaa ojaya epeejji quea jjashahuabaqui ja'a quea pame ba'e mee caje'yo onijje eyajo. Onijje ona huoojea'yojji po mee caje'yo. Pea echacojji quea huea ba majje ca ca cajaa acaje'yo. Quea nee nee poaje'yo oya cuana.

Esohui Jesosa Quitoja ojjañaja Edoe Meseja epoe o'oyajjijo

31 Jesosaa huohui canaje pea'ai: —Eya poe o'oya majje quea ca'a poaje'yo. Ojjaña huoojea'yojji poaje'yo. Ojjaña esohuidojojji cuana enijje poeje'yo. Majoya eya ba'esohuaqui'yo majje eyahuasijje, jocuama eya nequije'yo, Emeshi Mese nei. 32 Ojjaña cuana e que jjachichaqui meejje'yo. Majoya eyaya ñajjajja cuiñajji jayojja jama aje jama ba'a: Ñajjajja cuiñajjiya ñajjajja cuana, chivo cuana nequiashiña cani. 33 Ñajjajja oo pana nequiashiña cani ebianeijje. Chivo ca ca huapa nequia acani, shanijje. 34 Ñajjajja cuiñajji jayojja jama eyaya, ojjañaja Emeshi Meseya ojjaña dejja cuana nequishiñaje'yo. Ecuea epeejji quea pame nee ebianeijje nequijaje'yo. Oya cuana aje'yo jama ba'a: “Miquianaya ecue Chijja bacua cuana e'e jojo nei poanaje, ojaya huapa pojjeama. Jamajjeya onijje nequi tiitijje'yo. Eyacuiñajji jamaya jjashahuabaqui'ya poa yahuajo nei nei, meshi pana jjimahuajo. 35 Jamaya poaje'yo jjeya miquianajo, miya quea pame nee nee poanajejo. E'e, yahuajo eya quea shoe poajo, eya bobi quianaje miyaya. Eya quea naba taja poajo, ena quianaje miyaya. Eya miquianajaya ba jjima poanaje. Jamatii miquea equi yasijje dobiqui meenaje. 36 Eya daquima'

poajo, miqianaaya daqui huosho meenaje. E emanojaajo, ejeanobiajaajo pea'ai, miqianaya poeyanaje enijje jjapeequiya” jamaya eyaya aje'yo —Jesosa poanaje.

37—Majoya dejja pame cuaa eya huohui'ajja caje jama ba'a: “¿Ache shono acuae ecuaaya miya bobianaje, miya quea shoe poanajejo? ¿Ache shono ena quianaje miya quea naba taja poanajejo? 38 ¿A'a miya ecuanaja equi yasijje dobi meenaje? ¿A'a daqui huosho meenaje miya daquimajo? ¿Ache shono shai ecuaaya jamaya anaje? 39 Mi emanojaajo, ejeanobiajaajo pea'ai, ¿a'a ecuaa mi que poeyanaje? ¿Ache shono acuae jja jama ecuaaya mi anaje so'o?” Jamaya dejja pame cuaa quijje huohui'ajja caje eya eyajo.

40—Jamajjeya eyaya, Emeshi Mese neiya saja'aje'yo quijje eyajo jama ba'a: “Miyaya ecuea huapa pojjeama aema' yahuajo jaahuananajejo, eya jaahuananaje. Jamajjeya ecuea eba miqianaya ecuea epeeji e'e jojo nei poanaje. Ecuea ejjashahuabaqui'yojji jayojja jama ca ca miyaya a'yonaje”.

41—Mayoya eyaya, Emeshi Mese neiya dejja tai cuana shanijje nequi tecueaje'yo jama ba'a: “¿Poquicue miya! Cajaa'yo ca mi ca ecua. Edosiquiana etii Satanasa, eshahua cuana pea'ai cuaqui yasijje poquije'yo. Miya cuana pea'ai anije'yo cuaquijo tii. 42 Yahuajo eya quea shoe, bobia jjima poanaje miquea. Eya quea naba taja, ena quia jjima poanaje. 43 Eya miquea eba pojjeama, miquea equi yasijje dobi mee jjima poanaje. Eya daquima', daqui huosho mee jjima poanaje miquea. E emanojaajo, ejeanobiajaajo pea'ai miya poe jjima poanaje e jaahuanaa” jamaya eyaya aje dejja mimishi cuana —Jesosa poanaje.

44—Majoya dejja mimishi cuaa eya huohui'ajja caje jama ba'a: “¿Ache shono acuae miya bobia jjima apoa? ¿Ena cuana quia jjima apoa? ¿A'a ecuanaya miya ecuanaja equi yasijje dobi mee jjima apoa? ¿A'a daquimajo, ecuanaya daqui huosho mee jjima apoa? ¿A'a mi emanojaajo, ejeanobiajaajo pea'ai, a'a miya ecuanaja jaahuana jjima apoa? ¿Ache shono shai, de?” dejja mimishi cuaa huohui'ajja caje —Jesosa poanaje—. 45 Majoya eyaya, Emeshi Mese neiya saja'aje'yo jama ba'a: “Ecuea huapa pojjeama cuanajje jaahuana jjima. Jamajjeya miqianaaya eya cajaa a'yonaje pea'ai”.

46—Majoya eyaya, Emeshi Mese neiya dejja quea mimishi cuana quea huesha nee huoojeaje'yo cuaqui yasijje edobiqui'yojji. Quea nee nee po tiitiije'yo. Dejja pame cuana ebianeijje nequi ca ca ba'e tiitii meeje'yo Eyacuiñajji nijje —jamaya huohui canaje Jesosaa.

Jodio etii cuana jjashahuabaquinaje Jesosa quecua'yojji
(Macoso 14.1-2; Noca 22.1-2; Huani 11.45-53)

26 1 Majoya Jesosaa o shajja'ajjajji cuana jjabahuejjaqui mee canaje. Pea esohui huohui canaje jama ba'a: 2—Quijje pishana, becanejjijji pea'ai cahuime po majje, Jodio cuana jjashahuabaquije o'oya etiiquianaja bacua cuana yahuajo Ejitojo mano'yo jjima poajo. Jamajjeya ojee ijijia'ijijiae o'oya quea bei nee. E'e, yahuajo nei nei Ejito meshijo ani Jodioja ebacua

ejja cuia'yo jjima aca poa esohuidojojjiya. Ma shejo ijia jjimahuajo Jodio cuaa eya iña majje dejja quea mase yasijje quia caje'yo equecua'yojji. Acui ecueata'apeejo me caca majje ba'ehuanasohuajea caje'yo —Jesosa poanaje.

³Majoya Eyacuiñajji nijje emimijji etii cuana, Jodio dejja jaahuanajji cuana pea'ai ojee jjachichaquinaje Eyacuiñajji nijje emimijji etijia equi aijo, Caipa bajjanija equijo. ⁴Caipa jjashahuaba taiquinaje pea cuana huoojajji Jesosa iñajji, quijje equecua'yojji. ⁵Jodio etii cuana ojee miminaje jama ba'a: —¡Jesosa quehua neijje iñacue ojjaña Jodio cuana jjachichaqui jjimahuajo, ojee ijia'ijia jjimahuajo! ¡Oya iñacue jeyahua nei, de! Quijje pishana ojjaña ojee ijia'ijia anijo, ecuanajaya Jesosa e'iñajji pojjeama. Chojja. Ojjaña Jodio cuana quea quene nee nee ecuaña nijje po chana', Jesosa onajaya quea nahue nee equecua mee'yojji. Quea shajjaquijjo po chana' pea'ai —jamaya acanaje Jodio etii cuaa.

Jesosa Betaniajo ani sapa sha canaje shiyeshiyeya eponaa

(Macoso 14.3-9; Huani 12.1-8)

⁶Jesosa Betaniajo aninaje dejja Simoni bajjanija equijo. Yahuaajo nei Simoni quea mano nee nee batata epo'yo poa, ma dejja cuaa jjajeaqui mee'yo jjima acani. Jesosaa oya yahuaajo huaquia mee ca'yonaje, jjajeaqui mee ca'yonaje. Simonija equijo Jesosa e'anioque aninaje. Ijia'ijia aninaje bobi ijiajji pejeje. ⁷Jesosa ijia'ijia anijo, oe epona poe'yonaje o que. Ohuaya tahuoo quea nahue neejo shiyeshiye ye canaje Jesosa huojja shajji. Huojja sha canaje. ⁸Ba majje Jesosa shajja'ajjajji cuaa epona tecuea canaje: —¿Apiojji acuae miyaya shiyeshiyeya shaña so'o? ⁹¿Sha jjima yajjijo poso ca mi ca oe shiyeshiye dojo meenaje esodojjo quea huiso sosejje? E'e, aema' cuana huasijje esodojjo equiajji poso —Jesosa shajja'ajjajji cuana poanaje.

¹⁰Jesosaa oya cuana shajja'ajja majje huohui canaje: —¿Apiojji acuaeya epona tecueaña so'o? E'e, eya ohuaya huojja sha canaje. Jamaya quea pame nee. ¹¹Aema' cuana minijje po tiitijje'yo. ¡Oya cuana jaahuana'yocue quijje pea'ai! Eya ca ca nequi tiitii ajja minijje. ¹²Eya huojja sha cajo epona jjashahuabaquinaje jama ba'a: “Jesosa mano'yo jjimahuajo eyaya oya huojja shaña shiyeshiyeya, onaja mojea jjimahua shaña” poanaje epona —Jesosaa acanaje—. ¹³Jamajjeya quijje ojjaña meshijo ecuea esohui huohui caje. Jiquio eponajo huohui caje pea'ai jama ba'a: “Oe eponaa Jesosa huojja sha ca poa shiyeshiyeya, quea jeajojo”. Jiquio epona pajea'yo ajja tii tii, e'e jojo nei —jamaya Jesosaa acanaje.

Jodasaa onaya iña meesahua canaje Jesosa

(Macoso 14.10-11; Noca 22.3-6)

¹⁴Yaninaje quea huiso Jesosa shajja'ajjajji cuana, 12. Oe nei Jodasa Isicaniote bajjani poquinaje Eyacuiñajji nijje emimijji etii cuana huasijje. ¹⁵Miminaje jama ba'a: —Eyaya miya Jesosa iña mee sahuaje. ¿Ache sose huiso acuae mo ya oe sosequiaje'yo so'o?

¹⁶Onaaya saja'a canaje jama ba'a: —Quea huiso, 30 esodojjo quea nahue nee sosequiaje'yo miya.

Jamajjeya Jodasa jashahuaba neinei qui aninaje achajja ña meeme aje so'o cuana: —Caba'ajjaquisahua —poanaje.

Jesosaa o shajja'ajjajji cuana bobi ijia mee canaje

(Macoso 14.12-25; Noca 22.7-23; Huani 13.21-30; 1 Conitio 11.23-36)

¹⁷Jodio cuana quea bihui ojee ijia'ijjianaje yohua shejo ba'a esohuidojojia yahuajo nei etiquianaja bacua cuana cuia'yo jima ñajjaja na' esecuejo ecuiapepa ba majje shejo. Pahui quea ca'a eshejee meeji chama' ijia ca poa. Ebonei epojja e'ijia'ijjijio, Jesosa que poe majje o shajja'ajjajji cuahuhui'ajja canaje jama ba'a: —Jesosa, ¿ache equijo acuae seya pahui ca'a ijiaje so'o? ¿Ecuana huoojeacue aquiana iyajea, miquiana ishoajji!

¹⁸Jesosaa huohui canaje jama ba'a: —¿Poquicue miya cuiñajji yasijje! ¿Jomajo ecuea epeeji baquicue! Onijje mimicue jama ba'a: “Ecuana sohui huohuiji jama poanaje ba'a: —E mano'yajo aje apoa poaje. Miquea equijo eyaya e shajja'ajjajji cuana nijjeya pahui ca'a ijiaje'yo, esohuidojojia etiquianaja bacua eja cuana cuia'yo jima poa shejo” acue —Jesosaa huohui canaje.

¹⁹Jamajjeya o shajja'ajjajji cuana ojaya ehoojea'yo jayojjaya jama poanaje. Bobi iyajea canaje pahui ca'a ijiajji.

²⁰Majoya sinecua neijo Jesosa o shajja'ajjajji cuana nijje anioquenaje bobi ijiajji pejejo ijia'ijjiaa. ²¹Ojee ijia'ijjia'anijo Jesosa jama poanaje ba'a: —E'e jojo nei jiquiojo ani oe dejja poquije ona jjequia e ña'yojji. Ohuaya eya huohui caje cuana.

²²Eshajja'ajjajji cuana quea yeno nee nee poanaje. Pea mimiajo pea poanaje jama ba'a: —Ecuea Emeshi Mese, eya ca ca o jayojja pojjeama, e'e jojo nei.

Jamaya ojjaña miminaje. ²³Majoya Jesosa onijje miminaje jama ba'a: —Oe dejjaa e shajja'ajjajjia joya enijje pahui shapeshi po'aniya eya onaya cuana ña mee caje'yo. ²⁴E'e, yahuajo nei Eyacuiñajjia esohui tehueji cuahuhui'ajja esohui tehue ca poa jama ba'a: “Quijje oe dejjaa Eyacuiñajjia huoojea'yo ojjaña jaahuanajji onaya cuana ña meesahua caje'yo equecua'yojji”. Jamajjeya ma dejja quijje quea yeno poaje. Jashahuabaquije jama ba'a: “¿Apiojji shai eya ecue naeya mejo ca poa? Eya ca ca nequi sa po ajja. Ecuea ejshahuaba taiquijjio mano'yo sa poani” oya poaje. Quijje oya quea nee nee po tiitijje'yo —Jesosa poanaje.

²⁵Majoya Jodasa Jesosa nijje miminaje jama ba'a: —Emeshi Mese, eya ca ca o jayojja pojjeama. Eyaya miya onaya e'ña meesahuajji pojjeama —poanaje.

Jesosa onijje miminaje: —E'e, Jodasa, miya jama quea tai poaje, e'e jojo nei —Jesosa poanaje.

²⁶Majoya ojee ijia'ijjia'anijo tii Jesosaa pahui ca'a jjeshe canaje. Eyacuiñajji bihuia majje, pahui mijjisi majje quia canaje o shajja'ajjajji cuana. Jama huohuime acanaje Jesosaa ba'a: —¿Ijjiacue! Jiquio ecuea eyami —poanaje.

²⁷Pahui ijia majje caneco jjeshe canaje, Jesosaa. Eyacuiñajji bihuia majje quia canaje ojjaña o shajja'ajjajji cuana. —¡Ishicue! Jiquio ecuea ena'!
²⁸Ecuea ena' cuayaquijajo eya manojeyo. Jamajoya eyaya Eyacuiñajjija esohui eyacua jayojjaya aje. E'e, ojjaña ecuea epeejjija mimishi cuana cuijeaje'yo. ²⁹Jjeya eyaya jiquio jjonojjajja na, uva na e'ishi o'oyajji pojjeama miqiuana nijje; eya manojeyo. Quijje nei poe o'oya majje eyaya jiquio ishije o'oya miqiuana nijje. E'e, eya poe o'oyajo ecue Chiiya eya ojjaña huoojeyoyojji po mee caje'yo. Ojjaña eya shajja'ajja caje'yo —jamaya Jesosaa acanaje.

Jesosa miminaje Peno nijje

(Macoso 14.26-31; Noca 22.31-34; Huani 13.36-38)

³⁰Majoya ojee sohuicuaya majje poquinaje eyiyo huasijje Onimo yiye yasijje.

³¹Majoya Jেসosa o shajja'ajjajji cuana nijje miminaje jama ba'a: —Jiquio mecajje ojjaña miqiuana enijje jjapeequi pajaje'yo. E'e, yahuajo Eyacuiñajjija esohui tehuejji cuaa tehue ca poa ejo: Eya ñajjajja cuiñajji jayojja jama poaje. E manoyajo ecuea epeejji cuana ñajjajja cuana jayojja jama poaje; jjajeajajaequinanaje'yo. Etehue'yo yahuajo nei nei jama poa ba'a:

“Quijje eyaya ñajjajja cuiñajji jaahuana neinei ajja. Jamajjeya onaaya oya cuia caje'yo. Ñajjajja cuiñajji chamajo, ñajjajja cuana jjajeajajaequinanaje'yo”. Jamaya aca poa yahuajo nei nei —Jesosa poanaje—. ³²Jamatii, shequi o'oya majje eya poquije Janinea meshi yasijje. Jomajo aje mi poeyajo ishoañaquije —Jesosa poanaje.

³³Penohua Jেসosa jama acanaje ba'a: —E'e pojja'a pea cuana minijje jjapee tiitiiqui'yo ajja. Eya ca ca pea jayojja jama pojjeama. Eya jjapee tiitiiquije'yo minijje —Peno poanaje.

³⁴Jesosaa Peno jama acanaje ba'a: —Eyaya e'e jojo nei miya huohuiaña Peno, jiquio mecajje tii cachina yahue pea beca peejjima taaame po jjimahuajo, pea beca peejjima huohui'ajjame amajje miya ejo poaje jama ba'a: “Chojja, ¡ecuea Jেসosa ba jjima nei nei!” miyaya saja'ame aje quea meteya jjejojo —Jesosaa Peno acanaje.

³⁵—Chojja, Jেসosa —Peno poanaje—. E'e pojja'a eya minijje jjapeequianijjo, pea cuaa eya cuiajea caje'yo. Jamatii ¡ecuea ca mi ca epaje'yojji pojjeama!

Oya jayojja pea cuaa jama acanaje pea'ai ba'a: —E'e Jেসosa, ¡ecuanajaya ca mi ca epaje'yojji pojjeama tii!

Jetesemani quejo Jেসosa miminaje oja Chii nijje

(Macoso 14.32-42; Noca 22.39-46)

³⁶Majoya Jেসosa o shajja'ajjajji cuana nijje Jetesemani que yasijje poquinaje. Jেসosa jama poanaje ba'a: —¡Anioquecue jiquiojjo tii! Jocuama eya poquije ecue Chii nijje mimiya.

³⁷Jেসosa Peno, Huani, Satiaco pea'ai dojo canaje jocuama, ma Semeneoja bacua ejja cuana bajjani Huani, Satiaco pea'ai. Jেসosa

jjashahuabaquinaje quea yeno nee nee. ³⁸Jamajjeya onijje jama poanaje ba'a: —Eya quea yeno nee nee, emano ca'yojji jayojja. ¡Anioquecuc enijje; a'a cahuijji! —Jesosa poanaje.

³⁹Jesosa cuama pishana ani poqui majje ecui'oshajjajo nequinaje. Oja Chii nijje miminaje jama ba'a: —Ecue Chii, miquea ejjashahuabaqui'yojji jayojja jama aje'yo eyaya. Miyaya eya huoojeanaje dejjaja mimishi cuanajo mano'yohua. Quea camaja nee nee ejo. ¿A'a miyaya che onaaya eya quecua mee'yo jjima aje so'o? ¿A'a onaaya eya iña mee'yo jjima aje'yo? Jamatii ¡miquea ejjashahuabaqui'yojji jayojja jama acue! ¡Ecuea ejjashahuabaqui'yojji jayojja jama a'a ajji! —Jesosa jamaya poanaje.

⁴⁰Majoya oya poqui o'oyanaje o shajja'ajjajji cuana que. Ba cañaqui'yonaje cahuijaa. Tecue'lama Peno nijje miminaje jama ba'a: —¿A'a mi cahuijaa? ¿A'a che enijje cahui jjima nequi jjima so'o? ⁴¹¡A'a cahuijji! ¡Eyacuiñajji nijje mimi majamajacue! Jamajoya pea cuaa miya quea mimishi epo mee'yojji pojjeama. E'e, miqianaya enijje jjapeequi sa poani e'e jojo nei. Jamatii miya ca'a'ama; quea mimishi poaje o'oya pojja'a —Jesosa poanaje.

⁴²Majoya Jesosa poqui o'oyanaje jocuama pishana oja Chii nijje mimi o'oyaa. Mimi o'oyanaje jama ba'a: —Ecue Chii, eya ojjañaja mimishijo mano'yo ajjajo, ¿a'a onajaya mimishi ecuijea'yojji pojjeama poaje'yo? Jamajjeya ¡miquea ejjashahuabaqui'yojji jayojja jama acue! —Jesosa poanaje.

⁴³Oja Chii nijje mimi'yo majje Jesosa poqui o'oyanaje o shajja'ajjajji cuana que. Oya cuana quea cojja jee mano poanaje; cahui o'oyanaje. Jamatii Jesosaa onijje mimi jjima; shequi mee'yo jjima acanaje. ⁴⁴Ona jeana o'oya majje jocuama pishana poqui o'oyanaje Jesosa, oja Chii nijje mimi o'oyaa. Oya jayojja mimi o'oyame poanaje. ⁴⁵Mimi o'oya majje poe o'oyanaje o shajja'ajjajji cuana que. Onijje mimi o'oyanaje: —¿A'a mi cahuijaa tii? ¿Jomishocajaa pojja'a ca mi ca oe? Jjeyahua nei dejjaa eya onaya iña meesahua caje'yo. ⁴⁶¡Cua'a, jjeya nei ecuea epeeji nisho poeje'yo! Joya aje poeje ba'a.

Jesosa iña canaje

(Macoso 14.43-50; Noca 22.47-53; Huani 18.2-11)

⁴⁷Jesosa mimianijo tii, Jodasa o que poeyanaje, ma eshajja'ajjajji cuana sohuihuohui poequi yasijje. Oya aje oe Jesusaja epeeji pea'ai poanaje; pea 11 nijje nequinaje tii. Quea huiso nee nee dejjaja nijje Jodasa poeyanaje; yohuajji poeyanaje acuijji, baajji, mejeji pea'ai poeyanaje. Jodio etii cuaa, Eyacuiñajji nijje emimijji etiiya pea'ai ojjaña huoojea canaje Jesosa iña. ⁴⁸Jodasaa, Jesosa e'iña meejiya yahuaajo jama huohuime aca poa ba'a: —¡Bacue oe! Eyaya oe dejjaja ba majje cuiapashi nishoje. ¡Majoya oe miqianaaya iñacue!

⁴⁹Jamajjeya Jodasa Jesosa que jjanequichipiquinaje: —¡A'a mi ecuea Emeshi Mese nei jiquio! —amajje cuiapashi nisho canaje.

⁵⁰Jesosaa acanaje: —Ecuea epeeji Jodasa, ¿ajeo ami poeyanaje? —Jesosa poanaje.

Pea dejja cuaa ba majje, Jesosa que poe majje iña canaje edojjji. ⁵¹Jesosa iña cajo, oja epeejiya onijje nequiya baa iña canaje. Onaja sapa jajapojojeajji nisho shajja jajasejja canaje, Eyacuiñajji nijje emimijji etiija echacojji poanija eshajja.

⁵²—Chojja. ¡A'a jja oe jajajji! —Jesosaa oya huohui canaje—. ¡Baa oe ejee yasijje nequianobia'yocue! Ojjaña jjajajaquiani manoj'e'yo yacua ca'yajje. ⁵³¿A'a miquea eba pojjeama eyaya ecue Chii ehuhui jojjemo ohuaya esohuidojojji ache huiso nei nei huoojea came jjeyahua nei, e jaahuanaa? ⁵⁴Jamatii eya jama po ajja. E'e, yahuajo nei Eyacuiñajjija esohui etehue'yo jama tehueme ejo aca poa ba'a: “Onaaya iña mee majje dojo caje emano mee'yojji”. Jamaya ejo yahuajo nei tehue ca poa. Jamaya eya acaje'yo cuaa jjeya —Jesosa poanaje.

⁵⁵Jamajjeya Jesosaa ojjaña dejja ejjachichaqui'yo nequi yasijje huohui canaje: —¿Apiojji miya poeyanaje baajji, acuijji, mejejji pea'ai e iña? ¿A'a cuae jja iña siipojji so'o? Ojjaña pojajajo eya ojjaña nijje esohui huohuijji po nequinaje Eyacuiñajjija equijo. Jamatii eya miquianajaya iña jjima poanaje. ¿Apiojji miquianaya mecajje poeyanaje e iña? ⁵⁶Jamatii jamaya nequiana poani. Miquianaaya ca mi ca oe Eyacuiñajjija esohui huohuijji etehue'yo yahuajo nei nei miquianajo jayojja jama quea tai aña.

Majoya o shajja'ajajji cuana cuajicuajinanana; Jesosa jeajea canananaje.

Jodio etiija Jesosa cuia mee canaje

(Macoso 14.53-65; Noca 22.54-55, 63-71; Huani 18.12-14, 19-24)

⁵⁷Jamajjeya joya Jesosa iñajji cuaa oya dojo canaje Eyacuiñajji nijje emimijji etiija equi yasijje, Caipaja equi yasijje. Jocuama Jodio cuana jjachichaquinaje, Jodio etii cuana, Moisesija etehue'yo huohuijji poani pea'ai. ⁵⁸Penohua ca ca equijje aca poquinaje Jesosa onaa dojo caje. Caipaja equi yasijje Peno nequiñaquinaje. Dobiquinaje epeeyi nequi yasijje, sohuinana cuana nijje anioquenaje ae onaa Jesosa acaje ebajji.

⁵⁹Eyacuiñajji nijje emimijji etii, ojjaña Jodio etii cuana, Jodio esohui huohuijji poani pea'aiya ojee mimimiminaje Jesusajo, ojjaña ejjachichaqui nequiya o quecua'yo sa acani. Jamajjeya sa'ajja canaje dejja cuana Jesosa huohuijji nisho, Shomano emeshi mese Pinato bajjani yasijje dojo majje Jesosa huohuijji nisho: —Jesosa ca ca jama acanaje ba'a —sijje yajji.

⁶⁰Quea huiso dejjaa Jesosa sijje acanaje. Jamatii peaa sijje'a, peaa sijje'a acanaje Jesusajo. Chama' beca oya jayojja mimime epojji Jesosa mano mee'yojji. ⁶¹Quijje yejje nei beca dejja poeyanaje e'e jojo nei jayojja emimijji. Jama poanaje ba'a: —Eyaya oya shajja'ajjanaje. Jama poanaje Jesosa ba'a: “Eyaya Eyacuiñajjija equi jeabichajeaje'yo. Jeabichajea'yo majje pea equi iyaje'yo pea beca peejjima cahuime”.

⁶²Ma shajja'ajja majje Eyacuiñajji nijje emimijji etiija nequisohua majje Jesosa huohui'ajja canaje: —¿A'a pa miya jama poanaje? ¿Jesosa, a'a acuaeya dejja cuana miyaya saja'aje'yo so'o?

Jamatii Jesosa jjamimisaja'aqui ajja poanaje.

⁶³Jamajjeya Eyacuiñajji nijje emimijji etiya huohui neinei canaje: —¡Eyacuiñajji eshe nequi tiya eseya ba canijo, ecuana huohucue e'e nei! ¿A'a acuae miya Eyacuiñajjija Bacua Ejja nei, oja huoojea'yo ojjaña jaahuanajji? ¡Huohucue mo oe!

⁶⁴Jamajjeya Jesosaa huohui canaje: —E'e, joya ecua miya mimiani jayojjaya eya. Cuanaya eyaya miya e'e nei huohuiaña: Quijje miyaya eya baje'yo ecue Chii nijje ebianeijje ani. Oya quea ca'a nee nee enequi tii tii. Eya miquianaaya baje pea'ai poeje o'oya; bo biajje poeje'yo —Jesosa poanaje.

⁶⁵Shajja'ajja majje Jodio etii quea quene nee nee poanaje. Quea quene nee nee po majje ojaya daqui, oja huosho ba'e daqui isajea canaje. Jodio dejjaa jamaya oja daqui isajea cani quea quene po majje. Ojjaña cuana huohui canaje jama ba'a: —De, ¡pea dejja a'a iyaajji Jesosa huohuijji! Jamatii. ¡Oya Jesosa mimiqui Eyacuiñajjija Bacua Ejja miame! ¿A'a acuae miquiaaya shajja'ajjanaje oja sohui? Jamajjeya ¿yajja acuae seya aje so'o, de, Jesosa?

⁶⁶—¡Oya oe manojea mee'yocue; quea tai ca esohui acanaje! —jamaya acanaje Jodio dejja cuaa, Jesosa Eyacuiñajjija Bacua Ejja pojjeama posojo.

⁶⁷Majoya aje oe Jodio dejjaa Jesosa cojja cuichojea canaje. Ejjachichacui nequiya cuia canaje pea'ai emeya. ⁶⁸Cuia majje huohui'ajja canaje: —¡Miya Eyacuiñajjija huoojea nei jjabacui majje jja ca oe huohui pocue! ¿Aya acuae mi cuia canaje so'o? —acanaje cuaa.

Penohua sijje acanaje Jesosa oja ba jjima nisho acanaje
(*Macoso 14.66-72; Noca 22.56-62; Huani 18.15-18, 25-27*)

⁶⁹Ojjaña cuaa napa cacui Penohua ba canaje Jesosa; esecuejo sohuinano pejejo e'anioque aniya ba ca'aninaje. Oe echacojjiya ahuema'aniya Peno ba majje huohui'ajja canaje: —¡Miya ca jja mi ca oe Jesosa nijje aninaje Janinea meshijo!

Eponaa huohui cajje ojjaña cuaa Peno bajea canaje. Jamajje Peno metenaje. Jama saja'ame acanaje ba'a: ⁷⁰—¡Chojja, ecuea oya ba jjima! ¿Ajeo acuae mi mimiani? —Peno sijje poanaje. ⁷¹Majoya Peno epeeyijo nequi cuayaquinaje quea mete jjejojo. Pea epona echacojjiya Peno ba canaje esecuejo nequi. Ohuaya ojjaña dejja cuana huohui canaje: —E'e jojo nei oya Jesosa nijje aninaje, ma Nasanenajo ba'e nijje —poanaje.

⁷²—Chojja, ecuea oya ba jjima nei nei. Eyacuiñajjija eba eya e'e jojo nei mimiani —Penohua saja'a canaje.

⁷³Quijje pishana beca cuana Peno que ojee nequi jjanequichipiquinaje. Jama poanaje ba'a: —E'e nei miya Jesusaja epeejji pea'ai pea cuana nijje. Jamaya miquea emimi, pea Janinea meshijo ba'e jayojja jama miya mimiani, de —poanaje.

⁷⁴Ojaya esohui shajja'ajja majje Peno quea mete nee nee poanaje; ona nijje mimijajinaje: —¡Sijje miya poani! Jiquio dejja ecuea ba jjima. Eya e'e jojo nei pojjeama poani jojjemo Eyacuiñajjiya eya mano mee ca'yome —Peno poanaje. Jamatii Peno sijje poanaje.

Peno jamaya poajo, cachina yahue taaanaje. ⁷⁵Cachina taaajo Penohua shahuaba ca'yonaje ma Jesosaa oma mecajje o jama acanaje jama ba'a:

—Peno, cachina yahue taaa jjimahuajo miyaya eya ba jjima nei nei nisho aje'yo, ebeca pee peejjima huohuime aje'yo —jamaya Jesosaa Peno acanaje.

Jamajjeya jjashahuabaqui majje Peno quea yeno nee nee poanaje; pa neinei poqui'yonaje Jesosa ba jjima nisho epo jjejojo.

Jesosa emeshi mese Pinato huasijje dojo canaje
(*Macoso 15.1; Noca 23.1-2; Huani 18.28-32*)

27 ¹Mecajjeahua ojjaña Jodio etii cuana, Eyacuiñajji nijje emimijji etii cuana ojee miminaje Jesosajo: —¿Achajja amajje acuae seya Jesosa quecua meeje'yo so'o? Cua'a, ¡ejjaquecua meequiqui! —poanaje.

²Jamajjeya Jesosa me jeyo majje dojo canaje Shomano emeshi mese Pinato bajjani yasijje.

Jodasa jjanaayisibijeaqui'yonaje Jesosa quecua mee'yo majje quea yeno jjejojo
(*Hechos 1.18-29*)

³Jamajjeya Jodasa, ma Jesosa iña meesahuajji epo Jesosa quecua caje'yo ba majje quea yeno nee nee poanaje. Poquicujinaje Jodio etii yasijje, Eyacuiñajji nijje emimijji etii yasijje pea'ai. ⁴Huohui cañaquinaje: —Eya Jesosa iña mee majje quea mimishi poanaje; oya ca ca Jesosa mase'ama nei nei poanaje, mimishi'ama nei. ¡Ma'aje miquea esodojjo, 30, ma miyaya eya quianaje Jesosa iña meesahua sosejje!

—E'e pojja'a, de. E'e jamatii, Jesosa caquecua jea cahua —Jodio etiiya saja'a canaje—. Miquea mimishijo ca jja mi ca jjashahuabaquiani, de —poanaje.

⁵Jamajjeya Jodasaa esodojjo meshi yasijje huojjojeajea canaje. Pa poquinaje ebio huasijje jjanaayisibijeaqui'yohua. Mano'yonaje. Chama'yo tii Jodasa po'yonaje.

⁶Jodio cuaa aje oe esodojjo meshijo ani chicha canaje: —¿Yajja acuae jja seya jiquio esodojjo aje so'o? Jesosa sosequia'yojji ya ca coma, de. Eyacuiñajji equi yasijje iya sa po ajja. Jamaya pojjeama eseyaya ña —poanaje.

⁷Jamajjeya mimimimi majje meshimisi iñabajijji meshi, Apaneno meshi jjeshe canaje emano ohuajejji, Jodio pojjeama ohuajejji, ma 30 esodojjo sosejje jjeshe canaje. ⁸Jjeya ca ca yohua bajjani ba'a ma ena' cuayaquinaje meshi bajjani'yo, Jesosaja ena' cuayaquinajejo.

⁹⁻¹⁰E'e, yahuajo nei nei Eyacuiñajji esohui huohuijji Jenemiaa tehue ca poa jama ba'a:

“Ecuaa Emeshi Meseya eya huohui canaje: —¡Ma 30 esodojjo sosejje meshi jjeshequicue! —aca poa—, ma bajjanija ba'a meshimisi iñabajijji poanija meshi. Mahuiso esodojjo quia canaje Jodio cuaa Eyacuiñajji huojea'yo Quito iña meesahuajji, equicua'yojji”.

Jamaya Jenemia poa yahuajo nei nei.

Emeshi mese Pinatohua Jesosa ba canaje
(*Macoso 15.2-5; Noca 23.3-5; Huani 18.33-38*)

¹¹ Jamajjeya Jesosa emeshi mese Pinato huasijje dojo canaje, eme jeyo. Pinatohua ba majje huohui'ajja canaje: —¿A'ya acuae mi so'o? ¿A'a miya Jodioja Emeshi Mese poaje'yo?

—E'e, joya ecua miyaya huohuiaña jamaya epo'yojji eya —Jesosaa saja'a canaje.

¹² Jodio etii cuaa, Eyacuiñajji nijje emimijji etiiya pea'ai sijje acanaje Pinato Jesosajo. Jamatii Jesosaa saja'a jjima acanaje. ¹³ Jamajjeya Pinatohua huohui'ajja canaje: —¿Yajjajje acuae mi mi jjasaja'aquiani so'o? ¿A'a jje shajja'ajja jjima?

¹⁴ Chojja, Jesosa jjasaja'aqui ajja nei nei. Ba majje Pinato jjashahuaba neineiquinaje: —¿Yajjajje shai Jesosa jjasaja'aqui ajja, de?

¹⁵⁻¹⁶ Jamajjeya Pinatohua niñeba ca'yonaje jama ba'a: —Ojjaña eshequiaja eyaya oe Jodio dejja jeacuaya'yaña Jodio quea bihui nee poanijo. E'e, ojjaña Jodio cuana jjashahuabaquiani jama ba'a: Yahuaajo Ejito meshijo Jodio etiiquinajja bacua ejja cuia'yo jjima aca poa esohuidojojjiya, ena' ecuipepa jojoya —Pinato poanaje.

Jiquio shejaya Pinatohua oe Jodio dejja ejeanobia nequi huoojeacuayajea mee ca'yaninaje. Jamajjeya oya Pinato jjashahuabaquinaje: —E'e, eyaya oe Jodio huoojeacuayajea meeje'yo jjeyahua nei. Jesosa pojja'a pichojea meeje'yo. Pea yani Mashama bajjani, ojjañaja eba nei. Oya ejeanobia nequi quea masejojo. ¿Ache dejja shai Jodio cuaa sa cani so'o? Caba'ajja sahua —jamaya Pinato jjashahuabaquinaje.

¹⁷ Jamajjeya Pinatohua ojjaña Jodio cuana ehuhui'ajjajji iyaa canaje. Jjachichaquiajo huohui'ajja canaje: —Jjeyahua nei eyaya jeacuayajeaje'yo oe Jodio dejja. ¿Ache acuae jja oe jeacuayajeaje'yo so'o? ¿A'a Mashama? ¿A'a Jesosa Quito pichojeaje'yo? —poanaje.

¹⁸ Pinatoja eba poanaje Jodio etiiya quea quene nee poani ojjaña cuana Jesosa nijje jjapeequianijo. Jamajjeya Jesosa iña mee canaje equecuajae'yojji, Jodio etiiquiaa.

¹⁹ Emeshi mese chacochoañani yasijje Pinato Jesosa nijje mimimiminequianijo, oja huanaseya pea echacojji huoojea canaje Pinato huohuiya. Jama huohuime acanaje ba'a: —Huee, mecajje eyaya cahuibanaje Jesosa mimishi'ama nei nei. ¡A'a oya quecua mee'yojji! Eya quea mete ani ojo. E'e, jjacahuibaqui majje piopionaje quea mete jjejojo —Pinatoja huanaseya echacojji huohui mee canaje.

²⁰ Oja huanase quea mete poanijo, Pinatohua Jesosa pichojea'yo sa acanaje. Jamatii Jodio etii cuaa, Eyacuiñajji nijje emimijji etiiya pea'ai ojjaña ejjachichaqui nequi taaa mee canaje: —¡Mashama oe huoojeacuayajea'yocue! ¡Jesosa a'a pichojeajji! ¡Quecuajae'yocue ca oma oe!

²¹ Jamajjeya Pinatohua: —¿Ache acuae jja oe pichojeaje'yo?

Jamaya acajje, taaa neinei canaje cuana: —Mashama, ¡Mashama jeacuayajea'yocue! —poanaje cuana.

²²—Jamajje ¿yajja acuae oe eyaya Jesosa Quito aje so'o? Eyacuiñajjija huoojea'yo ojjaña jaahuanajji ca pa coma —Pinatohua huohui'ajja canaje.

—¡Me cacajeacue oe acui ecueata'apeejo! —acanje cuaa.

²³—¿Yajja acuae jja so'o? ¿Yajjajo acuae jjaya quecua'yo sa ña Jesosa? —Pinatohua huohui'ajja canaje.

Jamatii taaa majamajanaje Jodio cuana: —¡Me cacajeacue oe; me cacajeacue oe Jesosa! —jama taaameya Jodio cuana poanaje.

²⁴E'e, Jesosa pichojea mee jjima acanje cuaa; quea quene nee neejo janobajjima nei siasianaje; taaa nequinaje Jodio. Taaa majamajajo Pinatohua huoojea canaje ena eme shacuajji jjequiya. Majoya ojjaña cuanaja ebajji Pinatohua eme topo canaje: —¡Eyaya pojjeama me cacaje Jesosa emano'yojji! ¡Jamaya pojjeama ecuea esohui! ¡Miyaya ca jja ca oe jamaya ña! —Pinatohua acanje.

²⁵Taaajebenaje ojjaña Jodio etii cuana: —E'e, ¡ecuaaya oya mano meeje'yo Jesosa; quea tai coma! ¡Oya mimishi'ama jojoya, ecuanajaya ebacua, osecua cuana pea'ai cacua ca'yahua, Eyacuiñajjiya! —Jesosa quea mimishi poso acanje cuaa.

²⁶Jamajjeya Pinatohua ohua sa canijo Mashama jeacuayajea mee ca'yonaje; Jesosa ca ca huoojea canaje cuiasejjajea majje me cacajeaa, emano'yojji.

Sohuinano soa neineinaje Jesosajo

(Macoso 15.16-20; Huani 19.2-3)

²⁷Majoya emeshi meseja sohuinano cuaa Jesosa dojo canaje emeshi mese chacochoañani equi dojjo huasijje. Ojjaña sohuinano o que jjachichaquinaje.

²⁸Oja daqui huijjiajea mee majje daqui huo'o nei huosho mee canaje emeshi mese nisho'yajji. ²⁹Acuisha sipi majje sapahuahuo iya canaje emeshi mese jayojja nisho epojji. Emeshi meseja acui ejehuijjajja iñanequia mee canaje ebianeimejje. Majoya ecui'oshajjajo nequianaje ojjaña, Jesosa bihuiajji nisho. Jama bihuia nishome acanje cuaa ba'a: —¡Miya Jodioja Emeshi Mese quea ca'a nee! ¡Ba'e tiitii'yocue! —jama sajeameya anisho canaje cuaa Jesosa.

³⁰Majoya cuichojea canaje oja yami yasijje; acui ejehuijjajja jjequisejjajea ca'yonaje oja emejo nequi. Jjequisejjajea'yo majje sapa cuiape'ejea canaje. ³¹Ojo soa neinei'yo majje daqui huo'o nei huijjeajea ca'yonaje; ojaya daqui quia ca o'oyanaje. Majoya Jesosa dojo canaje me cacajeaa, ba'ehuanasohuajee pea'ai, sohuinano cuaa.

Jesosa acui ecueata'apeejo me cacajea canaje sohuinano cuaa

(Macoso 15.21-32; Noca 23.26-43; Huani 19.17-27)

³²Jenosanenajo aniya Jesosa dojo caje, ba cajjequinaje pea dejja Simoni bajjani, Sinene meshijo ba'e poe'yo. Sohuinano cuaa Simoni acui ecueata'apee

dojo mee canaje Jesosa quishishijji, Jesosa ba'ehuanasohuajeajji. ³³Jamaya oya poquinaje Jonijota eyiyo huasijje, Ese Ejjaja esohuijo Esapa Jjii anijji bajjani yasijje. ³⁴Nequiñaquiajo Jesosa ishi mee'ajja canaje cuaa acuijjajja na quea sese, quea pase. Ishi mee'ajja canaje quecua ca'yajje nee'ama epojji. Sio majje ishi jjima acanaje Jesosaa. Majoya me cacajea ca'yonaje. Me caca majje nequiasohuajea canaje. Majoya oja daqui cuana chicha ca'yonaje, sohuinano cuaa. Iyachicha'yo majje, hue'e nisho majje daqui majjo ca'yonaje, ojaya pojji epo'yojji. ³⁵⁻³⁸Etehue'yo o ba'e sapa biajje oja bajjani caca canaje, Jesosa bajjani, oya apiojji me cacajea ca'yonaje huohui epo'yojji. Etehue'yo jama poa ba'a:

OYA JESOSA JODIOJA EMESHI MESE EPO'YOJJI

Jesosa ba'e pejejo beca siipojji pea acui ecueata'apee cuanajo ba'ehuanasohuajea pea'ai ca'yonaje, Jesusaja ebiane miijje, pea shani miijje. Majoya e'anioque aniya ojjaña cuaa ba neinei ca aninaje oja epeejjiya eba'ehuanaoquea ca'yo poajeje.

Ejiojjije poquije Jesosa nije mimijajinaje cuana
(*Salmos 22.7; 109.25; Mateo 26.61*)

³⁹Pea dejja cuaa ejiojjije poquianiya Jesosa que poe majje esapa jecajjacajja canaje, soa huisahuisa nequinaje. Jama mimijajime poanaje ba'a: ⁴⁰—¿A'a acuae oe miyaya Eyacuiñajjija mei equi ñajeabichajea'yo majje pea equi iyaje o'oya so'o pea beca peejjima cahuime? ¡Ba'ajja socue! Ache ba'ajja; miya Eyacuiñajjija Bacua Ejja nei jjabaqui majje ca oe ¡acui ecueata'apeejo ba'e nequioque'ajja'yo socue emano'yojji pojjeama! —poanaje cuana.

⁴¹Jamaya pea'ai Jodio etii bajjani cuaa, Moisesija etehue'yo huohuijji cuaa, Eyacuiñajji nije emimijji etii cuaa pea'aiya Jesosa niñeba canaje: ⁴²—¿A'a Jesosa ojjaña jaahuanajji epo'yojji? Oya ona nahuejji pojjeama. Oya ca ca oma nequioque'yo jjima poani, de. ¿A'a acuae jja oe oya Jodioja Emeshi Mese poaje'yo? ¡Jjaba'ajjaqui socue! Jodioja Emeshi Mese nei epo'yojji jjabaqui majje ¡acui ecueata'apeejo ba'e jja ca oe canequioqueahua jjeyahua neiya ecuanaja ebajji! Ba majje ecuaaya: “Jesosa e'e jojo nei Eyacuiñajjija Bacua Ejja poanaje” aje'yo. ⁴³Ohuaya: “E'e, eya ca ca ña Eyacuiñajjija Bacua Ejja; ohuaya eya jaahuana cani” acanaje yahuajo. Jamajjeya oya Jesosa Eyacuiñajjija quea boti nee neejo, ¡Eyacuiñajjiya oya canahue cahua jjeyahua nei! —Jodio cuana poanaje.

⁴⁴Siipojji cuaa ma o pejejo eba'ehuanasohuajea ba'eya pea'ai Jesosa jamaya niñebame acanaje, quea huiso nee.

Jesosa mano'yonaje
(*Macoso 15.33-41; Noca 23.44-49; Huani 19.28-30*)

⁴⁵Majoya eshequi biacojjajja nequijo shequima' jayojja poanaje; quea misi nee poanaje ojjaña meshi yasijje. Quijje eshequi jjajeapaaqui'yo majje jji o'oyanaje. ⁴⁶Sinecua, quea misi poajo Jesosa quea yeno nee neejo taaa

neineinaje: —¿Eli, Eli, lama sabactani? —taaame poanaje—; ecue Chii, ecue Chii, ¿yajjajo acuae moya jeana'yonaje so'o? —Jesosa poanaje Jodioja esohuijo.

⁴⁷Shajja'ajja majje joya quea chipi nee nee nequi jama poanaje ba'a: —¡Bacue oe! ¡Ohuaya etiiquiiana Enia iyaa cani pojja'a!

⁴⁸Jamajjeya oe dejja poquicuajinaje acuijjajja na sese jjequiya. Jjequi majje shajshaja iyanobia canaje ena ejequi yasijje. Majoya bequiobo sajo quecuahuosho majje Jesusaja enaba huasijje huoo canaje ojaya e'ishijji nisho.

⁴⁹—Chojja, ¡ishoa socue! ¡Enia pojja'a poeje o nahueya! ¡Ba'ajja socue! —Jodio cuana poanaje.

⁵⁰Jamatii taaa neinei o'oya majje Jesosa mano'yonaje. Chama'yo tii poanaje. ⁵¹Jesosa mano'yajo tii, Eyacuiñajjija equijo daqui quea moo eba'ehuana ba'e Eyacuiñajjiya eyajje jja'isajea meequi canaje; biacuajje ebionei jja'isajeaquinaje. Meshi janobajjima nei huehuahuehuanaje pea'ai. Mei quea quemo cuana jjayajjejaquinaje pea'ai. ⁵²Mei jjani, esajaajji cuana pea'ai jjayajjejaquinaje. ⁵³Quijje Jesosa eshe o'oya poajo, Eyacuiñajjija epeeji yahuajo emano'yo ma jjani cuanajo jaa cuayaqui'yonaje, quea huiso Jenosanena huasijje poquinaje cuana; quea huiso dejjaa ba canaje ma emano'yo cuana.

⁵⁴Ojjaña ba majje, meshi huehuahuehuani ba majje pea'ai sohuinano quea huiso nee, 100, huooejajji poaniya pea sohuinano cuana nijjeya, ma Jesosa nahuejji poani, quea mete nee nee poanaje.

—¡E'e jojo nei, de, oya Jesosa Eyacuiñajjija Bacua Ejja nei poanaje! —sohuinano poanaje.

⁵⁵Quea huesha nequiya epona cuaa pea'ai Jesosa eba'ehuanasohuajea ba'e ba canaje. Oya cuana yahuajo Jesosa nijje Janinea meshijo ania poa. Onijje Jenosanena huasijje poeyanaje oja bobi cuacua meesahuaa. ⁵⁶Oya cuana ma bajjani ba'a: Mania Madanena; Satiaco, oja chahua Jose pea'aija enaese Mania bajjani; Semeneoja ehuanase pea'ai; Jesusaja enaese pea'ai.

Jesosa mei jjani yasijje huananobia ca'yonaje
(*Macoso 15.42-47; Noca 23.50-56; Huani 19.38-42*)

⁵⁷Jamajjeya sinecua nei Jesosa mano'yajo, dejja quea aquiiana huiso nee Jose bajjani poeyanaje, pea Jose, Amatea meshijo ba'e. Oya Jesosa nijje japee tiitiiquia poa yahuajo nei. ⁵⁸Jamajjeya poe majje oya Pinato baa poquinaje. Huohui cañaquinaje: —Emeshi mese Pinato, Jesosa mano'yonaje. Eyaya oya cadojo'yahua ecuea mei jjani yasijje ehuananobiaqui'yojji —poanaje.

Pinatohua huoojja canaje: —E'e, ¡dojocue! Eyaya sohuinano cuana jamaya huohuime aje —poanaje.

⁵⁹Jamajjeya Joseya Jesosa acui ecueata'apeejo emano'yo ba'e jjequioquea'yo majje dojo ca'yonaje. ⁶⁰Daqui oshe eyacua neiyo bebo majje huananobia ca'yonaje ojaya mei jjani yasijje, ma oja jjeya nei tio huasijje. Majoya mei quea quemo jeacajjajja canaje mei jjani naba capa'yoyji. Jesosa mei jjani dojjojo jaa capajea canaje. Capa'yo

majje poquinaje Jose pea cuana nijje. ⁶¹Mania Madanena, pea epona Mania bajjani pea'ai mei jjani yasijje poeyanaje pea'ai Jesosa jjanijo ehuananobia jaa baa. Jomajo e'anioque aniya ba canaje, epona cuaa.

Sohuinano cuaa mei jjani nahue canaje

⁶²Jamajjeya mecahuajje epojja ejomishocajji jJayejjequiajo Paniseo cuana, Eyacuiñajji nijje emimijji etii pea'ai poqui o'oyanaje Pinato que. ⁶³Huohui caña'yonaje: —Emeshi mese, ecuana jjashahuabaquiiani yahuajo Jesosa mano'yo jjimahua siajje poanaje jama ba'a: “Beca cahuime po majje eya emano'yojaa shequije'yo” —Jodio poanaje, Jesosa siajje poanajejo poso—. ⁶⁴Jamajjeya ijyeyahua nei sohuinano huoojeacue jjani baa, beca cahuime pohua, Jesusaja epeejiya oe equehua dojo'yo bacue! Jamaya po majje ojjaña cuana dasia ca chana' jama ba'a: “¡Bacue oe! ¡Jesosa ca jja ca emano'yojaa shequi o'oyanaje!” huohui ca chana' oja epeejiya. Ojjaña cuana siajje nei nei aca'yo chana' —Jodio cuana jamaya poanaje, Jesosa eshequi o'oyajji pojjeamajo poso.

⁶⁵Jamajjeya Pinatohua huoojea canaje: —¡Ma'aje sohuinano cuana! ¡Dojo'yocue mei jjani yasijje, ma Jesosa ehuananobia jaa huasijje! ¡A'a acuae jjani ca'aje'yo ba'ajja socue! —poanaje Pinato.

⁶⁶Jamajjeya poquinaje Jodio cuana sohuinano cuana nijje mei jjani yasijje. Jjani capajji ijji ca'a meequi ca'yonaje baacuiya. Majoya esecue jjanijo emeshi mese nisho iya canaje ona edobiqui poaje jjejojo. Etehue iya canaje, emeshi mese nisho. Majoya Jodio cuana poquinaje. Sohuinano ca ca enequinaje tii, esecue jaahuanajjiya.

Jesosa shequi'yonaje

(*Macoso 16.1-10; Noca 24,1-12; Huani 20.1-10*)

28 ¹Jamajjeya epojja ejomishocajji jJayejjequiajo mecajjeahua nei nei, ebionei jjapojjaquiajo, nomico pojajajo, Mania Madanena, pea Mania nijje poquinaje mei jjani yasijje. ²Epona cuana jjani peje yasijje poeyajo, meshi huehuahuehuanaje janobajjima nei. Eyacuiñajji esohuidojojji eyajo ani nequioquenaje. Mei jeacajjajajaea canaje. Majoya esohuidojojji mei biajje anioquenaje. ³Oya quea jiji nee nee poanaje pojjeje jayojja; ojaya daqui quea oshe nee nee, bo oshe nee nee jayojja ani ba canaje epona cuaa. ⁴Sohuinano cuana quea mete nee nee poanaje. Piopio neineinaje; meshi yasijje jaabichajeaquinaje, emano'yo jayojja jama jaanaje esohuidojojji yajjajo. ⁵Majoya esohuidojojjiya epona cuana jama huohuime acanaje ba'a: —¡A'a quea mete pojji! Ecuea miya eba. ¿A'a Jesosa, ma acui ecueata'apeejo mano'yonaje sa'ajja'yo poequi? ⁶Chama' oya jjeya jiquiojo. Shequi'yonaje ca jja coma; ma ecua ohuaya huohui canaje jamaya e'e jojo nei po'yonaje; oya shequi'yonaje jjeya. E'e, ¡quia'o jiquio ba'ajjahua'yo! Jiquiojo jaanaje. ⁷Jyeyahua nei poquicujicue oja epeeji cuana huohuuya! ¡Jama huohuime

acue ba'a: “Jesosa pa shequi'yonaje” acue! “Oya jjeya nei Janinea meshi yasijje poquije miqiuana poqui jjimahuajo. ¡Oya oe jocuama baquicue!” jamaya o shajja'ajjajji cuana huohuicue! ¡Ecue sohui ma eya huohuinaje oe a'a pajea'yoyji; pea huasijje huohui neiquicue! —esohuidojojji jamaya poanaje.

⁸Jamajjeya epona cuana poqui cuajicuajinaje. Quea mete, quea bei nee nee poanaje. Cuajicuajinanaje Jesosa shajja'ajjajji cuana esohuidojojji esohui huohuiya.

⁹Ejojjiije poquijejo Jesosa jjanequipanaquinaje. Ehui dojojji nequinaje. Huohui canaje: —Jjo'i, ¡ejo quea bei pocue! Eya poeyanaje —Jesosa poanaje.

O que poe majje o que jjanequichipiquinaje. Ecu'i'oshajjajo nequinaje; jiojji napa canaje. Quea bhui nee nee yajji epona cuaa oya bihuia canaje.

¹⁰Jamajjeya Jesosaa oya cuana huohui canaje: —¡A'a quea mete pojji! ¡Poquicue; ecuea epeejji cuana huohuicue, miyaya! ¡Jama oe acue ba'a: “¡Jjeyahua nei oe Janinea meshi yasijje poquicue! ¡Jocuama oe Jesosa baquicue, Janinea meshi yasijje!” acue! —Jesosa poanaje.

Sohuinano cuana Jesosajo sijje poanaje

¹¹Epona cuana poqui'yajo sohuinano cuana meshijo jaa nequisohua'yonaje. Jenosanena huasijje poquinaje Jodio etii baa. Eyacuiñajji nijje emimijji etii huohui caña'yonaje ojjaña ohua jama acanaje, sohuinano cuaa. ¹²Huohui poña'yonaje. Sohuinanoja esohui shajja'ajja majje Jodio etii cuana jjachichaquinaje emimimimijji. Majoya sohuinano cuana quea huiso bejjo quia canaje o sijje poani sosejje.

¹³Jama huohuime acanaje ba'a: —¡Miyaya ojjaña cuana jama huohuime acue ba'a: “Mecajje ecuana ecahuijaajo Jesosa sii ca'yonaje jjanijo jaa, o shajja'ajjajjiya” acue! ¹⁴Emeshi mese Pinato miquea ehuhui shajja'ajja cajo ecuana onijje mimije, e'e jojo nei, miya ojaya enapa'yoyji pojjeama. Pinato quea bei po meeje'yo ecuanaa —Jodio cuana poanaje.

¹⁵Jamajjeya Jodio etii cuaa sohuinano bejjo quia canaje. Bejjo jjeshe majje sohuinano cuana poquinaje ojjaña huasijje huohui pohua. Jodio etijja esohui jayojja jama acanaje. Jamajjeya quea huiso Jodio cuana sohuinanoja esohui shajja'ajja majje e'e jojo nei poani posojo jjashajja'ajjaquinaje. Jjeya jiquio pojajjo cuanaya jamaya Jodio cuaa huohui cani tii: —¡Jesosa ca jja ca ojaya epeejjiya quehuadojo ca'yonaje; shequi o'oya ajja! —sohuinano sijje poanaje jayojja jama poani tii, Jodio cuana.

Jesosa ba canaje o shajja'ajjajji cuaa

(Macoso 16.14-18; Noca 24.36-49; Huani 20.19-23; Hecho 1.6-8)

¹⁶Jamajjeya Jesosa shajja'ajjajji cuana 11 huisome poquinaje Janinea meshi yasijje Jesosa baa. Poquinaje eyiyo huasijje ma Jesosa huohui poequi baa. ¹⁷Poqui majje, Jesosa ba majje bihuia canaje cuaa. Jamatii

beca cuana ca ca jama poanaje ba'a: —E'e pojja'a. Edojjoshahua pojja'a coma, Jesosa pojjeama —jjashahuabaquinaje.

¹⁸Jamajjeya Jesosa o que jjanequichipichipiqui majje jama huohuime acanaje ba'a: —Eyacuiñajjiya eya Emeshi Mese nei epojji aca'yonaje eyajo, meshijo pea'ai. ¹⁹Jamajjeya ¡poquicue ojjaña dejja cuana huasijje! ¡Ojjaña pea esohui mimiani yasijje ecuea esohui ba meequicue pea'ai! ¡Enijje jjapeequi meequicue! Enijje jjapeequiyajo, ¡ena huasijje besa meecue, esesa Chii nijje epojji, enijje epojji, Edojjoshahua Pame nijje pea'ai epojji! ²⁰¡Ojjaña cuana ecue sohui ba meesahuacue oe! ¡Ojjaña oe jjashajja'ajja meequicue quea bame nee nee eba'ejji, mimishi'ama eba'ejji! ¡Bacue oe! Eya e'e jojo nei minijje nequi tiitiije'yo ojjaña pojjaajo, jiquio meshi oe epojji jiquio epojja huisome tii —Jesosa poanaje.

Mahuiso ecuea esohui etehue'yo. Eyaya Mateo bajjaniya tehuejeyonaje. Apoa.